

Aposel

Yesuyen Mere Basan Marte Meten

¹ Be, Tiofilus, nebe Yesu megen gar hinhinya daha mat meten ten hinhin, irde al saba yirde hinhin goyen hanjapya gogo kan gunmirin.

² Irde kamyinde mat huwarde komatmin yingen basin yirin mar goyen Holi Spirityen taren de hulyan yirin gote baranya Al Kurun belen tumulgan tike hurkurin goyen gote baranya manan asan goyenter kamirin.

Yesu belen Holi Spirit nin doyan henayin yen mere basan marmen yinyin

³ Be, Yesube nurde hayen gwahade goyen po, al belen mayke ulin misin kurun katen kamyinde mat huwaryin. Irdeb, “Gwaha timekeb nenen fudinde huwarun gago yen nurnayin,” yenbe komatmin yago dilinde forok yen mere yirde hike dilinde wor po kenen hinhan. Be, kamyinde mat huwardeb nan kahal 40 gayen megen gar hinhinya goyenbe Al Kurun belen al doyan yird yird mata nin komatmin yago goyen mere yirde saba yirde hinhin.

⁴⁻⁵ Be, go ten hinhinya goya goyen po komatminya gabu hen dula ten hen yabe gaha yinyin: “Adone belen det dunen yen bin tiyyin goke mon dirde hinhem gobe Holi Spirityen baptais. Ningeb goke doyan hen hinayin. Yonbe fe belen baptais yirde hinhin gega, denbe hitnen tenbe Al Kurun belen Holi Spirit po baptais diryen.

Ningeb goke tenbe aran ma Yerusalem tubul ten kunayin,” yinyin.

⁶ Be, Yesuyen komatmin yago belen mere go nurde kamereb Yesuya Olip dondonde gabu irdeb, “Doyan Al Kurun, bikken asininin yago belen nen Israel mar doyan dirde hinhan gwa-hade goyen gayenter ge belen wor kuruninin hen doyan dirke igin megeninin nen Israel mar belen tumulgan titek we?” yen gusunjan iramin.

⁷ Irkeb wol henbe gaha yinyin: “Nanne belen mata forok yenayin yen sanjinminde nalu yirtin gobe dufayminde po yirtin geb den belen nurtek mon.

⁸ Gega den nurtek detbe gago momon diren tihim. Holi Spirit den hitte katke tarenmin tenbe alya bereya Yerusalem taunde ninya Yudia nanjare ninya Samaria nanjare ninyabe megen kurun gayen bana nin mar ne belen mataya mereya ten himeke nenen hinhan goke tagalde tukun hinayin,” yinyin.

*Yesube Al Kurun hitte mulgan hen hurkurin
(Mak 16:19-20; Luk 24:50-53)*

⁹ Be, mere tiyyin go kamereb komatmin belen dilinde wor po kenen hikeya Al Kurun belen tumulgan tike hurkurin. Irkeb gagap belen bana kerkeb go ma kenamin.

¹⁰ Irdeb dilinbe Yesu hurkurin belen gon po nankenen hinhan. Irkeb al irawa amil faykekde umna titin gore gor kura mat wayhar minmon, bemel po ketalminde forok yen huwardebe,

11 “Mel, Galili mar, daniñ nanñinde nanñenen diltiñ misinñ tenñ hanñ? Yesube diltiñ mar Al Kurunñ belenñ tumulğanñ tike hurka kenhanñ al goyen kamebe gwahade go po mulğanñ henñ wayyenñ,” yinaryum.

Matias belenñ Yudasyen gasunñ tirinñ

12 Be, go kamereb Yesu komatminñ yago gobe Olip dondonñ go tubul tenñbe Yerusalem taunde mulğanñ haminñ. Olip dondonñde mat Yerusalembe 1 kilomita gwahade.

13 Be, mel go Yerusalem forok yenñbe ya yen hinhande gor kwaminñ. Ya goyenbe al henñ henñ gasunñbe irawa hende bande ninñgeb, yenñbe hende hinhan. Be, mel gobe hinhande gor hurkaminñ. Go mar gobe Pita, Yon, Yems, Andru, Filip, Tomas, Batolomiyu, Matiyu, Alfius urminñ Yems, Yems urminñ Yudasyabe Saimonya. Saimon gobe Roma gabman asogo irde hinhan mar Selot buda goyen bana ninñ al.

14 Be, mel go huginñen gabu irde dufayminñ unñkurenñ po irde Al Kurunñ mere irde hinhan. Bere buda Yesu gama irde hinhan goya Yesu kulinñ wenñya milinñ Mariaya manañ bana gonñ tumñanñ henñ Al Kurunñ mere irde hinhan.

15 Be, 120 al gwahade Yesu ninñ dufayminñ tarenñ iraminñ mar goyen Pitaya huginñen gabu irde hinhan. Be, wawunñ kurareb Pita belenñ huwarde gaha yinyinñ:

16-17 “Be, kadne yago, nebe Iskariot ninñ al Yudas ninñ yewenñ tihim. Yenñbe Yesu belenñ basinñ irde metenñ unyinñ. Irke nenñya tumñanñ metenñ tenñ hinhet. Gega yenñ belenñ Yesu maytek mar goyen

belen kerde yunke kun Yesu tamin. Ningeb al gore mata bulun gwahade tiyyen yen bikken Holi Spirit belen Dewit dufay unke mere Al Kurunyen asande katin gobe gayenter fudinde gwahade po forok yiyun,” yinyin.

¹⁸ (Be, Yudas mata bulun tiyyin gote hora belenbe megen tapum kura damu tiyamin. Irdeb megen goyenterbe yingen timiyyin. Irkeb bin pol yeke araynen fur tiyamin.

¹⁹ Irkeb al buda kurun Yerusalem hinhan gore mere momonmin nurdeb nana tapum gobe Akeldama inamin. Akeldama gote minbe ‘dari wok yitinde’.)

²⁰ Be, Pita belen sopte gaha yinyin: “Al goyen goke Al Kurunyen Tikin Asandebe gahade katin hi:

‘Yende tiyunbe bulun hen dulnen hiyen. Al kura gor ma po hiyen,’ yitin. *Tikin 69:25*

Irde Tikin Asande gor kurabe mere gahade manan kayyin:

‘Yen wolminenbe al hoyan kura gasunmin go ten meten tiyyen,’ yitin. *Tikin 109:8*

²¹⁻²² Ningeb katin gwahade goyen po gama irtek yenbe al kura Yon belen baptais nin mere tagalde hinhide mat kun kun Al Kurun belen Yesu tumulgan tike kinyin al goyen tenbe Yudasyen gasun wol kertek. Al gobe nenya tumnan Yesu gama irde kun wan ten hinhet al gore gab nenya henbe Yesuyen mere basan al hen Yesube fudinde huwarun yen tagalde tukun hiyen,” yirin.

²³ Be, gwaha yinenbe gabu iramin bana gon nin al irawa denje yuramin. Matiasyabe Yosepya.

Yosep gote denebe irawa. Kurabe Basabas, munan kurabe Yastus inen hinhan.

²⁴⁻²⁵ Go kamereb Al Kurun gahade mere iramin: “Doyan Al Kurun, Yudasbe Yesuyen mere basan al hinhin gega, meten go tubul ten kamdebe nebe gor nin yenbe gor po kun. Ningeb al kura yende gasun ten Yesuyen mere basan al hewon yen nurde hite. Gebe al kurun gate dufayminya binja kenkela yenen ha geb, al irawa gayen ganunbe meten go tiyyen yen basina irarin goyen dikala dirayin,” inen gusunan iramin.

²⁶ Gwaha inenbe irem gote denem kanbe Yuda marte matare tilin tanaramin. Irkeb Matias denemde huwaryin. Irkeb gor hinhan mar gore Matiasbe Yesuyen mere basan al hihi yen nuramin. Irkeb al 11 hinhan goyen 12 hamin.

2

Pentekos nalure Holi Spirit katyin

¹ Be, Yuda marte gabu nalu kura Pentekos yen hanyen goyen forok yekeb Yesuyen mere basan mar aposel budaya Yesu nin dufaymin taren irde hinhan mar tumnan 120 gobe gasun unjkurende po gabu iramin.

² Gwaha ten hikeyab bemel po mene kurun migirin yara kura nanjinde mat forok yeke nuramin. Irkeb migirin gore po katenbe ya bin mel go hinhande goyen ep irde tukurin.

³ Irkeb kotan kan nankenamin. Irdeb det kura kak melak yara gore yen hitte po katenbe bur yen kun al tonan heren keperde tukurin.

⁴ Irkeb Holi Spirit belen hard yunkeb almet mere kurayen kurayen yen go ma nurde hitin kurun goyen gwaha mat mere titin ala tiyamin.

⁵ Be, Yerusalem gorbe Pentekos nalu kurun goke tenbe Yuda mar nanja kurar kurar hen Al Kurun dolon irde hanjen mar goyen wan gor hinhan.

⁶ Be, Yesuyen mere basan mar aposel buda hinhande gor migirin go nurdeb al buda kurun gore yinnin yen wayamin. Irdeb aposel budaya Yesu nin dufaymin taren irde hinhan marya gore mere kurayen kurayen mat tikeb mel goreb merem mat merem mat nurdeb dinon kok yen tulfut yamin.

⁷ Irdeb dufaymin titmin hekeb gaha yamin: “Ey! Mel gab tumnan Galili mar.

⁸ Gega dahade ningeb merenin nende gigen yeke nindiken nurhet?

⁹ Irdeb nenbe nanja hoyande nin hoyande nin. Nen kurabe Partia nanjare nin, kurabe Midia nin, munan kurabe Elam nanjare nin, kurabe Mesopotemia nin, kurabe Yudia nin, kurabe Kapadosia nin, kurabe Pontus nanjare nin. Irde kurabe Esia* nanjare nin.

¹⁰⁻¹¹ Goyenbe go po mon. Nen kurabe Frigia nanjare mat watin. Munan kurabe Pamfilia nin, Isip nin, irde Libia nanja bana gon nin al Sairini taun bindere hanjen mar. Irde al kurabe Krit motmotde nin, kurabe Arebia nanjare nin. Irdeb al kurabe Rom mat belnen wayan. Goyenbe dahade ningeb Al Kurun belen mata tinen ku-

* **2:9:** Esia nanja gobe gayenter nin Esia nanja kurun goke ma yitin. Gayenterbe Turki inen hanjen.

rayen kurayen al belen gwaha mat forok yen han yen ma nurtek goyen forok yirde hinhin gobe mereninin mat yen han?" yen kukuwamnen nuramin. (Be, Rom mat wayamin mar goyen kurabe Yuda mar, munan kurabe al min hoyan goyen Yuda marte tikula gama irde hanyen mar.)

¹² Irdeb hurkun kat ten gor naknak tenbe, "Gab da matabe gago?" yen yingen ulin kadam gusunan gird tiyamin.

¹³ Gega kuraminbe Yesu nin dufaymin sanin irde hinhan mar goyen nanosak mere yirdeb, "Mel gabe wain ugun po nene kukuwa hahan," yamin.

Pita belen mere tagalyin

¹⁴ Irkeb Pitabe aposel buda 11 goya huwardeb kuware al buda goyen gaha yinyin: "Be, kadne yago, den Yuda mar, Yerusalem taunde nin ya sinare nin ya, ga nurnan. Mata forok yihi gayen min gwahade yen momon diren tihim geb, kenkela kirmintin kernan ko.

¹⁵ Gabe 9 kilok wampot Al Kurun mere ird ird nalure hite. Gega den belenbe fe nen kukuwa hahan yen denhan?

¹⁶ Mon, hakot Al Kurunyen mere basan al Yoel belen Yuda mar nin mere ten asande kayyin gobe han ka gago forok yihi.

¹⁷ Al Kurun belenbe gaha yirin:
"Tonne Holi Spiritbe al megen nin hitte fe wogor-
tin yara irde yunen.
Irkeb kame gab nalu funan forok yiyyen.
Irkeb urtin ya wertin yagoya belen merene basan
hen tagalnayin.

Irde al fonenjin belen yuwarwarte dufayne yenen bebak tinayin.

Irde salannenjin belen mitere dufayne yenen bebak tinayin.

¹⁸ Fudinde, nalu goyenterbe meten marne, alya bereya, tumnan
Tonne Holi Spirit yunmeke merene basan hen tagalnayin.

¹⁹⁻²⁰ Irdeb Doyan Al Kurun wayyen nalu kurun goyen forok yewen tikeb
megenya nanjindeyabe mata tinen kurayen kurayen al belen yenen tulfut yetek goyen forok yirmeke yennayin.

Nanabe kidoma hiyyen, munan gagasibe buk yen dari yara hiyyen.

Munan megenbe dari, kakyabe kaki bukdulnen forok yenayin, 'yitin hi. *Yoel 2:28-32*

²¹ Gega nalu funan goyenterbe al kura ne nin nurde gama nirde hinayin mar goyen mun po gab tumnan yawaren," yirin.

²² "Ningeb, mel Israel mar, mere ga nurnan ko. Nasaret nin al Yesube fudinde Al Kurun belen ten kerke wayun yen nurnayin yenbe Al Kurun belen taren unen hike diltinde mata tinen kurayen kurayen kurun gogo forok yirde hike yenen hinhan. Denbe goyen kenkela nurde han gogo.

²³ Be, Al Kurunbe kame mata forok yiyyen goyen kenkela nurde hinhin geb, bikken dufaymin kiryin goyen po gama irde Yesu goyen den hantinde kirun. Irkeb den belenbe Al Kurun ma nurde unen han mar haniinde pel irkeb kuruse

hende mayke kamun. Niñgeb den gare po Yesu mayke kamun.

²⁴ Gega kamde kamde taren Yesu tanartek goyen Al Kurun belen ten sinã irde isan hekeb huwarun. Kamde kamde sanin gore epte ma basinã irun.

²⁵ Be, Yesu huwarun goke bikken Dewit belen asandebe gahade kayyin:

‘Doyan Alnebe huginen neya hike kenen hime. Yenbe ketalner hen faran nurde hi geb, kafura ma hewen.

²⁶⁻²⁷ Goke tenbe bener mat amanen wor po nurde Al Kurun turun irde hime.

Nebe ge belen metere ma nubul tike bida hewen. Delger wukkek wor po nenen ha gayen nubul tike bida hen hen mata gobe ma kenen.

Kamde bida hetek yara gega, fudinde wor po ge belen faran nurke huwaren yen nurde hime.

²⁸ Huginen hen hen belnen goyen nikala niran. Niñgeb kame geya tumnan henbe goke amanen nurde hen, ‘yitin hi,’ yirin. *Tikin 16:8-11*

²⁹ Be, Pita belen sopte gaha yinyin: “Kadne yago, asininin Dewit belen gwaha yirin gega, yenbe bikken kamke mete tiyamin. Irde fudinde wor po gasunbe gor mete tiyamin yen nurde hite. Irde wan wan gayenter wor metemin gobe hi.

³⁰ Goke tenbe Dewit belen mere tiyyin gobe yingen ge ma yirin. Yenbe Al Kurunyen mere basan al geb, Al Kurun belen binã tenya, ‘Kame Dewityen minde nin al kura yingen yara po forok yenbe gasunmin ten Doyan Al Kurun hiyyen,’ yirin goyen nurde hinhin.

³¹ Mata kame forok yiyyen goyen nurde ep henbe Al Kurun belen Mesaia metere mat isan hekeb bana gon ma bida hiyyen goke tagalyin.

³² Be, Mesaia gobe Yesu. Nen kurun gab Al Kurun belen kamtinde mat isan heke huwarun goyen dilyninde wor po kintin geb, yen ge kawan tagalde hite gago.

³³ Yesu gobe Nanin Al Kurun belen tumulgan tike hurkunbe Naninde taren ten Doyan Al Kurun hiyun. Irde Nanin belen Holi Spirit nin bin tiyyin goyen unke tenbe gago fe wogortin irde duna. Irkeb migirin kurun goyen nurde diltinde wor po mata kenhan gago.

³⁴ Dewitbe ulin tumnan ma Al Kurun hitte hurkurin. Gega gahade kayyin:

‘Al Kurun belenbe Doyan Alne gaha inyin:

Wan ketalner hen al denem yan wor po hawayin.

³⁵ Irkeb asogo girde han mar goyen bul yirde yawan gasa yirmeke katkeb yufurka tiyayin,’ yitin. *Tikin 110:1*

Mere gabe yingen ge ma kayyin. Yesu nin ten kayyin.

³⁶ Ningeb den Israel mar, mere diren tihim gayen fudinde wor po yen nurnan ko: den belen Yesu kuruse hende mayke kamun. Gega Al Kurun belen kamtinde mat isan heke huwarun. Irkeb yen belen po Doyan Al Kurunya Mesaiaya irun,” yinyin.

Al budam Al Kurun nin bin mulgan heke baptais tamin

³⁷ Be, al buda go meremin nurdeb, ‘Fudinde mata bulun titin,’ yen memyak wor po nurdeb

Pitaya aposel buda kadam yagoya goyen, “Kad-ninin yago, ningeb daha titek?” yen gusunjan yiraminj.

³⁸ Irkeb Pita belen wol henbe gaha yinyinj: “Ningeb denj kurun gayen mata bulunjin yubul tenj Al Kurun nin bitinj mulgan henan. Irdeb Yesu Kristu nin dufaytinj tarenj irde yende denemde baptais tenayinj. Gwaha tike gab Al Kurun belen mata bulunjin goyen haldeb Holi Spiritminj dulinj dunenj yen binja tiyyinj goyen dunyenj.

³⁹ Go binja tiyyinj gobe al kura Al Kurun belen hoy yiryen mar kurun goke tenj binja tiyyinj. Ningeb binja tiyyinj gobe denya fonentinj yagoya al gisaw hanj mar goke mananj nurde tiyyinj,” yinyinj.

⁴⁰ Irde saba minj unjkurenj goyen po ma yiryinj. Saba kurayen kurayen yirde hayhay yirde gaha yinyinj: “Ga hite nalure gayenbe mata bulunj kurunj forok yenj hi. Ningeb mata bulunj goyen yenenj yilwa yirnayinj. Gogab Al Kurunyen bearar go ma kennayinj,” yinyinj.

⁴¹ Be, al buda gobe Pitayen mere goyen fudinde yenj nurdeb Yesu ninj dufayminj sanjin irdeb baptais taminj. Goyare al tinjen baptais taminj marbe 3,000 gwahade forok yaminj. Irdeb mel hakotkenj goya tumnanj Yesuyen alya bereya haminj.

⁴² Be, go tiyaminj mar gobe yende aposel buda gote saba goyen huginenj tenj hinhan. Irdeb huginenj awalikde po henj kadam faranj gurd tenj hinhan. Irde Yesu kamenja komatminj yagoya binje nene yenj kamde kamde ninj mere yiryinj goyen binj bak yenj yenj ge binje kadam gunenj tenj awalikde nene hinhan. Irdeb huginenj Al Kurun

mere irde hinhan.

Yesu niŋ dufaymiŋ tareŋ irde hinhan marte mata igiŋ

⁴³ Be, aposel buda belen mata tiŋen kurayen kurayen forok yirke al tumŋaŋ goyen yenenbe hurkunŋat teŋ kafura hamiŋ.

⁴⁴ Irdeb Yesu niŋ dufaymiŋ tareŋ irde hinhan marbe tumŋaŋ gabu irde awalikde heŋ det kadam gunen teŋ hinhan.

⁴⁵ Gwaha teŋ henyaŋbe dawetmiŋya samuŋmiŋ yago al belen damu teŋ hikeb muruŋgem yade diŋuŋ yago det kuraŋ nurkeb faran yurde hinhan.

⁴⁶ Mel gobe hugiŋen giŋe haŋka Al Kurunyen ya balem koya belen po milgu irtiŋ bana sawsawa al gabu irde hanyende gor gabu irde hinhan. Irdeb kurate yayan gabu muŋken muŋken irde hinhan. Gwaha teŋ henbe Yesu kamenya komatmiŋ yagoya funaŋ dula teŋ yen kamde kamde niŋ mere yiryiŋ goke dufay heŋ dula teŋ hinhan. Biŋde mat fudinde wor po kadam niŋ dufay heŋ tumŋaŋde aman heŋ gwaha teŋ hinhan.

⁴⁷ Irdeb Al Kurun turuŋ irde hinhan. Be, mata kurun goyen teŋ hikeb Yerusalem hinhan mar gore igiŋ nurde yunen turuŋ yirde hinhan. Irkeb Al Kurun belen hugiŋen giŋe haŋka al tiŋen yawaŋ Yesu gama irde hinhan mar hitte gabu yirde hinhan.

3

Pita belen al kahaŋ simsimam sope iryiŋ

¹⁻² Be, goyare goyenbe al kura kahaŋ simsimam miliŋ belen gwahade po kawaŋ kiryiŋ goyen al

belen huginen tukunbe Al Kurunyen ya balem milgu irtin koya gote yame kura goyenter kerde hinhan. Yame gote denjembe “Yame kusamun” inen hanjen. Gor keperde hikeb alya bereya Al Kurun dolon irnin yen wakeb hora kanan yirde hinhan. Be, 3 kilok wawunbana kura Al Kurun mere ird ird nalu hekeb Pitaya Yonyabe Al Kurunyen ya balemde kwaryum.

³ Be, Pitaya Yonya gobe hako ga yamere hurkuren tikeyabe al kahan simsimam goreb hora nin kanan yiriyin.

⁴ Irkeb irem gore tumnande huwarde kiminde kenenbe Pita belen, “Deyya ga dena,” iniyin.

⁵ Gwaha inkeb det kura wet nunyen tahar yenbe kotan kan yinyin.

⁶ Gega Pita belenbe, “Nebe horanem mon wor po. Goyenpoga det kura ne hitte hi goyen gunen tihim geb, Nasaret nin al Yesu Kristuyen denjemde ginhem, huwarde kwa!” iniyin.

⁷ Gwaha inenbe yen belen po al goyen hanin yase belen tanarde isan hirin. Irkeb goyare po kahan huwa hen sanin haryum.

⁸ Irkeb huwardebe solok solok yen kun wan tiyyin. Irdeb Pitaya Yonya irde tumnan Al Kurunyen ya balem koya belen po milgu irtin bana sawsawa al gabu irde hanyende gor hurkunbe kun wan ten solok solok yen Al Kurun turun iryin.

⁹ Be, al go kun wan ten Al Kurun turun irde hikeb al gor hinhan gore al go kenen

¹⁰ bebak tenbe, “Ey! Al gabe kahan simsimam, yame denjem Yame kusamunde gor keperde hiyen al go goyen gago,” yen hurkunkat ten dilin fot

yaminj.

Pita belenj Al Kurunyen ya balemde mere tagalyinj

¹¹ Be, al goreb Pitaya Yonya yubul titek ma irkeb irem go gama yirde Al Kurunyen ya balem koya belen po milgu irtinj bana sawsawa al gabu irde hanjende gor kwaminj. Gasunj gobe “Solomonyen Paranda”^{*} inen hanjen. Irkeb al gor hinhan gore kenenj hurkunjat tenbe yenj hitte kup yenj kwaminj.

¹² Irkeb Pita belen al yenj hitte wanj hike yenenbe gaha yinyinj: “Denj Israel mar, al iginj hihi gayen kenenj goke hurkunjat tenj diltinj fot ma yenayinj. Deyya gabe Al Kurunj dilingde al iginj ningeb, gore al kahanj simsimam gayen sope irhar yenj denen hanj? Monj! Deyyat tarenjdebe epte monj geb.

¹³⁻¹⁵ Ningeb ga nurnanj ko. Yesube Al Kurunyen Meten Al, Al Wukkenj, irde Al Huwak wor po. Gega denj belenj iginj ma nurd unenbe mayke kami yenj tukunj Pailat haninde kerdeb pel iran. Irkeb Pailat belenj tubul timeke kwi yekeb denj belenj kamyen po yanj. Irdeb al kura al gasa yirke kamtinj al goyen tenj sinja irke kat kuyenj yanj. Gwaha tenbe Al Kurunya huginjen henj henj gote belenj kerd duntek albe gogo mayanj. Gega hakwanininj Abraham, Aisak, Yekopya, asinininj yagoyat Al Kurunj belenbe kamunde mat isanj

^{*} **3:11:** Solomonyen Paranda: Al Kurunyen ya balem kurunj gote ya murunj sobam sinja sinja kutinj hinhan. Ya murunj gobe tola karkuwanj yimiytinj hinhan. Ya sinja kurhanbe “Solomonyen Paranda” inenj hinhan gogo.

henbe al belen turun irde hinayin yen al denem turun yan wor po irun. Ningeb Yesu kamunde mat huwarun gobe dilyninin bilminde wor po kintin geb, gago momon dirde hite.

¹⁶ Deyyabe Yesu nin hekken nurde har geb, al kahan simsimam kenen hinhan gago kahan huwa hen taren hihi. Deyyabe Yesuyen sanjin belen gab al ga sope iryen yenbe yen ge hekken nurde har gore al gago kenkela wor po sope ira kenhan,” yinyin.

¹⁷ Irde sopte gaha yinyin: “Be, kadne yago, den wor doyan martin belen tiyan gwahade goyen po Yesube al gwahade yen min kenkela ma nurdeya bulun iran yen nurde hime.

¹⁸ Gega gobe bikken Al Kurun belen kame Mesaia minbe ulin misin kurun katen kamyen yen mere basan marmin yinke tagala min geb, gwahade goyen po forok yiyun.

¹⁹ Ningeb mata buluntin yubul ten Al Kurun hitte mulgan henayin. Irkeb Doyan Al Kuruninin belen mata buluntin halde dunenbe tontin taren yiryen.

²⁰ Irde kamebe Yesu, Mesaia bikken den ge ten basina iryin goyen ten kerke katyen.

²¹ Gega yenbe gayenterbe Al Kurunya har. Be, kun kun Al Kurun belen det kurun gayen yirde gergen yire yeke gab katyen. Mata gabe bikken Al Kurun belen mere basan marmin dilinge wukken wor po yenen hinhin goyen momon yirke tagala min.

²² Be, bikkenbe Mose belen Yesu nin yen Israel mar gaha yinyin: ‘Doyan Altin Al Kurun belenbe

mere basan almin kura ne yara po den minde nin forok iryen. Ningeb al gore mere dirde hiyen kurun gobe kenkela nurde gama irde hinayin.

²³ Al kura yende mere ma nurde hiyen al gobe Al Kurun belen bin arnen nurd yunke go mar gobe yende al ma henayin, yirin,” yinyin.

²⁴ Irde sopte gaha yinyin: “Irde Al Kurunyen mere basan al, Samuelya, mere basan mar kame kame wan hinhan kurun gore wor mata kurun gayenter forok yen han gake gwahade po forok yenayin yen bikken tagalde hinhan.

²⁵ Ningeb Al Kurunyen mere basan marmin belen gwahade tagalde hinhan gobe den ge ten tagalde hinhan. Irde den ge tenbe Al Kurun belen Abraham dilingde bin tenbe, ‘Kame fonenge kura forok yiyyen gore megen nin al buda kurun gayen nere guramya tarenya ten ten hiryon hiyyen,’ inyin. Be, bin tiyyin gwahade po Al Kurun belen asetin wen hitte wor bin ten hinhin gobe den ge ten bin ten hinhin.

²⁶ Ningeb den ge tenbe Al kurun belen guram dirde sanin dirke mata buluntin goyen yubul tinayin yen nurdeb meten almin basina irde ten kerke den hitte wa wayyin,” yinyin.

4

Pitaya Yonya yade koyare yeramin

¹⁻² Be, Pitaya Yonya belen Solomonyen Paranda inen hanyende gor hinaryumya goyenbe gor gabu iramin mar goyen Yesu kamde huwaryin mere goke momon yirde hinaryum. Gwaha ten henyabe Yesu tiyyin gwahade goyen po al kamtin

manan kame huwarnayin yen mel goyen saba yiraryum. Gwaha ten hikeb Al Kurun dolon ird ird mata doyan mar pris budaya, Al Kurunyen ya balem kurun gote doyan marte kurunminyabe Sadusi marya belen* wan mere go nurdeb bin ar yamin.

³ Irkeb mel gore Pitaya Yonya yad merere yertek yen yawaramin. Gega bikken wawun hirin ningeb, gise ga yenbe yad koyare yeramin.

⁴ Gega irem gote mere nuramin marbe budam wor po mere goyen fudinde yen nurde Yesu nin dufaymin tarej iramin. Irkeb al yen wa Yesu nin dufaymin tarej iramin mar bikkek goyabe gayamunkek goya gabu irde al parguwak po kapyan haminbe 5,000 gwahade hirin.

Pitaya Yonya mere kurunde hararyum

⁵ Be, fay urkeb Yudia nanare nin doyan marya Yuda marte doyan mar parguwakyabe Moseyen saba basan hen tagal tagal marya belen irem gote mere nurnin yen Yerusalem gor gabu iramin.

⁶ Gabu iraminde gorbe Al Kurun dolon ird ird mata doyan mar pris buda gote karkuwanmin Anas, Kaiafas, Yonya, Aleksandaya, irde Anas gote taynen wen hoyan manan gor gabu iramin.

⁷ Be, mel gore Pitaya Yonya yawanbe yen ge igin ma nurde yunenya, “Ganun belen igin dinkeb mata gogo tiyarun? Ganunde saninde gogo tiyarun?” yen gusunon yiramin.

⁸ Irkeb Pita gobe Holi Spirit belen hard unkeb wol henbe gaha yinyin: “Be, den Yuda marte

* **4:1-2:** Sadusi mar: Al kamtin sopte huward huward goyen fudinde yen ma nurde hinhan mar.

doyan marya doyan mar parguwakya, ga nurnan ko!

⁹ Denbe al kahan simsimam faran uryeke igin hiyun goyen goke mun ten merere derde daha mat igin hiyun gote min nurnin yen gusunjan dirhan?

¹⁰ Ningeb denya Israel mar hoyan manan tumnan mere tiyen tihim gayen ga nurde bebak tinayin. Be, al kahan simsimam gabe Nasaret nin al Yesu Kristu den belen mayke kamun gega, Al Kurun belen isan heke huwarun al gote tarende igin hiyun. Ningeb diltin mat huwarke gago kenhan.

¹¹ Yesu nin ten Al Kurunyen asandebe siraw mere mat gahade katin hi:

‘Den, ya ird ird mar belen ya irnin yen hora kura tawayamin gega, igin ma kenenbe temeyamin.

Goyenbe al hoyan belen tukun gore po yamin taren wor po iryin,’ yitin hi. *Tikin 118:22*

Ningeb hora gwahade goyenbe den belen Yesu gogo pel iran. Gega Al Kurun belen ten meten kurun wor po unun.

¹² Ningeb Yesu po ga nen mata bulunde mat dumulgan ten ten sanin goyen Al Kurun belen unun. Ningeb megen nin al kura belen epte ma Al Kurun hitte alya bereya yumulgan tiyyen,” yinyin.

¹³ Be, gor gabu iramin mar goreb Pitaya Yonyabe saba kurun ma titin, irde al denem mon yen nuramin gega, ‘Nen ge kafura ma hen mere taren po tagalde har,’ yenbe hurkunat tiyamin. Irde irem gobe Yesuya tumnan hen kun wan

tenj hinhan mar goyen kurabe gago yenj bin bak yaminj.

¹⁴ Irde al kahanj simsimam goyen iginj henj Pitaya Yonya irde tumñan huwarde hike kenenbe Pita belenj mere tiyyinj goyen wol henj henj ge kukuwamñen nuraminj.

¹⁵ Irdeb mere tenj tenj gasunde matbe yakira tike belñen munj po sinjare kukeb yingenj ulinj mere sege irde gaha yaminj:

¹⁶ “Al irawa gabe daha yirtek? Al buda kurunj Yerusalem taunde hanj kurunj gobe irem gore mata tinenj wor po goyen tike kenanj. Nenj wor mata forok yiyunj gote iginenbe kenhet gago ninjgeb, epte ma ‘usi’ yetek.

¹⁷ Gega mata forok irarunj gote mere momonbe kurunj henj kuke al nurde pasi henayinj goke iginj ma nurde hite geb irem goyen, ‘Sopte Yesu inenj hanyen al goke tagalkeb muduntek,’ yinenj utanj yirtek,” yaminj.

¹⁸ Gwaha yenbe irem go sopte hoy yirke wakeb, “Derbe al hoyanj hitte kunj Yesu ninj ma wor po tagalde saba yiriryen!” yenj mere tarenj po yirdeb utanj yiraminj.

¹⁹ Gega Pitaya Yonya belenj wol henbe, “Al Kurunbe da mata ninj iginj nuryen? Yende mere gama irtek ma dende mere gama irtek? Goyen dindikenj dufay henanj ko.

²⁰ Munanj deyyabe Yesuyen mata delderer yenenj mereminj nurde tiyaryum goyen tagal tagal ninj epte ma wor po bada hereñ,” yinaryum.

²¹⁻²² Gega al kahanj simsimam milinj belenj gwa-hade po kawanj kiriyinj, damam 40 fole irtinj goyen

Pitaya Yonya belen Al Kurunyen saninde sope iraryum goyen al budam wor po go kenenbe Al Kurun turun iramin geb, Yuda marte doyan mar belen goyen nurdeb gwaha mat kura irem goyen bulun yirtek mon hamin. Ningeb dulin mohannde po kafura mere yirde yubul tike kwaryum.

Yesu nin dufaymin taren irde hinhan mar belen Al Kurun mere iramin

²³ Be, Pitaya Yonya gobe yubul tike mulgan hen dinun yago hitte kwaryum. Irdeb pris buda gote karkuwanminya Yuda marte doyan mar parguwakya belen mere yiramin goyen tumnan dinun momon yiraryum.

²⁴ Irkeb mere goyen kanduknen nurdeb tumnannde Al Kurun ugun po gahade inamin: “Doyan Al Kurun, ge belen po naninyin megenya makanya yirdeb dawet bana gon han kurun gayen yirarin. Irde doyan yirde ha.

²⁵ Ge belen mere tike meten alge asininin Dewit gore Holi Spirityen tarennde merege nurde basan hen gaha yirin:

‘Danin megen nin marbe yen ge bearar ten han? Irde danin dufay bulun kukuwamnen po yerde mere mayde han?’

²⁶ Megen nin doyan mar karkuwanya nana ga doyan irde han mar wan gabu irdeb Doyan Al Kurun asogo irde han.

Fudinde, al buda kurun gobe bikken Al Kurun belen basina irde olip fimin tonande sam irtin Al goyen gogo asogo irde han,’ yirin.

Tikin 2:1-2

²⁷ Ningeb, fudinde, Dewit belen mata goke yirin gwahade goyen po forok yiyun. Yesube ge belen bikken Mesaia inen basin irarin. Gega Israel nana doyan al Herotya Roma gabmanyen al Pontius Pailatya belen Yesu, gere Meten Al, delger wukken wor po kenen hayen al goyen asogo irtek yen Israel mar Yerusalem bana gan han goya al min hoyan Yuda mar monya gabu irde mere mayan. Irdeb mayke kamun.

²⁸ Goyenbe mata gobe mali ma forok yiyun. Mel buda gore gwaha tinayin yen dufayge bikken kerarinyen geb, gogo gwahade po forok yiyun.

²⁹ Ningeb Doyan Al Kuruninin, Yesu nin tagalde hite goyen utan dirnin yen mel gore kafura dirde han gabe yenen ha. Ningeb nen meten marge sanin dirkeb mel goke kafura ma henbe igin merege tagalde tukutek.

³⁰ Irde Yesu, gere Meten Al, delger wukken wor po gote denemde garbam mar sope yirde, mata tinen kurayen kurayen forok yirde hitekeyab tarenge kurun goyen alya bereya yikala yirde hayin.” inamin.

³¹ Be, Pitaya Yonya irde gabu iramin mar belen Al Kurun mere irde pasi irkeb goyare po Al Kurun belen wol henbe mel go hinhan gasun goyen ansok iryin. Irkeb gor hinhan mar gobe tumnan Holi Spirit belen hard yunkeb Al Kurunyen mere tagal tagal nin kafura ma henbe tagalde kun hinhan.

Yesu nin dufaymin taren irtin marbe detmin kadam gunen ten hinhan

³² Be, Yesu nin dufayminj sanij irde hinhan mar gobe tumnanj dufayminja mataminja unjukan po haminj. Irdeb al kura belen, “Detne kurun han gabe nere kudinjen mon,” yen hinhan, irde detmin kurun goyen yingen ulin kadam gunen ten hinhan.

³³⁻³⁵ Be, aposel buda belen Yesu kamyinde mat huwaryin goyen Al Kurunjen tarende tagalde hike al belen fudinde yen nurde hinhan. Irde al tumnanj megen minjanya ya minjan marbe al belen damu tikeb murungem goyen aposel hitte yawan haniinde yerde hinhan. Irkeb aposel belen al kura det kurun amu hen hinhan mar tumnanj gale hen yunen hinhan. Gwaha ten hikeb al kura det kurun ma amu hen hinhan. Be, Al Kurun belen yen gama irde hinhan mar goyen mata gwahade ten hikeb guram yirde igin igin wor po yirde hinhin.

³⁶⁻³⁷ Be, al kura, denjembe Yosep manan megen tapumminj kura al belen damu tike murungem goyen tawanbe aposel buda yunyin. Yenbe Liwai mar al, irde Saiprus motmotde nin al. Aposel buda belenbe Banabas inen hinhan. Deje gote minbe, “kadam faran yurde taren yird yird al.”

5

Ananiasya Safiraya

¹ Be, al kura denjembe Ananiasya berem Safiraya manan megen tapumminj kura al belen damu tikeb murungem taryum.

² Gega ire unja gobe hora goyen tumnan Yesuyen mere basan mar aposel buda haniinde

kertek ma yirkeb goke sege irdeb hora kurhanbe yingen ge basina irdeb un belen kurhan po tawanbe, “Megen gote murungembe gago po,” yen aposel buda haniinde kiryin.

³ Irkeb Holi Spirityen saniinde Pita belen bebak tenbe, “Ananaias, daniin geb Satanyen dufay po gama irde hora kurhanbe gigen ge bana kerdeb tumnan gago po tawayhem yara ten Holi Spirit usi irha?

⁴ Megenge goyen damu ma tikeyabe gere hinhin. Irde damu tike murungem wor gere po. Ningeb hora go ten dufayger det kura ire yenbe gwaha irtek yara. Gega da belen wor po girkeb dufay goyen forok yekeb mata bulun gogo taha? Usi taha gobe al ma usi yirha, Al Kurun usi irha geb,” inyin.

⁵⁻⁶ Irkeb Ananaias gobe mere goyen nurdeb goyare po kamde katyin. Irkeb al fonen kura gor hinhan gore wanbe al hakwa go mala ten tukun mete tiyamin. Be, Ananaias belen Holi Spirit usi irde goke mun po kamke kenamin marya mere momonmin nuramin marya tumnan tulfut yen kafura hamin.

⁷ Be, 3 awa gwahade kamereb berem Safira gobe un hitte mata gwahade forok yihi yen ma nurdeya Pita hinhin ya binde gor hurkurin.

⁸ Irkeb Pita belenbe, “Safira, momon nira. Megentirinde murungembe gago po we?” inkeb, “Gwaha, tumnan gago po,” inyin.

⁹ Irkeb Pita belen wol henbe, “Dahade ningeb derbe tumnande mere sege irdeb Doyan Al Kurunyen Holi Spirit tunan urhar? Almege tukun mete tahan marbe yamere gogo forok yahan

yenha. Niñgeb ge wor gade kunin tahan geb,”
inyin.

¹⁰ Irkeb goya goyen po Pitayen kahan minde gor
po katen kamyin. Be, un tukun mete tiyamin mar
gore wan hurkunbe berem wor kamtin kenenbe
tukun un ketalde po mete tiyamin.

¹¹ Be, ire unya go hitte mata forok yirin gote
mere momon nurdeb Yesuyen alya bereya sios
gobe tumnan kafura wor po hamin. Yesuyen alya
bereya mon wor gwahade po kafura hamin.

*Aposel buda belen garbam mar budam sope
yiramin*

¹² Be, aposel buda belen mata tinen Al Kurun
belen po forok yirtek goyen al hitte budam forok
yirde hike dilin fot yen hinhan. Irde Yesu nin
dufaymin taren irde hinhan marbe tumnan du-
faymin unkurun po kerde Al Kurun dolon irnin
yen al wan gabu irde hanjen gasun kurun kura
“Solomonyen Paranda”^{*} inen hanjende gor gabu
irde hinhan.

¹³ Be, Yerusalem taunde hinhan mar goyen
tumnan Yesu nin dufaymin taren irde hinhan
mar goke tagalde turun yirde hinhan. Gega go
mar goyen hitte mata forok yen hinhan goke
kafura henbe al kura yenya awalik hen hen ge
kama hen hinhan.

^{*} **5:12:** Solomonyen Paranda: Al Kurunyen ya balem kurun
gote ya murun sobam sinja sinja kutin hinhan. Ya murun gobe
tola karkuwan yimiytin hinhan. Ya sinja kurhanbe “Solomonyen
Paranda” inen hanjen gogo.

¹⁴ Gega alya bereya tinen belen Doyan Al Kurun nin dufaymin sanin irdeb budam forok yen hinhan. Irkeb Yesuyen alya bereyabe budam wor po hamin.

¹⁵ Irde aposel buda belen mata tinen kurayen kurayen ten hinhan goyen yenen hinhan geb, garbam minyan mar sapirte yawan belenyan yerde hinhan. Kurabe yawan gasun ugamde yunke goyan ferde hinhan. Gwaha yirteke gab Pita wan belen goyan kun henryabe hanin yerde yuni yenbe gogo ten hinhan. Munan kurabe Pita tonen belen po awrum yurke igin henayin yen nurde ten hinhan.

¹⁶ Irkeb tiyun budam Yerusalem binyan binyan nin mar gore garbam marya al ungura ketal yurtin minyan mar goyen aposel buda hitte yawan hike sope yirke tumnan igin hen hinhan.

Aposel budabe kanduk kenamin

¹⁷ Be, pris buda gote kurunminya yen faran urde hinhan mar Sadusi budaya belen, 'Nen fole dirnin tahan,' yen bin ar yekeb aposel buda nin igin ma wor po nurdeb yade gasa yirnin yen mere sege iramin.

¹⁸ Irdeb aposel buda goyen yade kawe marya mata bulun ten hinhan marya yerde hanjen koyare gor yeramin.

¹⁹ Gega wawunbe Doyan Al Kurunyen miyon belen kunbe koya gote yame fegelde sinare yukurin.

²⁰ Irdeb, "Al Kurunyen ya balemde kunbe al buda kurun goyen al kura Yesu nin dufaymin taren iryenbe Al Kurun dilingde al gergen hen hen

mata goyen goke kenkela po tagalnayin,” yinen hulyan yiriyin.

²¹ Be, miyon belen yinyin goyen nurdeb fay urkeb Al Kurunyen ya balemde kunbe alya bereya saba yird yird min uramin.

Be, goya goyenbe pris buda gote kurunminya yen faran urde hinhan marya gore aposel buda goyen daha yirnin yen Yuda marte doyan mar parguwak tumnan hoy yirke wan gabu iramin. Irdeb mel go koyare yeramin goyen yawan merere yirnin yenbe al hulyan yirke kwamin.

²² Gega kun forok yen nankenaminbe aposel buda gobe gor ma hinhan.

²³ Gwahade kenenbe mulgan hen kunbe, “Koya yamebe sinja mat taren irtin, irdeb ya gote doyan marbe tumnan gor han. Goyenbe yame fegelde hurkun nankenhet gega, gorbe al minmon. Hubu wor po!” yinamin.

²⁴ Irkeb pris buda gote karkuwanminya Al Kurunyen ya balem doyan irde hanyen marte kurunminya belen mere momon go nurdeb, “Aposel budabe daha tahan? Irdeb kamebe da mata forok yiyyen?” yen naknak tiyamin.

²⁵ Be, gwaha ten hikeb al kura wanbe, “Mel, ga nurnan. Al yad fere tiyan mar gobe Al Kurunyen ya balem bana gon alya bereya saba yirde hike yenhem be!” yinyin.

²⁶ Irke ya balem kurun gote doyan marya kurunminya gore mere go nurdeb kun aposel buda go yad wayamin. Goyenpoga al buda kurun meremin nurde hinhan mar gore yen ge hen hora kaka dirnak yenbe ohkohom po Israel nana

doyan mar tumṇaṇ gabu iramiṇ gasuṇde gor yawayamiṇ.

²⁷ Be, aposel buda go yawaṇ diliṇde yirkeb pris buda gote kurunṁiṇ gore biṇ ar hende gaha yinyiṇ:

²⁸ “Yesu belen alya bereya ne niṇ saba yirde hinayiṇ dinuṇ goyen bada po henayiṇ yeṇ utaṇ dirtiṇ. Gega parsay heṇ Yerusalem taunde gar kawanyaṇ po mere tagalde tukun hikeb al budam nurd pasi hahan. Gwaha tenbe Yesu kamun gobe yeṇ belen po mayan yeṇ miṇge dirniṇ ten han?” yinyiṇ.

²⁹ Irkeb Pita belen kadam yagoya huwarde wol heṇbe, “Nenbe Al Kurunyen mere po gama irtek. Dende mere ma nurtek geb!

³⁰ Be, ga nurnan. Deṇ belen Yesu kuruse hende mayke kamun. Goyenbe neṇ Israel marte asininiṇ yagot Al Kurun belen kamtiṇde mat isan hiyun.

³¹ Irde yingen hitte tumulgan ten saniṇ unenbe denem yan kurun wor po irdeb, neṇ al gayen ga Dumulgan ten ten Al irun. Goyenbe neṇ Israel mar kurun gayen mata bulun yubul ten yeṇ ge bininiṇ mulgan heke mata bulunṁiniṇ halde dunen yeṇ nurdeb gogo tiyun.

³² Niṇgeb neṇbe Yesu hitte mata forok yitin goyen dilniniṇde yenenbe gago kawan tagalde hite. Irde Holi Spirit manan bebak tinaṇ yeṇ dikala dirde hi. Be, Holi Spirit gobe Al Kurun belen yende mere gama irde han mar goyen tumṇaṇ yunen hi,” yinyiṇ.

Gamaliel belen aposel buda nin igin mat tagalyin

³³ Irkeb meremin nuramin mar gobe bin ar yekeb, 'Fudinde wor po, aposel buda gayen gasa yirteke kamwon,' yen nuramin.

³⁴ Be, gabu iraminde gorbe Yuda marte tikula sanin po gama irde hanjen Farisi mar al kura denjembe Gamaliel goyen gor hinhin. Yenbe Mo-seyen saba basan hen tagal tagal al. Al gobe al budam palap irde hinhan. Be, al gore huwardeb, "Aposel buda ga belnen po sinare yukunan," yinkeb gwaha yiramin.

³⁵ Irkeb gabu iramin mar goyen gaha yinyin: "Mel, Israel mar, al buda gayen ga daha wet kura yirnin yenbe kenkela dufay hen ga mata tinayin.

³⁶ Nalu kura hakot yara po mata kura forok yiyun goyen bitin sir yan? Al kura denjem Teudas belen, 'Nebe al denne yan,' yekeb al 400 gwahade belen gama irde hinhan. Gega go al goyen maykeb yen gama irde hinhan mar gobe bur yekeb hubu po hiri.

³⁷ "Be, Teudas kamereb nen Israel marte deninin kapyan hen tumnan asande kerd kerd nature Galili nin al kura denjem Yudas belen, 'Roma gabman asogo irnin,' yinen al usi yirke gama irde hinhan. Gega yen wor mayke kamkeb yen gama irde hinhan mar goyen wor bur yamin.

³⁸⁻³⁹ Ningeb gwahade goyen po aposel buda belen mata ten han gayenbe dufayminde po ten han kenem metenmin gobe hubu hiyyen. Munan Al Kurunyen dufay gama irde ten han kenem den belen, 'Bada henan,' yinnayin gega, epte ma

meretiñ nurnayin. Monço al buda gayen asogo yirhet usi tenbe Al Kurun asogo irnayin geb. Goke tenbe dinhem gago. Mel gayenbe okohom po yubul tike kunayin,” yinyin.

Aposel budabe Yesu nin ten kanduk yenamin goke amanen nuramin

⁴⁰ Irkeb al buda gor hinhan mar gore, ‘Mere dira gabe fudinde,’ yen nuramin. Irdeb aposel buda go sopte hoy yirke wakeb gabu iramin gote kurunmin belen, “Yesu gore yingen ge al saba yirde hinayin dinun gobe sopte ma po tagal-nayin,” yinen utan yirdeb fuleña marmin yinkeb al gasa yird yird kan po yusulak tenbe yakira tiyamin.

⁴¹ Irkeb aposel buda goyen mere gasun go tubul ten kun henya, “Nenbe Al Kurun belen Yesuyen al wor po yen nurd dunen hi. Ningeb Yesu nin ten ulninin misin katehet gago,” yen amanen wor po nuramin.

⁴² Irdeb al saba yird yird nin bada ma hamin. Huginen gise hança Al Kurunyen ya balemde gor kun mere igin Yesube Mesaia yitin goyen mere kawan po tagalde kun hinhan. Irdeb almet yayan wor gwahade po ten hinhan.

6

Yesuyen alya bereya sios faran yurd yurd meten nin al 7 basina yiramin

¹ Be, gwaha ten hinhan goyenterbe Yesu nin dufaymin taren irde hinhan marbe budam forok yen hinhan. Goya goyenbe Yerusalem nin Yuda mar yingende mere ten hitin belen gise hança

beretap bingge gale hen yunen hinhan. Goyenbe yende beretap po yunenbe, Grik mere ten hitin beretap gobe yubul ten hinhan. Irkeb Yuda mar Grik mere ten hitin goreb goke igin ma nurdeb tiyun min mar goya kadam mohannde tiyamin.

² Goke tenbe Yesuyen mere basan mar aposel buda 12 gore Yesuyen alya bereya sios tumnan gabu yirdeb gaha yinamin: “Nende metenbe Al Kurunyen mere tagalde tukun tukun. Ningeb bingge gale hen hen goke ten meteninin wor po goyen harhokninin untek gobe igin mon.

³ Ningeb kadinin yago, den gabu irde han bana gon nin al 7 kura dindiken basina yirnayin. Goyenbe mel gobe Holi Spirityen saninde wor po meten ten hanyen, irde Al Kurun belen dufay igin yunen hike meten ten hanyen mar goyen po basina yirnayin. Irkeb bingge gale hen hen metenbe mel gore ten hinayin.

⁴ Gogab nenbe Al Kurun mere ird irdya meremin tagal tagal nin po dufay hetek,” yinamin.

⁵ Be, gwaha yinkeb al buda kurun gob amanen nurdeb al 7 basina yiramin. Denembe Stiwen, Filip,* Prokorus, Nikanor, Timon, Parmenasyabe Antiok taunde nin al Nikolasya. Nikolas gobe al min hoyan gega, Yuda marte tikula gama irde Yuda mar al hirin. Munan Stiwenbe Yesu nin hekken wor po nurde hinhin, irde Holi Spirityen tarende po meten ten hinhin.

⁶ Be, al buda gwahade basina yirdeb aposel buda hitte yukamin. Irkeb al 7 gobe sios faran

* **6:5:** Filip gabe Yesuyen aposel 12 bana kura gogo mon, al hoyan.

yurd yurd niŋ yade yapat yiramiŋ goyen goke tonan hende haniŋ yerde Al Kurun belen faran yurde hiyen yen gusunan iramiŋ.

⁷ Be, Al Kurunyen mere Yesu niŋ yitiŋ gobe Yerusalem taun kurunde gor niŋ mar belen tumnan nurde tukamiŋ. Irkeb Yesu niŋ dufaymin taren iramiŋ marbe aran po budam hamiŋ. Be, Al kurun doloŋ ird ird mata doyan mar wor budam Yesu niŋ dufaymin sanŋ iramiŋ.

Yuda mar belen Stiwen fere tiyamiŋ

⁸ Be, sios faran yurd yurd niŋ basiŋa yirtin al kura Stiwen gobe Al Kurun belen kenkela po guram irde taren kurun unkeb al budam diliŋde mata tiŋen kurayen kurayen Al Kurun belen po yirtek goyen forok yirde hinhan.

⁹ Gega Yuda mar kurabe Stiwen niŋ igiŋ ma nurde wan kwep kwep iramiŋ. Be, gwaha iramiŋ marbe “Doyan Mar Minmon Mar”[†] yinen hinhan. Mel gobe yingenŋde gabu yare po gabu irde Yuda marte tikula po nurde hinhan. Yenbe Sairini taunya Aleksandria taunyare mat wayamiŋ. Kurabe Silisia nanaya Esia nanayare mat wayamiŋ. Be, mel goreb wan Stiwen gogo merere fulenŋa iramiŋ.

¹⁰ Gega Stiwenbe Al Kurunyen Holi Spirit belen faran urkeb kenkela po dufay henya mere yirke

[†] **6:9:** “Doyan Mar Minmon Mar” gabe bikken al hoyan belen yukuŋ meten marmiŋ yirde hinhan. Goyenbe murungem mon meten ten hinhan. Irde dufayminde kun wan titek mon. Doyan marmiŋyen mere po gama irde meten ten hinhan. Goyenbe doyan marmiŋ belen yubul tike dufayminde kwamiŋ goke tenbe denje gwahade yurde hinhan.

asogo irnin yen wayamin mar goyen gwaha mat kura wol hetek yen ma nuramin.

¹¹ Irkeb mel gore al kura balminde hoy yirdeb, “Den belen kunbe, ‘Stiwen belen Moseya Al Kurunya sukal yirke nurtin,’ yen al momon yirde tukunayin,” yinen bin yawaramin.

¹² Irkeb kunbe gwahade po tagalkeb Yuda marte doyan mar parguwakya Moseyen saba basan hen tagal tagal maryabe al buda gote mere go nurdeb bin ar yamin. Irdeb Stiwen fere tenbe mere yare tukamin.

¹³⁻¹⁴ Irdeb merere gor usi titek yen al kura yawaramin gore huwardeb, “Al garebe, ‘Nasaret nin al Yesu belen Al Kurunyen ya balem gayen pir iryen, irde Mose belen mata ten hinayin yen dunyin goyen wor yade hoyan hoyan yiryen,’ yeke nurtin. Al gabe ya balem gaya Yuda marte tikula goyen wor gwahade po huginjen sukal yirde hiyen!” yinamin.

¹⁵ Irkeb merere gabu iramin mar gob Stiwen belen daha mat wol heke nurnin tihit yen tumnan her yen kenamin. Irkeb Stiwen kiminbe al bulak wor po Al Kurunyen miyon yara heke kenamin.

7

Stiwen belen saba tiyyin

¹ Irdeb Al Kurun dolon ird ird mata doyan marte kurunmin belen, “Stiwen, mel gare mere ulger irde han gayenbe fudinde?” yen gusunjan iryin.

² Irkeb Stiwen belen wol henbe gaha inyin: “Mel, kadne yago, ga nurnan. Bikken wor pobe

hakwaniniŋ Abrahambe Mesopotemia naŋare hinhin. Goŋ po hikeya Al Kurun saŋiŋmiŋ turnun yaŋ gore diliŋde forok yeŋbe,

³ ‘Naŋageya tayge yagoya yubul teŋbe naŋa ne belen gikala gireŋde gor kwayiŋ,’ inyiŋ.

⁴ Irkeb Abraham gobe Kaldia marte naŋa Mesopotemia goyen tubul teŋbe Haran taunde kun gor hinhin.

“Be, naniŋbe gor kamkeb Al Kurun belen Abraham teŋ kerke Yudia naŋa ga hite gayenter wayyiŋ.

⁵ Gega Al Kurun belen megen tapum mun kura ma unyiŋ. Hubu wor po. Irde gor hinhinya goyenbe diriŋ wor hubu. Gega Al Kurun belen megen Abraham keperde hinhin gayen yenya foŋeŋmiŋ yagoya niŋ tubul teŋ yunmeke yende kudiŋe hiyyen yeŋ Abraham hitte biŋa tiyyiŋ.

⁶ Goya goyenbe gaha inyiŋ: ‘Foŋeŋge yagot diriŋe weŋbe almet naŋare kun albak hinayiŋ. Irkeb naŋa miŋ mar belen dama 400 gayen gasa yirde bulun bulun yirke meten muruŋgem mon teŋ hinayiŋ.

⁷ Gega foŋeŋge yago bulun bulun yirde hinayiŋ mar gobe ne gare gab yeneŋ. Go kamereb foŋeŋge yagobe naŋa go tubul teŋ waŋ megen gayenter doloŋ nirde hinayiŋ,’ inyiŋ.

⁸ Irdeb kame Al Kurun belen biŋa tiyyiŋ goke, ‘Ne biŋa teŋ himyen goyen fudiŋde yeŋ nurnayiŋbe geya foŋeŋge yagoyabe guba yeŋ yeŋ mata teŋ hinayiŋ,’ inyiŋ. Be, kamereb urmiŋ Aisak forok yiriŋ. Irkeb urmiŋ go kawaŋ hiriŋde mat kun naŋa fay 8 hekeb guba yeŋ unyiŋ. Be,

Aisakbe kame Yekop nanin hiriñ. Irdeb Yekopbe urmin yago 12 minyan hiriñ. Be, mel goreb hakwaninin yago hamin.

⁹ “Be, hakwaninin 12 kura Yosepbe nanin belen yen po amanen nurde igin igin irde hinhin. Irkeb itin yago belen daniñ nenbe gwahade ma dirde hi yen bin ar yekeb kulin Yosep nin igin ma nurdeb, ‘Al kura hitte kun murungem mon meten ten ten almin hiwi,’ yen al yunke damu tiyamin. Be, Yosep damu tiyamin mar gore tenbe Isip kwamin. Goyenbe Al Kurunbe yenya huginen hen faran urde hinhin.

¹⁰ Ningeb kanduk kurayen kurayen yenen hinhin gega, Al Kurun belen faran urde hikeb igin po hinhin. Irde dufay igin wukken wor po unkeb go hende mata ten hikeb Isip nin doyan al kurun Fero belen igin kinyin. Be, Fero belen Yosep go dufaymin wukken kenenbe Isip nan gote doyan al irdeb dawetmin yago tumnan, ‘Doyan yirde hayin,’ inyin.

¹¹ “Be, go kamereb Isip nanaya Kenan nanaya bana gonbe binde kamde kamde nalu kurun wor po forok yekeb hakwaninin yagobe bingem mon hamin.

¹² Be, Yosep nanin Yekop go Isip nanabe bingem yan mere momon nurdeb hakwaninin yago gogo yad yerke kwamin. Be, mel gobe Isip ma kun hanen. Tinen gog po ga kwamin.

¹³ Be, mel go Isip mat tiyunminde mulgan hamin. Hen henbe sopte Isip kukeb Yosep belen yingen ge, ‘Nebe al gwahade,’ yen itin yago momon yiryin. Be, Yosepyen min gote mere momon goyen Isip nin doyan al kurun wor nuryin.

14 “Be, go kamereb Yosep belen nanin Yekopya dirnen wenya asem yagoya 75 hinhan goke wanan yen keya heke wayamin.

15-16 Irdeb gor hinhan. Be, gor hen henbe Yekop go kamkeb hakwambe ten tiyunmin Sekem tukamin. Be, Sekem gorbe Hamor urmin yago belen al hakwam yerd yerd nin hora talde horabok yiramin goyen Abraham belen damu tiyyin. Ningeb Yekop hakwam gobe tukun gor po keramin. Irdeb kame hakwaninin 12 goyen wor kamkeb yukun gor po yeramin.

17 “Be, Al Kurun belen Abraham hitte bin tiyyin gote iginen forok yetek nalu hen hikeb nende al Isip hinhan gobe kurun bulun fuful tiyyin.

18 Goyenterbe al hoyan kura Yosep ma nurde untin al gore Isip nana gote doyan al kurun hirin.

19 Irdeb yingen igin hen hen ge po nurde asininin yago usi yirdeb bulun bulun yirnin yen nurdeb, ‘Dirinmin yago besare nin goyen yemeyke kamnan,’ yen patku yirde hinhin.

20 “Be, goya goyenbe Mose kawan hirin. Yenbe dirin mali yara mon. Al Kurun dilingde igin kinyin. Dirin gobe Isip mar belen kennak yen naninya milinya belen gagasi karwo gayen yamin bana po balmin kerde hinaryum.

21 Gega dirin gobe ya bana balmin kerde hitek ma hekeb naninya milinya belen tukun hoyande tubul tikeb Isip nin doyan al kurun Fero wirin belen kenen ten tukun yende irde mosoy heke kurun hirin.

22 Mose go kurun henyabe Isip marte saba

karkuwan kurayen kurayen yawaryiñ. Irde meremiñya metenminyabe tareñ wor po hiriñ.

23 “Be, Mose gobe kuñ damam 40 hiriñ. Be, wawuñ kurarebe diñuñ Israel mar yene yen kuriñ.

24 Kuñbe Isip al kura gore Israel al kura goyen buluñ wor po irde hike kinyiñ. Irdeb Israel al goyen farañ ure yenbe wol hen Isip al go mayke kamyiñ.

25 Be, Mose gobe dufaymindeb, ‘Mata tihim gayen kenenbe Israel mar belen Isip marte haniñde mat dumulgañ ten ten al Al Kuruñ belen basiña irtiñ albe gago yen bebak tahañ,’ yen nuryiñ. Gega gwahade moñ.

26 “Be, fay urkeb sopte Israel mar hitte kuriñ. Kuñbe Israel mar iraw kura yingen uliñ arde hike yinyiñ. Irdeb daha mat kura mere yirmekeb awalik hiri yenbe, ‘Irem, daniñ ditdigiren uliñ arde har? Derbe miñ unkuñ po geb!’ yinyiñ.

27 Goyenbe al kura kadom mayde buluñ wor po iryiñ al goreb Mose upel urdeb, ‘Ganuñ belen nende doyañ al gerde mere sope ird ird al giriñ?

28 Gwaha tenbe ki Isip al mayke kamuñ gwahade goyen po niren taha?’ inyiñ.

29 Irkeb mere go nurdeb Mose gobe Isip niñ al mayke kamyiñ goke busaharde Midian marte nañare kuriñ. Irdeb goñ albak henbe bere ten urmiñ irawa minyañ hiriñ.

30 “Be, Midian marte nañare kuñ dama 40 goñ hinhin. Be, dama 40 goyen kamereb Sainai dugu bindere sawsawa po kuruñ naña bana goñ kuriñ. Kuñbe he dirñen kura goyen kak melak hen

humga kutin yara ten hinhide gor Al Kurunyen miyon forok yeke kinyin.

³¹ Be, Mose gob goyen kenenbe din fot yeke bindere kun kenkela po kene yen kurin. Irkeb kak melak hinhide gor mat Doyan Al Kurunyen mere forok yeke nuryin.

³² 'Nebe Al Kurun, asige yago Abraham, Aisakyabe Yekopya belen dolo nirde hinhan al go goyen,' inyin. Irkeb Mose go kafura hen ulin barbar yeke kak melak goyen kente ma iryin.

³³ Irkeb Doyan Al Kurun belen, 'Ge huwarde hare gabe ne hime. Ningeb al mali watek mon, himam wor po. Ningeb kahanbasange go yugu tiya!

³⁴ Nere alya bereya Israel marbe Isip mar belen bulun bulun yirde han gobe yenen hime. Irdeb ulin misin bulun wor po katen han goyen nurdeb Isip marte yufukde mat yumulgan tiye yen katehem. Ningeb ga nura. Sopte Isip gumulgan timeke kwayin,' inyin.

³⁵ "Be, Mose gobe han kanya Israel mar belen pel irdeb, 'Ganun belen nende doyan al gerde mere sope ird ird al girun?' inke Midian marte nanare busaharyin al go goyen. Gega Al Kurun belen, 'Mosebe Israel marte doyan al hiyyen. Irde yende alya bereya Isip marte yufukde mat yumulgan ten yukun asem yago bikken hinhan nanare gor yukuyen,' yenbe ten kerke Isip mulgan hen kurin. Kukeb Al Kurunyen miyon kak melak bana forok yen mere iryin gore faran urde hinhin.

³⁶ Irkeb Israel mar goyen Isip nanare mat doyan yirde yukurin. Nana go tubul tiyenbe Isip nana

bana goñbe mata tiñeñ kurayen kurayen Al Kurun belen po yirtek goyen forok yiriyiñ. Irde makañ kura Makaan Bukken inen hanjyende gor manañ mata tiñeñ kurun kura forok iriyiñ. Irde sawsawa naña al ma hitek bana goñ dama 40 hinhanya goyenter wor gwahade po teñ hinhin.

37 “Be, Mose, go teñ hinhin al goreb mel Israel mar goyen gaha yinyiñ: ‘Kamebe Al Kurun belen den minde ga niñ po mere basañ almiñ kura ne yara teñ kerke fonenñiñ yago hitte wayyen,’ yinyiñ.

38 Be, Mose goreb asininiñ yago Isip tubul tiyamiñ mar goyen tumñañ sawsawa naña bana goñ gabu yirke gor hinhan. Irkeb Sainai dugure hurkun Al Kurunyen miyonya mere teñbe katen asininiñ yago mere yiriyiñ. Yenbe dugure gor henbe miyon gore asininiñ yagoya neñ kamekken gake teñ Al Kurunyen mere gwahader hitiñ goyen unyiñ.

39 “Be, Mose belen dugure hurkun Al Kurunyen mere nuren yenbe asininiñ yago gwaha gwaha tinayiñ yinenbe hurkuriñ. Gega goyen ma gama iramiñ. Gwaha titnenbe meremiñ go pel irde Isip niñ biñ mulgañ hamiñ.

40 Ningeb Mose go dugure gor po hikeya mel gore itiñ Aron hitte kunbe, ‘Kolge Isip nañare mat dad wayun al gobe Sainai dugure hurkun det kura irde mulgañ ma hen hi gobe go ma nurde hite. Ningeb igiñ dinke nindigen det tonen kura yirde doloñ yirtek. Irkeb gore doyañ dirke kun hitek,’ inamiñ.

41 Irdeb goya goyen gab gol hora belen po

bulmakaw fonenɗe tonenɗi iraminɗi. Irdeb Al Kurunɗiniɗi yenɗi dapɗa gasa yirde yawanɗi galak irde det yingenɗi haniɗde iraminɗi goke amanɗenɗi wor po nuraminɗi.

⁴² Irkeb Al Kurunɗi belɗen goke iginɗi ma wor po nurdeb harhok yunke mel gote dufayminɗi po nanɗinɗi niɗi det naɗa, gagasiya dinambeya goyen doloɗ yirde hinhan. Be, goke tenɗe Al Kurunɗen mere basanɗi mar belɗen asanɗebe gahade katinɗi hi:

‘Denɗi Israel mar, dama 40 sawsawa naɗa bana hinhanɗa goyenter dapɗa gasa yirde galak henɗi hinhan kurunɗi gobe ne niɗi moɗi.

⁴³ Irdeb sel ya irde usi tikula al Molek inɗenɗi hanɗen goyen bana goɗi kerde doloɗ irde tukunɗi hinhan.

Irde kurabe Refan inɗenɗi hanɗen goyen mananɗi gwahade po irde hinhan.

Det gobe Al Kurunɗi niɗi ma nurde hanɗen mar belɗen doloɗ irde hanɗen goyen denɗi mananɗi haniɗde yirde doloɗ yirde hinhan.

Ningeb goke tenɗe nanɗatiɗde mat dakira timekeb Babilon naɗa gisaw yenɗi nurde hanɗi goyen fole irde sorte wor po kunɗi kunayinɗi,’ yitiɗi hi. *Amos 5:25-27*

⁴⁴ “Be, Al Kurunɗi belɗen, ‘Sel ya kura gahade irayinɗi,’ inɗenɗi Mose ikala irde tunanɗenɗi unyinɗi. Irkeb asininɗi yagobe Al Kurunɗi belɗen Mose inɗenɗi goyen po gama irde ya go iraminɗi. Irde sawsawa naɗa bana goɗi henɗa, ‘Al Kurunɗe nenɗa hite,’ yenɗi nurde sel ya goyen tukunɗi hinhan.

⁴⁵ Be, go tenɗi hinhan mar gobe tumɗanɗi kamde hubu hekeb dirɗenɗi wenɗi kame forok yaminɗi mar

gore sel ya go tamin. Goya goyenbe Yosuwa belen doyan yirde yukurin. Irkeb Al Kurun belen Kenan nana min mar goyen yen wa mehen hen yakira tikeb mel gore kame kunbe nana go tamin. Be, gor kun henyabe Al Kurun dolo ird ird sel ya goyen manan ten kun hinhan. Be, kame Dewit belen Israel marte doyan al kurun hirin goyenter manan sel ya gobe hinhin po.

⁴⁶ Be, Dewit gobe Al Kurun belen amanen wor po nurde unen hinhin. Ningeb hakwaninin Yekop belen dolo ird hinhin Al Kurun goyen Dewit belen, ‘Ya taren ird unmeke gor hiwon,’ yen nurde gusun iryin.

⁴⁷ Goyenbe ya gobe yen belen ma iryin. Urmin Solomon belen ga iryin.

⁴⁸ Gega det kurun gayen doyan yirde hi Al Kurun gobe al ya irtin bana gon ma hiyen. Ningeb goke tenbe Al Kurun belen yirin goyen nurdeb mere basan almin Aisaia belen gahade kayyin:

⁴⁹⁻⁵⁰ ‘Be, Al Kurun belen gaha yirin:

Megenya naninyin det kurun gabe nigen yirmirin.

Irdeb naninbe nere keperd keperd gasun ird, megenbe kahanne kerd kerd det irmirin.

Ningeb ya dahade go goyen ird nunen yen ha?

Ne hen hen gasunbe al belen epte ma ird nunayin,’ yirin.

Aisaia

66:1-2

⁵¹ “Be, merebe gwahade yitin gega, denbe ya gake ugun po nurde ya gayen sukal ird hiyen yenbe merere gago nerhan? Den gab tonantin taren wor po. Denbe Al Kurun nin ma nurde han mar belen ten han yara. Bitinya kirmintinyabe

titmiŋ wor po. Al Kurunyen mere nurde bebak titek moŋ. Irde asininiŋ yago belen mata ten hinhan gwahade po den manan Holi Spirit pel irde han.

⁵² Den gayenbe asininiŋ yago belen Al Kurunyen mere basan marbe okohom kura yubul ten hinhan yen nurde han? Moŋ, hubu wor po geb! Al Huwak wor po kame watek goke tagalde hinhan mar goyen gasa yirke kamde hinhan. Irdeb gayenter al goyen wor forok yeke den belen pel irde mayke kamuŋ.

⁵³ Denbe Al Kurunyen miyoŋ belen Yuda marte tikula Mose unyiŋ goyen asininiŋ yago belen den gayen ga wor wor dunamiŋ. Gega goyen mun kura ma gama irde han,” yinyiŋ.

Horare Stiwen mayke kamyiŋ

⁵⁴ Be, Stiwenyen mere go nurdeb al merere keperde palŋa irde hinhan mar goreb mam isen bearar tiyamiŋ.

⁵⁵ Gega Stiwen go Holi Spirit belen hard unkeb kotan kan nanŋinŋde nanŋkenenbe Al Kurunyen sanŋ turŋun yaŋ goyen kinyiŋ. Irdeb Yesube Al Kurunyen hanŋ yase belen harde hike kinyiŋ.

⁵⁶ Irdeb, “Ga kennan. Nanŋin hol yeke Al Urmiŋbe Al Kurun hanŋ yase belen huwarde hike kenhem,” yinyiŋ.

⁵⁷ Irkeb mere go nurtek ma yirke kwep kwep irde kirmiŋ migisuŋ yurdeb Stiwen hitte kup yen kuŋ tanardebe megen korkor irde tulun ten Yerusalem taun siŋare ten kwamiŋ.

⁵⁸ Irdeb Stiwen go mayniñ yeñ uliñhormiñ yugu tenj al foneñ kura denjembe Sol gote kahan minde yeramiñ. Irde hora yadeb Stiwen mayde hinhan.

⁵⁹ Be, mayde hinhanya goyenbe Stiwen belen huwardeb, “Doyañ Al Kurun Yesu, tonnebe hanger kerhem,” inyiñ.

⁶⁰ Irdeb dokolhon yugulun tenj kawan po, “Doyañ Al Kurun, mel gare mata bulun tahan gake ma nurayiñ,” inyiñ. Be, mere gwahade tenj gab bubulkun sul yiriñ.

8

¹⁻² Goyare goyenbe Sol belen Stiwen kamiñ goyen kenenbe iñ po kama yeñ ayañ kiryiñ.

Be, al kura Al Kurun kenkela nurd unen hinhan mar belen al hakwa go tukun mete tenbe dolonje hinhan.

Sol belen yirke Yesuyen alya bereya sios bur yamiñ

Be, goyenterbe Yesuyen alya bereya sios Yerusalem hinhan go uliñde kanduk kurun wor po forok yeke kenenbe bur yeñ kurabe Yudia nanare kwamiñ, munan kurabe Samaria nanare kwamiñ. Gega aposel buda 12 gobe Yerusalem gor po hinhan.

³ Be, Sol gobe sios goyen gwaha yirmeke gab bada henañ yeñ nurdeb ya kurar mat kurar kun Yesuyen alya bereya bulun bulun yirde yukun koyare yerde hinhin.

Filipbe Samaria nanare kuriñ

⁴ Be, al bur yen kwamin mar gobe tiyun kurar mat kurar kunbe mere ingin Yesu nin yitin goyen tagalde kun hinhan.

⁵ Be, Filip wor Samaria nanare nin taunde kura gor kun Yesube Mesaia yen kawan po tagalde hinhin.

⁶ Irkeb meremin nurde hinhan. Irde Filip belen mata tinen Al Kurun belen po ga yirtek goyen wor forok yirde hike yenenbe mere ten hinhin goyen upsinen nurnin yen wan hinhan.

⁷ Be, Filip belen mata tinen forok yirde hinhin gobe al budam ungura ketal yurtin goyen ungura go yakira tike gisi ten al go yubul ten kat kun hinhan. Irde al ulin simsimamya sisibuga garbam minyan marya kurun goyen wor sope yirke ingin hen hinhan.

⁸ Irkeb gor nin marbe amanen wor po nurde hinhan.

Kalga al Saimon

⁹ Be, hanƙapya wor po Filip gor ma kurinyabe al kura denembe Saimon, taun goyenter hinhin. Gor henyabe megen nin tarenƙe mata ten hike Samaria nana bana gon nin mar belen turnun yan kenen hinhan. Irkeb, “Nebe al gwahade,” yen yingen turun turun irde hinhin.

¹⁰ Irkeb taun goyenter nin maryabe doyan mar kurun goreb, “Al gabe tarenmin kurun. Al Kurunyen Taren inen hanƙyen gobe gago,” yen dufaymin yen ge po irde gama irde hinhan.

¹¹ Taun goyenter nin marbe al gore nalu ulyande po megen nin matare mata tinen forok yirde hike turnun yan kenen gama irde hinhan.

¹² Gega Filip belen taun goyenter kun Al Kurun belen doyan yird yird mataya mere igin Yesu Kristu nin yitin goyen tagalkeb alya bereya mere gobe fudinde yen nurdeb baptais tamin.

¹³ Be, Saimon goyen wor Filipyen mere go fudinde yen nurdeb baptais tirin. Irdeb Filip belen mata tinen karkuwan kurayen kurayen forok yirke turnun yan kenenbe Filip go kurar mat kurar kun hikeb gama po irde hinhin.

¹⁴ Be, aposel buda Yerusalem hinhan mar go, “Samaria nanare nin marbe Al Kurunyen mere nurde fudinde yen dufaymin sanin iran,” yeke mere momon nuramin. Irdeb Pitaya Yonya yad yerke Samaria nanare nin taunde gor kwaryum.

¹⁵⁻¹⁶ Be, irem go kun gor forok yaryum. Goyenbe Yesu nin dufaymin taren irde hinhan mar goyen yingenbe Doyan Al Kurun Yesuyen al hihit yen fe baptais po tamin gega, al unkuwen mun kura Holi Spirit ma tirin goyen nuraryum. Ningeb Holi Spirit wor tenayin yen irem gore Al Kurun gusunon iraryum.

¹⁷ Goya goyenbe mel gote tonan hende hanin yerde Al Kurun gusunon irkeb Holi Spirit tamin.

¹⁸ Be, megen nin taren mata ten hinhin al Saimon go alya bereya Holi Spirit tamin go yenenbe horamin ten wayyin.

¹⁹ Wanbe, “Irem, hora ga dunen geb, derte sanin go nunyi. Irkeb ne wor al kura tonande hanne yemekeb Holi Spirit ten hinayin,” yinen hora go yunen tiyyin.

²⁰ Irkeb Pita belen wol henbe, “Ge gayen Al Kurun belen Holi Spirit dulin dunen hi goyen

hora po damu tiyen yen nurde ha? Epte mon geb. Gebe gwahade nurde ha geb, horage goya gigenyabe kak alare po kuriryen.

²¹ Dufay haha gobe Al Kurun dilindeb bulun wor po geb, meten gabe geya titek epte mon.

²²⁻²³ Dufaygebe bulun wor po. Beger gobe dufay bulun gore po makin girtin ha. Irde mata bulun gore po tugu guntinyen genhem. Ningeb dufay bulun haha gobe tubul po tenbe Al Kurun nin bege mulgan hiyyen. Gogab yen belen gab mata bulunge go halde gunyen,” inyin.

²⁴ Irkeb Saimon go mere goyen nurde wol henbe, “Ne nin ten Al Kurun gusunan ird nunayin. Irkeb, ‘Gebe dufay bulun gwahade minyan geb, mata gwahade ulger forok yiyyen,’ ninha goyen ulner ma forok yiyyen,” inyin.

²⁵ Be, Pitaya Yonya gobe taunde gor nin mar Yesu nin tagalde henya yenbe Doyan Al Kurun goyen momon yirdeb yubul ten kwaryum. Yubul ten Yerusalem mulgan hen kun henyabe tiyun budam Samaria nana bana gon nin alya bereya goyen Yesu nin yitin mere igin goyen momon yirdya yirdya kwaryum.

Filip belen Itiopia nanare nin doyan al kura fe baptais iryin

²⁶ Be, go ten hinaryumya goyenbe Doyan Al Kurunyen miyon kura belen Filip gaha inyin: “Huwarde nana ga tubul ten belen kura Yerusalem mat Isip kurkutin hire gor kwayin. Kunbe belen hani Gasa taun belen kutin kenenbe goyen gama irde kwayin,” inyin.

(Be, Gasa kuŋ kuŋ belen gobe gayenterbe go ma kuŋ hanŋen, tubul tiyamin.)

²⁷ Be, miyon gore gwaha inkeb Filip go huwardeb belen go gama irde kurin. Kuŋbe Itiopia nanare nin al salannen denem yan kura wan hike kinyin. Al gobe Itiopia nanare nin doyan bere kurun Kandasien samun doyan yird yird al. Yenbe Yerusalem kuŋ Al Kurun dolon irdeb mulgan hen nanam kuŋ hinhin.

²⁸ Yenbe nima kura hos belen yulun ten hanŋen hende gor keperde kuŋ henyabe Al Kurunyen mere basan al Aisaia belen asande mere kayyin goyen kapyan hen hinhin.

²⁹ Be, Holi Spirit belen Filip goyen, “Nima wan hi goyen bindere kwa,” inyin.

³⁰⁻³³ Irkeb Filip gobe kup yen nima goyen bindere kuŋbe al goyen Al Kurunyen mere basan al Aisaia belen asande kayyin goyen kapyan hen hike nuryin. Be, Al Kurunyen mere kapyan hen hinhin gobe gahade:

“Sipsip gasa yirde hanŋen gasunde sipsip yukutin gwahade goyen, yen wor maynin yen tukamin.

Al gobe sipsip dirnen wuynen walde hikeyabe balmin po hanŋen go gwahade goyen yen wor mere mun kura ma tiyyin.

Al gobe megen nin mar belen merere kerde nanyan iramin.

Irde mere sope ird ird doyan marbe mere fudinde goyen ma gama irde bulun mat kwamin.

Al gobe megen nin mar belen mayke kamyin.

Ningeb al ganun belen epte goyenter nin marte mata bulun kurun gobe gwahade yen tagalyen? Hubu wor po!" yitin hi. *Aisaia 53:7-8*

Be, Filip belen mere go nurdeb Itiopia nin al goyen, "Mere kapyan haha gob minbe goke yitin yen bebak taha?" inen gusunen iryin. Irkeb al goreb, "Mon, al gore kura min gwahade nin katin ma ninen hiyen. Ningeb daha mat min nuren?" inyin. Gwaha inenbe, "Wan kepera," inke Filip gob nima go hende hurkun ketalminde kipiryn.

³⁴ Irkeb al goreb Filip inyin: "Mere gabe Al Kurunyen mere basan al ganun nin wor po yitin? Yingen ge ma al hoyan ge? Ge gab bebakken daw nurde ha? Nurde ha kenem igin bebak nirayin?" inyin.

³⁵ Irkeb al gore Aisaia belen mere kayyin kapyan hen hinhin gote minbe Yesu nin yen hi inenbe Yesu ulinde mata forok yirin goyen momon iryin.

³⁶⁻³⁷ Be, irem go kunbe fete kura gor forok yaryum. Irdeb Itiopia al goreb, "Febe ima go hi geb, igin gor baptais nirayin?" inyin.*

³⁸ Gwaha inenbe al goreb meten marmin goyen, "Gar mun kura hen ga kutek," yinkeb usan hamin. Irkeb Filip belen al goyen tukun fe bana baptais iryin.

* **8:36-37:** Asan kurareb gahade katin hi: ³⁷ *Irkeb Filip belen wol henbe, "Gebe mere gayen bubulkunger mat fudinde wor po yen nurha kenenbe igin baptais giren," inyin. Irkeb al gore, "Gwaha, Yesu Kristube Al Kurun Urmin goyen fudinde wor po nurde hime," inyin.*

³⁹ Be, irem go fe tubul ten sinjare hurkukeb Doyan Al Kurunyen Holi Spirit belen bemel po Filip bana kerde ten hoyande kurin. Irkeb Itiopia al gore ma kinyin. Goyenpoga al gobe Yesu nurde unhem yen aman wor po hen nanam kurin.

⁴⁰ Be, Filip gobe Holi Spirit belen bana kerde tukun Asdot taunde irdeb kawan irke forok yirin. Irkeb gor mat Sisaria taunde kwe yen kun henjabe taun kurayan kurayan mere igin Yesu nin yitin goyen tagalde kun kunbe Sisaria taunde forok yirin.

9

Sol belen Yesu nin bin mulgan hiri

¹ Be, Filip belen Samaria nanare kun gwaha ten hikeyabe Sol gobe alya bereya Yesu nin dufay taren iramin mar goyen gasa yirde bulun bulun yirtek po nurde Al Kurun dolo ird ird mata doyan mar pris buda gote kurunmin hitte kurin.

² Kunbe gaha inyin: “Damaskus taunde nin Yuda marte gabu ya buda gote doyan mar hitte kunbe dufanne momon yiren. Irmeke faran nurkeb Yesu gama irde han mar kura yenenbe fere yirde Yerusalem gar yawayen. Ningeb asan kan nunayin. Irkeb kun gor nin gabu ya doyan mar yikala yirmekeb faran nurnayin,” inyin.

³ Be, Sol gobe kun Damaskus taun binde hekeb bemel po nanjinde mat hulsi taren kura nana folekken kurun gore yen hitte timiyyin.

⁴ Irkeb deldol wor po irdeb megen takten mayyin. Irkeb goya goyenbe al melak kura, “Sol,

Sol, daniŋ mununen bulun bulun nirde ha?” yeke nuryiŋ.

⁵ Irkeb belenbe Doyaŋ Al Kurun goyen, “Ge be ganuŋ?” inen gusuŋaŋ iryiŋ. Irkeb wol henbe, “Nebe Yesu, mununen bulun bulun nirde ha al goyen.

⁶ Niŋgeb huwara. Huwardeb Damaskus taunde gor kwa. Irkeb al kura goreb gwaha gwaha tiyayiŋ ginyeŋ,” inyiŋ.

⁷ Be, Solya kuŋ hinhan mar goyen wor mere go nuramiŋ gega, al gore kura mere tiya yeŋ ma kenamiŋ. Irdeb ŋakŋak teŋ mere ma tiyamiŋ.

⁸ Be, Sol gobe takteŋ mayyiŋde gor mat huwardeb naŋkenhem yiriŋ gega, diliŋ kidoma wor po hiriŋ. Irkeb det yentek ma wor po hiriŋ. Irkeb yeŋya kuŋ hinhan mar gore go keneŋbe haniŋde tanarde Damaskus taunde tukamiŋ.

⁹ Tukuke gorbe naŋkahal karwo gayen diliŋ titmiŋ gwahade po hinhin. Irkeb biŋgeya feya kutŋa irde hinhin.

¹⁰ Be, goya goyenbe Yesu niŋ dufaymiŋ saŋiŋ irtiŋ al kura Damaskus taunde gor hinhin. Deŋembe Ananaias. Be, Doyaŋ Al Kurun belen yuwarwarte forok yeŋbe, “Ananaias,” inyiŋ. Irkeb wol henbe, “Doyaŋ Al Kurun, dahade?” inyiŋ.

¹¹ Irkeb gaha inyiŋ: “Tarsus taunde niŋ al kura deŋembe Sol goyen Yudasyen yare hen Al Kurun mere irde hi. Niŋgeb Belen Huwak inen hanŋen goyen gama irde kuŋbe yamiŋde forok yeŋbe Sol niŋ gusuŋaŋ irayiŋ.

¹² Yeŋbe diliŋ titmiŋ hiyuŋ goyen yuwarwarte

al kura denembe Ananaias belen kun igin hiwi yen hani tonande kerde Al Kurun gusunan irde hike kinun,” inyin.

¹³ Gwaha inkeb Ananaias belenbe gaha inyin: “Doyan Al Kurun Yesu, al budam belen al goke tagalke nurmin. Al gobe ge gama girde han mar Yerusalem han goyen bulun wor po yirun.

¹⁴ Irdeb pris buda gote kurunmin belen, ‘Kun Damaskus gor Yesu dolon irde han mar fere tiyayin,’ inke gar wayun,” inyin.

¹⁵⁻¹⁶ Gwaha inkeb Doyan Al Kurun Yesu belen, “Al gobe metenne tiyyen yen hakot basina ir-mirin. Yen belenbe nan kurun gayen kun henyabe al min hoyanya doyan marminyabe Israel marya hitte kun ne nin tagalde tukuyen. Yenbe ne nin ten kame ulin misin kurun katyen goyen ikala iren. Ningeb kun ginhem gwahade po irayin,” inyin.

¹⁷ Gwaha inkeb Sol hinhin yare gor kurin. Kun kenenbe hani tonande yerdebe, “Kadne, gar wan hikeya Doyan Al Kurun Yesu belen forok yen mere girun al gore nad nerke gago wayhem. Ningeb delgebe sopte igin hiriryen. Irde Holi Spirit hard gunyen,” inyin.

¹⁸ Irkeb goyare po det kura makan dapna kakafok yara dilin pet tike kidoma hirin kurun goyen wok yekeb sopte wuk yeke det yinyin. Irkeb Ananaias belen tukun fe bana baptais iryin.

¹⁹ Be, baptais tirin kamereb sopte binje nekeb ulin yul yirin goyen taren hirin.

Sol Damaskus taunde hen Yesu nin tagalyin

Be, Sol gobe Damaskus taunde gor niŋ mar Yesu niŋ dufaymiŋ tareŋ iramiŋ goya naŋkahal karwo ma sipte gwahade gor hinhin.

²⁰ Irdeb mel goya muŋ kura ulyaŋde ma henyaŋbe araŋ po sabamiŋ miŋ ure yeŋ Yuda marte gabu yayaŋ kuŋbe, “Yesube Al Kuruŋ Urmiŋ,” yeŋ tagalde kuŋ hinhin.

²¹ Irkeb al buda meremiŋ nuramiŋ mar gore goyen keneŋbe hurkuŋkat teŋbe, “Al gabe Yerusalem gor Yesu gama irde haŋ mar buluŋ buluŋ yirdeb gar niŋ Yesu gama irde haŋ mar wor yad fere yirde pris buda gote kurumuŋ hitte yuke yeŋ wayuŋ al goyen gago moŋ? Niŋgeb daha teŋ hibe gago?” yeŋ kadom gusuŋaŋ gird tiyamiŋ.

²² Gega gise haŋka Sol belen saba teŋ hike sabamiŋbe tonneŋ yaŋ hen hinhin. Irde, “Yesube Mesaia,” yeŋ hike Yuda mar Damaskus hinhan mar gob gwaha mat kura mere titek moŋ hamiŋ.

²³ Be, nalu budam hubu hiriŋ. Goyenbe Yuda mar belen gabu irdeb mayteke kami yeŋ sege iramiŋ.

²⁴ Gega al kura belen mel gote dufay goyen momoŋ irke nuryiŋ. Be, mel gobe koya kuruŋ Damaskus taun milgu irtiŋ gote yame karkuwaŋde kurar mat kura Sol go waŋ siŋare kweŋ tikeb maytek yeŋ wawuŋya naŋkahalya usaŋ miŋmoŋ yameyaŋ goyaŋ pet teŋ hinhan.

²⁵ Gega wawuŋ kurarebe Solyen mere nurde gama irde hinhan mar belen hora karkuwaŋ po koya kuruŋ irtiŋ hende hoyan taun go milgu irtiŋ goyen yameŋde mat Sol goyen tiri kuruŋ bana

kerdeb hulyanalde palgir irke megen kurkurin.
Irdeb gor mat Damaskus taun go tubul ten kurin.

Solbe Yerusalem mulgan hiri

²⁶ Be, Sol gobe Damaskus tubul ten Yerusalem mulgan hen kurin. Kun forok yenbe Yesu nin dufaymin sanin irtin mar gor hinhan goyen daha mat kura awalik yirmewon yen kurut yen hinhin. Gega mel gobe Sol Yesu nin dufaymin taren iryin goyen fudinde yen ma nurdeb tumnan yen ge kafura hamin.

²⁷ Gega Banabas belen aposel buda hitte tukurin. Tukunbe Sol gob Damaskus kun henya daha mat Doyan Al Kurun kenke mere iryin, irde Damaskus taunde gor Yesu nin tagal tagal nin kafura ma hen tagalde hinhin goyen momon yirin.

²⁸ Be, Banabas belen aposel buda go gwaha yinke nurdeb awalik iramin. Irkeb mel gore Yerusalem bana Al Kurunyen meten ten hinhan goyen Sol nin saguraynen nurdeb yenza gwaha ten hinhan. Gorbe Yuda mar hitte Yesuyen denemde Al Kurunyen saba tagal tagal nin kafura ma hen tagalde kun hinhin.

²⁹ Gwaha ten henya Yuda mar Grik mere ten hitin goya kadom mohonde ten hinhan. Irkeb daha mat kura mayteke kami yen epte ma tiyamin.

³⁰ Gega dinun Yesu nin dufaymin taren irtin mar belen mere momon go nurdeb Sisaria taunde tukurkamin. Irdeb gor mat hakwa hende tiyunmin Tarsus taunde ten kerke kurin.

³¹ Be, Yudia nanaya Galili nanaya irde Samaria nanare nin sios goyen kanduk karkuwan forok yen hinhan kurun goyen hubu hekeb merem mon hen kanduk kura ma kenen hinhan. Irde sanin henayin yen Holi Spirit belen faran yurkeb Doyan Al Kurun nin dufayninin taren irnin yen al budam yen ge bin mulgan hen hinhan. Irdeb Doyan Al Kurun palap irde henya mata ten hinhan.

Pita belen Lida taunya Yopa taundeya kun Al Kurunyen meten tiyyin

³² Be, goyenter Pitabe Israel marte nana bana gon nin tiyun kurar mat kurar kun hinhin. Kun henyabe Yesu gama irde hinhan mar Lida taunde nin wor kun yinyin.

³³ Be, gorbe al ulin simsim hitin kura kinyin. Denembe Ainias. Yenbe dama 8 gayen gasunde nin hirin. Yingen kun wan titek epte mon.

³⁴ Be, Pita belen kenenbe, “Ainias, Yesu Kristu belen guram girde sope gira nin, huwardeb ferd ferd gasunge go gigen sope ira,” inyin. Irkeb goya goyen po huwaryin.

³⁵ Irkeb alya bereya Lida taunde ninnya Saron nana bantotore hinhan mar gore Ainias igin hirin goyen kenenbe Doyan Al Kurun nin dufaymin taren iramin.

³⁶ Be, Yopa taundebe Yesu nin dufaymin sanin iryin bere kura hinhin. Denembe Tabita. Grik mere matbe Dorkas inen hanyen. Yenbe huginen mata igin po ten hinhin, irde alya bereya det minmon mar faran yurde hinhin.

³⁷ Be, Pita belen Lida taunde hinhin goya goyenbe bere go garbam bulun po henbe kamyin.

Kamkeb bere hakwam goyen he fimiñ belen sam irde utma tiyamiñ. Irdeb yamiñ banabe al hen hen gasunbe irawa kurabe hende kurabe bande geb, tukun gasun hende goyenter keramiñ.

³⁸ Be, Yopa taunde mat Lida taundebe gisaw mon geb, Yesu nin dufaymin taren irtin mar Yopa taunde hinhan gore Pita Lida taunde hinhan goyen nurdeb al irawa kura yad yerke keya kunbe, “Ge nin po nurde wayhar nin, wake aranen po kuniñ,” inaryum.

³⁹ Irkeb Pita go huwardeb al irawa goya Yopa taunde kwamiñ. Kun forok yekeb Tabita hakwam hinhande gor ten hurkamiñ. Hurkukeb beretap gon dolonde hinhan goreb milgu irdeb amal kurayen kurayen Tabita diliñ henya beretap goke yiriyin kurun goyen ikala irde henya esen hinhan.

⁴⁰ Irkeb Pita belen bere buda gon hinhan goyen tumnan yakira tike sinare kurkamiñ. Kurkukeb dokolhon yugulun tenbe Al Kurun gusunan iryin. Irdeb fulgan kanbe bere hakwam goyen, “Tabita, huwara,” inyin. Gwaha inkeb nankenen Pita kenenbe huwarde kipiriyin.

⁴¹ Irkeb Pita belen haniñde tanarde isan hekeb huwaryin. Irkeb Yesu nin dufaymin taren irde hinhan marya beretap budaya goyen hoy yirkeb wan bere goyen kenamiñ.

⁴² Be, mata forok yirin gote mere momonbe Yopa taunde nin mar kurun gobe nurde tukutin ala tiyamiñ. Irdeb al budam Doyan Al Kurun nin dufaymin sanin iramiñ.

⁴³ Be, Pita go al kura dapna sikken po det yirde hinhan al gote yare nalu uyande yara po gor

hinhin. Al gote dengebe Saimon.

10

Konilius belen Pita hoy iryin

¹ Be, Sisaria taunde gorbe Roma al kura 100 fulenja marte doyan al kura hinhin. Denembe Konilius. Fulenja mar gobe “Rom nin fulenja mar” yinen hanjen.

² Koniliusya dirinminmin yagobe tumnan Al Kurun palap irde yen ge po nurde dolon irdeb merem gama irde al buninen faran yurde Al Kurun mere ird ird nin bin sir ma yen hinhan.

³ Be, wawunbana kura 3 kilok gwahaderbe Al Kurun mere ird ird nalu hekeb mere irde henya yuwarwarte miyonmin kura forok yeke kinyin. Irkeb miyon gore, “Konilius,” inyin.

⁴ Irkeb kafura henbe her yen, “Doyan Al Kurun, dahade?” inen gusunan iryin. Irkeb miyon gore wol henbe, “Al Kurunbe ge belen mere irde hayen goyen nurde hiyen, irde alya bereya buninen faran yurde ten hayen goyen wor genen hiyen. Yenbe ge nin bin sir ma yen hiyen geb, nad nerkeb gago mere momon gire yen wayhem.

⁵ Al kura hulyan yirkeb Yopa taunde kunayin. Kunbe al kura denem Saimon, denem kurabe Pita inen hanjen goyen gor hi geb, tupi tenbe mulgan hen wanayin.

⁶ Yenbe Saimon dapna sikken po det yirde hiyen al gote yare hi. Yaminbe makan sinja belen mat hi,” inyin.

⁷ Be, miyon gore gwaha inenbe kukeb Konilius belen meten marmen irawayabe fulenja almin

unjkurenj kura goya hoy yirkeb yen hitte wayaminj. Fulaña al gobe Al Kurun palap irde yen ge po nurde hiyen al. Yenbe Koniliusya hen faran urde hiyen.

⁸ Wakeb Al Kurunyen miyonj forok yen mere iryinj goyen kenkela po momonj yirdeb hulyan yirkeb Yopa taunde kwaminj.

Al Kurun belen yuwarwarte Pita mere iryinj

⁹ Be, mel go kun tiyunde kura gor feraminj. Irde fay urkeb sopte kun nana bankahal hekeb Yopa taunde forok yetek hen hinhan. Be, goyareb Pitabe ya yen hinhin gote armomde* Al Kurun mere ire yen hurkuriñ.

¹⁰ Hurkun Al Kurun mere irde henyabe bingeb bulun wor po iryinj. Be, bingeb hako kan hikeyabe yenbe ya hende gor hinhin. Irkeb Al Kurun belen mata kura ikala ireñ tike ulin kanduk po hiriñ.

¹¹ Irkeb yuwarwarte nanjin geren yirinj. Irkeb det kura amil yara goyen murunj sipte kurhan kurhan al belen tanartinenj irde palgir irke nanjinde mat megen katinj.

¹² Bana gonbe dapña kahan yan megen huwarde kun hitinya, buda, kunereyabe nu kurayen kurayen kurun goyen bana gon hike yinyinj.

¹³ Be, det go yenen henyabe al melak kura nuryinj. Gorebe, “Pita, huwarde det go gasa yirde nawa,” inyinj.

* **10:9:** Yuda marte ya gote armobe bantotok geb, al belen hiryonde igin hurkun gor keperde usan hen hanyen.

¹⁴ Irkeb wol henbe, “Mon, Doyan Al Kurun, badne wor po. Dapɲa gabe delger wukken mon, bulun yen hitin gobe neb kura ma nen himyen,” inyin.

¹⁵ Irkeb al melak gore sopte po, “Det kurayen kurayen Al Kurun belen yirde dilinde wukken yitin gobe ge belen wukken mon yen bada ma hawayin,” inyin.

¹⁶ Be, mere gabe wawun karwo gayen Pita hitte forok yeke nuryin. Be, mere go hubu hekeb goyare po det amil yara dapɲa kurayen kurayen bana gon minyan goyen tumulgan tike naninde hurkurin.

¹⁷ Be, yuwarwarte det kinyin goyen min nin dufay hen hinhin goya goyabe al karwo Konilius belen hulyan yirke wayamin goyen Saimonyen ya nin nankenen wanbe ya kenenbe sinare huwaramin.

¹⁸ Irdeb, “Saimon Pita inen hanjen al go goyen gar hi we?” yinen al ya bana gon hinhan goyen gusunan yiramin.

¹⁹ Be, goya goyenbe Pita go yuwarwarte det kinyin gote min nin hako po dufay hen hikeb Holi Spirit belen, “Saimon, al karwo kura ge nin nankenen wayhan.

²⁰ Ningeb huwarde kurkun yena. Mel gobe ne belen po yinmeke ge nin wayhan geb, wake kunin ginke goya yenya kun kun nin kama ma hawayin,” inyin.

²¹ Irkeb Pita go kurkun mel goyen yenenbe, “Al goke nankenen wayhan al gobe ne gago. Ningeb dahade nurde ne nin nankenen han?” yinen

gusunanj yiriyin.

²² Irkeb mel goreb, “Nenbe Konilius Roma nin 100 fulenja marte doyanj al belenj hulyanj dirke wayhet. Yenbe Al Kurun palap irde dolon irdeb dilinde huwak igin po hiyen. Irkeb Yuda mar wor tumnanj palap irde hanjen. Kibe Al Kurunyen miyon belenj forok yenbe Konilius goyen, ‘Al kura hulyanj yirke Saimonyen yare Yopa kunjbe Pita tupi ten wanayin. Irkeb yen belenj gab mere girke nurayin,’ inun geb, gago yen belenj hulyanj dirke ge gupi ten kunin yen wayhet,” inamin.

²³ Irkeb Pita belenj yinke yare hurkamin. Irdeb go wawun gobe gor feramin.

Pita belenj Konilius hitte kunj Yesu nin tagalyin

Be, fay urkeb Pita go huwardeb mel goya Sisaria taunde kwamin. Irkeb Yesu nin dufaymin taren irtin mar kura Yopa taunde hinhan goyen wor yenja kwamin.

²⁴ Be, sopte fay urkeb kunj Sisaria taunde forok yamin. Koniliusbe Yopa kwan mar goyen hanja wan forok yinin tahan yen nurdeb yende minde nin alya bereya dinun yende yende goyen hoy yirke wan gabu irdeb mel go po doyan yirde hinhan.

²⁵ Be, Pita go kunj yare forok yen ya bana hurkenj tikeb Konilius belenj Pita palap irde yamere Pita kahan minde dokolhon yugulun ten kuku tiyyin.

²⁶ Irkeb Pita belenj, “Huwara! Nebe al gigen yara po nin, gwaha ma nirayin,” inenbe haninde tanarde isan hirin.

²⁷ Irdeb Pita go Koniliusya mere tenya tenya ya bana hurkunbe al buda kurun go yinyin.

²⁸ Irdeb gaha yinyin: “Nen Yuda mar belen den al hoyande ninya awalik hen gabu hen hen gobe nende matarebe bisam irtin geb, go po gama irde hityen. Gob denbe kenkela nurde han. Gega Yuda mar mon gobe wukken mon bulun ningeb, Al Kurunya awalik hetek epte mon yen himyen goyen bada hawayin yenbe Al Kurun belen yuwarwarte nikala nirun.

²⁹ Goke tenbe ne nin keya hekeb mere ma timin. Mali po huwardeb wamin. Goyenbe Konilius, gebe dahade nurdeb ne nin keya hawan?” inyin.

³⁰ Irkeb Konilius belen huwardeb gaha inyin: “Gote yeren 3 kilok wawunbana gaha nana gayen yaner hen Al Kurun mere irde hinhem. Gwaha ten himekeya al kura ulinhormin faykek wor po melak hen hinhin gore delne mat forok yen huwardebe,

³¹ ‘Konilius, Al Kurunbe mere irde hayen goyen nurde hiyen, irde alya bereya buninen faran yurde hayen goyen wor bin sir ma yen hiyen.

³² Ningeb al kura yad yerkeb Saimon Pita inen hanyen goke Yopa taunde kunayin. Yenbe al kura Saimon inen hanyen gote yare hi. Al gobe dapna sikken po det yirde hiyen. Yaminbe makan sinja belen mat hi,’ ninun.

³³ Be, gwaha ninkeb goya goyen po al yad yermeke ge nin keya kwan geb, gago wayha. Nenbe Doyan Al Kurun belen mere yirayin ginun goyen tumnan momon dirke nurnin yenbe Al Kurun dilin mat gago wan gabu irde doyan girhet.

Ningeb igin ten wayha geb, mere goyen momon dira,” inyin.

³⁴ Be, mere go nurdeb Pita belen gaha inyin: “Hanjab bebak tihim. Fudinde wor po, Al Kurunbe Yuda mar po ma igin yenen hiyen.

³⁵ Al min kurar nin kurar nin merem hoyan hoyan Al Kurun palap irde dilinde mata huwak po ten han mar go gab igin yenen hiyen.

³⁶ Denbe Al Kurun belen Israel mar nin bikken mere kiryin gobe kenkela nurde han. Mere gobe Al Kurun belen megen nin marya awalik hen hen ge ten Yesu Kristu ten kerke katyin goke yitin. Yesu Kristube megen nin mar tumnan gote Doyan Al Kurun.

³⁷ Denbe mata kurun Yudia nana bana gon forok yen hinhin gobe nurde han. Han karya Yon Baptais belen Galili nanare, ‘Mata buluntin yubul ten baptais tenan,’ yen alya bereya saba yirde hinhin goyen kamere mata kurun goyen forok yirin.

³⁸ Mata kurun gobe gahade: Al Kurun belen Holi Spirit ten kerke Nasaret nin al Yesu go hitte katyin, irde tarenmin wor unyin. Irdeb Al Kurunbe yanya hinaryum geb, Yesu gobe Yuda marte nana bana gon tiyun kurar mat kurar kunbe alya bereya faran yurde al Satan belen bulun yirke garbam hinhan goyen tumnan guram yirde sope yirde hinhin.

³⁹ Yesu belen mata kurun Yuda marte nana bana gon ten hinhin goya Yerusalem taunde gor ten hinhin gobe dilnininde wor po kenen hinhet. Gega gor nin mar belen ten kuruse hende mayke

kamuŋ.

⁴⁰ Goyenpoga kamuŋde gor mat yerenkek hekeb Al Kurun belen isan henbe kawan irke kenaŋ.

⁴¹ Gega al tumnaŋ ma kenaŋ. Nen bikken Al Kurun belen basaŋa dirtiŋ mar po gab Yesu kamuŋde mat huwarkeb kintiŋ. Irdeb yenya dula ten hinhet.

⁴² Yesube al kamtiŋya diliŋ gergen hanya matamiŋ yenen bulunya igiŋya pota yirde murungem yunyen yen Al Kurun belen basaŋa iryiŋ albe gogo yen tagalde tukunayiŋ dinuŋ.

⁴³ Yesu goke ten bikken Al Kurunyen mere basan mar belen, ‘Al kura kame wayyen goke dufay saŋiŋ irkeb Al Kurun belen al goke ten mata bulunmiŋ halde unyen,’ yen tagalde hinhan,” yen Pita belen Koniliusya yamiŋde gabu iramiŋ mar goyen yinyiŋ.

Holi Spirit Yuda mar moŋ hitte katyiŋ

⁴⁴ Be, Pita belen saba gwahade ten hinhin goya goyab Holi Spirit belen saba go palŋa irde hinhan mar hitte katyiŋ.

⁴⁵⁻⁴⁶ Irkeb mere kurayen kurayen ten Al Kurun turun irde tiyamiŋ. Irkeb Yuda mar Yesu niŋ dufaymiŋ tareŋ irtiŋ kura Pitaya wayamiŋ gore go yenen hurkunkat tenbe, ‘Al Kurun belenbe Yuda mar moŋ al miŋ hoyan nende matare ma kutiŋ gega, yen wor Holi Spirit yuna be!’ yamiŋ. Irkeb Pita belen,

⁴⁷ “Mel gabe nen Holi Spirit titiŋ gwahade goyen po yen wor Holi Spirit tahaŋ niŋgeb, al

ganuŋ belen fe baptais ten ten nin bisam yiryen?” yirin.

⁴⁸ Irdeb, “Denbe, ‘Yesu Kristuyen al hihit,’ yen Yesu Kristu denemde baptais tenayin,” yinen baptais yiryin. Go kamereb baptais tamin mar gore Pita goyen, “Nenya mun kura hen ga kwayin,” inen basinja iramin.

11

Pita Yerusalem mulgan hiriŋ

¹ Be, al min hoyan Yuda mar mon wor Al Kurunyen mere nurde gama iran mere momon goyen aposel budaya Yesu nin dufaymin taren irtin mar Yudia nanja bana go nin belen nuramin.

² Ningeb Pita mulgan hen Yerusalem hurkukeb Yuda mar Yesu nin dufaymin sanin irtin mar gore igin ma nurde huwardeb Pita goyen,

³ “Ge gayenbe daha tihim yen al min hoyan nende guba mata ma gama irde hanjen marte yare kun dula tiyan?” yen bin ar hende mere iramin.

⁴ Irkeb Pita belen mata forok yirin goyen kenkela po momon yire yen min urdeb gaha yinyin:

⁵ “Nebe Yopa taunde hen Al Kurun mere irde hinhem. Irkeb Al Kurun belen mata kura nikala niren tikeb ulne kanduk wor po hiyun. Irkeb yuwarwarte det kura amil yara goyen murun sipte kurhan kurhan goyen al belen utirin ten tanartinen irde nan kinde mat pangir irke ne hitte katke kinmin.

⁶ Kenkela kenenbe bana gonbe dapɲa kahan yaɲ megen kuɲ hitiɲya, buda, kunereyabe nu kurayen kurayen kurun goyen bana gon hike yinmin.

⁷ Irkeb al melak kura nurmin goreb, 'Pita, huwarde dapɲa go gasa yirde nawa,' ninun.

⁸ Irkeb ne belen wol henbe, 'Mon, Doyan Al Kurun, badne wor po. Dapɲa gabe delger wukken mon, bulun yen han yen gobe mun kura ma nitiɲ. Hubu wor po,' inmin.

⁹ Be, al melak gore sopte po nan kinde mat, 'Det Al Kurun belen yirde diliɲde wukken yitiɲ gobe ge belen wukken mon yen bada ma hawayiɲ,' ninun.

¹⁰ Mere gobe wawun karwo gayen ne hitte forok yeke nurmin. Be, mere go hubu hekeb goyare po det amil yara dapɲa kurayen kurayen bana gon minyan goyen tumulgan tike nan kinde hurkun.

¹¹ Irkeb goya goyenbe al karwo Sisaria mat ne niɲ keya kwan mar goyen ya hinhem siɲare gor huwaran.

¹² Irkeb Holi Spirit belenbe, 'Mel goya kuɲ kuɲ niɲ kama hen bada ma hawayiɲ,' ninun. Irkeb mel karwo goya Sisaria taunde kutiɲ. Irde kadne 6 Yopa taunde niɲ gayen wor gama nirke tumnan Koniliusyen yare kutiɲ.

¹³ Kuɲ forok yetekb Konilius belen nenenbe Al Kurunyen miyon belen yaminde forok yen mere irun goyen momon nirun. Mereminbe gahade: 'Al kura Saimon, Pita inen han yen al gobe Yopa taunde hi niɲgeb, al kura yinke yen ge keya

kunan.

¹⁴ Yen belen gab Al Kurunyen mere tawan mon girkeb geya dirinmingeyabe tumnan mere go nurdeb gama irke Al Kurun belen dumulgan tiyyen,' inun.

¹⁵ Be, hanƙap ga mere min urde hinhem goya goyabe Holi Spirit hanƙapya nen hitte katun go gwahade goyen yen hitte wor katun.

¹⁶ Irke go kenenbe Doyan Al Kurun Yesu belen Al Kurun hitte mulgan hewe yenya, 'Yonbe fe baptais yirde hinhin gega, denbe Al Kurun belen Holi Spiritde baptais diryen,' dinun goyen goya gab bene bak yiyun.

¹⁷ Ningeb Al Kurun belen Holi Spirit nen dunun gwahade goyen po al min hoyan Yuda mar mon goyen Yesu Kristu nin dufaymin taren irkeb yen wor yunun. Ningeb daha tihim yen ne al nebanen mun gare Al Kurunyen meten walen? Neb badne wor po!" yinyin.

¹⁸ Be, Yuda mar Yesu nin dufaymin taren irde hinhan go Pita mere tiyyin go fudinde yen nurdeb Al Kurun turun irde, "Fudinde go. Al min hoyan nen Yuda mar mon wor Al Kurun belen bin bak yirke Al Kurunya awalikde hitek yenbe mata bulunmin yubul ten yen ge bin mulgan hen han," yamin.

Antiok nin Yesuyen alya bereya

¹⁹ Be, Yudia nanare nin doyan mar belen Stiwen mayke kamyin go kamereb Stiwen dinun Yesu nin dufaymin sanin irtin mar wor gasa yirde bulun bulun yirde hikeb go mar gobe burgagaw keramin. Irdeb kurabe Fonisia nanare kwamin.

Kurabe Saiprus motmotde kwamiñ. Munan kurabe Antiok taunde kwamiñ. Mel go burgagaw kerde kwamiñ mar goyenbe kuñ mere igiñ Yesu niñ yitiñ goyen Yuda mar po momoñ yirde kuñ hinhan.

²⁰ Gega Saiprus motmotde niñ marya Sairini taunde niñ mar Yerusalem mat bur yen kwamiñ gore Antiok taunde kuñbe Grik mar gor hinhan goyen wor mere igiñ Doyañ Al Kurun Yesu niñ yitiñ goyen momoñ yirde hinhan.

²¹ Doyañ Al Kurunyen tarenbe mel goya hinhin geb, mere go nurdeb alya bereya budam mata bulunmiñ yubul ten Yesu niñ dufaymiñ taren iramiñ.

²² Be, Yerusalem niñ sios gore mere momoñ go nurdeb Banabas ten kerke Antiok kuriñ.

²³ Kuñ Antiok gor forok yenbe Al Kurun belen bunineñ yirde igiñ igiñ yirde Holi Spirit yuniñ go yenenbe aman niñ pultik yiriñ. Irdeb sañiñ heñ heñ ge farañ yure yenbe, “Bitinde mat Doyañ Al Kurun Yesu gama irde hinayiñ. Irde yen niñ po nurde hinayiñ,” yinen saba yirde hinhin.

²⁴ Banabasbe al igiñ wor po, irde Yesu niñ dufaymiñ taren irde hekkeñ nurde unen hinhin. Holi Spirit belen hard unen ketal urtiñ hinhin. Niñgeb Banabas belen saba yirkebe al budam Yesu niñ dufaymiñ taren iramiñ.

²⁵ Be, gor matbe Banabas go Sol niñ nanekene yen Tarsus taunde kuriñ.

²⁶ Kuñ nankenen kenenbe tupi ten Antiok waryaryum. Be, go dama goyen Banabasya Solyabe Yesu Kristuyen alya bereya Antiok hinhan goya henbe alya bereya budam saba yirde hinaryum.

Be, Antiok gorbe Yesu niŋ dufaymiŋ saŋiŋ iramiŋ mar goyen al siŋare niŋ mar belen “Kristen” yinamiŋ. Deŋe gob bikkenbe hubu.

²⁷ Be, irem go Antiok hinaryum goya goyenbe Al Kurunyen mere basan mar kura Yerusalem mat Antiok katamiŋ.

²⁸ Al kura denembe Agabus. Yen belenbe Holi Spirityen tarende huwardeb, “Kamebe binge kamde kamde nalu kurun kura Roma gabman belen naŋa doyan ira bana gayen forok yiyyen,” yirin. Be, Klodius belen Roma gabmanyen doyan al hikeya mere tiyyin gwahade po forok yirin.

²⁹ Irkeb Yerusalem niŋ mar faran yurniŋ yenbe Yesu niŋ dufaymiŋ tareŋ iramiŋ mar Antiok hinhan gore hora yirtiŋ ala tiyamiŋ. Al tumŋan gor hinhan gobe gwahade hite yenbe goyen po gama irde hora yeramiŋ. Horam yan marbe tolok yeramiŋ, munan al hubu nurdeb bande yeramiŋ.

³⁰ Hora gabu iramiŋ gobe ten Banabasya Solya haniŋde keramiŋ. Irkeb Yerusalem kunbe tukun sios gote doyan mar yunaryum.

12

Herot belen Yesuyen alya bereya sios bulun bulun yiryin

¹ Be, goya goyenbe Yuda marte doyan al kurun kura denem Herot belen Yesuyen alya bereya sios bulun yire yenbe fulen marmin yad yerke kun kuramiŋ yawaramiŋ.

² Yawarkeb Herot belen fulen marmin yinkeb Yon itiŋ Yemsbe fulenare niŋ bidila po mayke kamiŋ.

³ Be, Herot belen mata tiyyin goke Yuda mar belen aman heke yenenbe Pita wor Yems irmin gwahade ire yenbe fulen marmin yinke ten fere tiyamin. Goyenbe Yuda marte dula nalu kurun kura beret yis minmon nen hanyen goyenterbe Pita fere tiyamin.

⁴ Irdeb koyare kerdeb, mongo busaharyen yenbe Herot belen fulen marmin 16 hulyan yirdeb, “Al sipte belen wa doyan irnayin. Irdeb nalumin hubu hekeb al sipte kura belen wor kun gasunmin ten Pita go doyan irnayin. Gwahade po ten hinayin,” yinyin. Herotbe Pasoba* dula nalu goyen hubu heke gab Pita go sinare takten kawan alya bereya dilingde maymeke kamyen yen nuryin.

⁵ Goke tenbe Herot belen fulen marmin yinke Pita goyen koyare po kerde doyan irde hinhan. Gega siosbe Al Kurun belen faran uryen yen gusunan irtinde hinhan.

⁶ Be, gisebe mayteke kamyen yen nuramin goyen wawunbe Pitabe fulen mar irawa kahalte firtingde hinhan. Irde fulen mar irawa hoyanbe yamere huwarde doyan hen hinaryum. Pita gobe hinhan gwahade po sen belen hanin yase belen fen ten tukun fulen al kurate haninde fen titin

* **12:4:** Bikken Israel mar Isip nanja tubul ten Kenan kunin tiyamin yabe Al Kurun belen sipsip al dirin dirnen gasa yirde darim yade yame kantayan sam yirnayin yinyin. Munan al kura gwaha ma tiyamin marbe Al Kurunen miyon belen wanbe mel gote urmin matalinja dapnamin matalinja goyen tumnan gasa yirke kamamin. Gega meremin gama iramin marbe miyonmin belen yubul tiyamin goke dufay hen hen ge dula mata ten hinhan.

hinhin. Be, hanin tapa wor gwahade po irtin hinhin.

⁷ Irkeb al kura mata gwahade forok yewen tiya yen ma nurde hikeya Al Kurunyen miyon belen al yad fere yird yird ya bana gon forok yirin. Irkeb ya bana gonbe fay urde wuk yen tukurin. Irkeb Al Kurunyen miyon goreb Pita gegelhek belen tur irde isan henbe, “Aran huwara!” inyin. Gwaha inkeb goya goyen po sen haninde fere titin hinhin goyen suk yen kataryum.

⁸ Irkeb Al Kurunyen miyon belenbe, “Kahanbasangeya ulinhorge binde ninya yad hor yira,” inyin. Irkeb Pita go gwaha tiyyin. Irkeb sopte po, “Ulinhorge kurun sinare nin go wor ulger kerde gama nira,” inyin.

⁹ Be, Pita go Al Kurunyen miyon goyen po gama irde sinare kurkurin. Goyenpoga Al Kurunyen miyon belen mata ten hinhin gobe fudinde farnende yen ma nurde hinhin. Yenbe yuwarwarte ten hime yen nurde hinhin.

¹⁰ Be, Al Kurunyen miyonya Pitaya go fulen mar mehende nin goyen fole yirde kun kura goyen wor fole yirde kun funanbe taun bana hurkun hurkun yame kurun ain belen po irtinde gor huwararyum. Irkeb yame go momnonde hol yeke kwaryum. Be, mun kura kutnen tenbe goyare po Al Kurunyen miyon gobe unkel kurin.

¹¹ Irke gab Pita gobe bin bak yeke, “Gabe farnende be! Yuwarwarte mon. Yuda marbe ne nin Herot belen mayde gwaha kura ira yen kentek yen nurde han gega, fudinde wor po Al Kurun belen miyonmin hulyan irke wan nad sina

nira,” yiriŋ.

¹² Irde biŋ bak wor po yeke Yon al belen Mak inen hinhan gote miliŋ Mariayen yare kuriŋ. Yare gorbe al budam gabu irde Pita goyen faran uri yen Al Kurun gusunan irde hinhan.

¹³ Be, Pita go kunbe yame mayyiŋ. Irkeb meten bere kura denem Roda belen yame hol ire yen kuriŋ.

¹⁴ Gega Pita belen yame mayde mere tiyyiŋ goyen nurde aman wor po henbe yame hol irde miŋmon, kup yen mulgan henbe al gabu irde Al Kurun mere irde hinhan mar goyen, “Melya, Pita wan yamere hi!” yinyiŋ.

¹⁵ Irkeb mel goreb, “Kukuwa haha?” inamiŋ. Gega, “Mon, fudinde wor po Pita be,” yen parsay po hiriŋ. Irkeb, “Mon, yende miyon wet?” inamiŋ.

¹⁶ Gega Pita go yame mayde ma nurtiŋen po tiyyiŋ. Irkeb yame hol irdeb Pita kenenbe tulfut yamiŋ.

¹⁷ Irkeb haniŋ po tunan ten, “Mere ma,” yinenbe Al Kurun belen ten siŋa iryiŋ goyen momon yiryiŋ. Irdeb, “Yemsya dininiŋ Yesu gama irde hitiŋ mar hoyan wor ne hitte mata forok yihi gake bebak yirnayiŋ,” yinenbe tiyun hoyande kuriŋ. Be, Yems gobe Yesu kuliŋ irde Yerusalem niŋ sios gote doyan al hinhin.

¹⁸ Be, fulena mar Pita doyan irde hinhan mar gobe wampot huwardeb bana gon yen ge nankenen tukamiŋ. Gega bepyan miŋmon, hubu wor po. Niŋgeb gwaha kura tiya yen ma nurde nakanak ten kanduknen nuramiŋ.

19 Be, Herot belen mere momon go nurdeb fulenja marmin yinke Pita keramin ya bana kurun goyen nankenen tukamin. Gega go ma po kenkeb Herot belen Pita doyan iramin mar goyen, “Wawunbe daha tahan?” yinen gusunon yirdeb bin ar yeke Pita doyan iramin mar goyen gasa yirke kamamin.

Herot kamyin

Be, go kamereb Herot go Yudia nanare matbe Sisaria taunde kurkun gor mun kura hinhin.

20 Be, goyenterbe Tairya Saidonya taunde nin mar belen Herot daha wet kura iramin. Irkeb Herot gobe bin ar yeke ingin ma nurde yunen hinhin. Be, taunde gor nin marbe Herot belen doyan irde hinhin nanare mat binje yade hinhan geb, Herot bin ar yen hinhin goke kanduknen nuramin. Ningeb Herotya awalik hen hen belen nin nankenenbe taunde gor nin mar kura belen Herotyen meten doyan al kura Blastus hitte kwamin. Kunbe mel goya Herotya kanduk minyan hinhan goyen sope irde awalik hini yen Blastus inke ingin nuryin. Irdeb yen belen kun Herot inke yen wor ingin nuryin.

21 Be, Herot belen Tairya Saidonya taunde nin mar mere yire yen nalu kiryinde goyenter hekeb doyan mar karkuwan de umja tenbe gote keperd keperd gasunde keperde alya bereya mere yiryin.

22 Irkeb taunde gor nin mar belen turun irde hekhok ten epte ma tenbe, “Gab al belen ma mere tiya! Al Kurun belen mere tiya!” yen kinjabon tiyamin.

²³ Be, Herot gob alya bereya belen gwaha inke aman henbe Al Kurun ma kasor iryin. Irkeb goke tenbe goya goyen po Al Kurunyen miyon belen wan mayke katiyn. Irkeb goyare po kundu belen dilin gergen hikeya nen naforok irke kamyin.

²⁴ Be, Herot belen sios bulun irde hinhin gega, Al Kurunyen merebe kurun hen tukurin.

²⁵ Be, Banabasya Solya Yerusalem kwaryum goyen metenmin pasi irdeb Antiok mulgan haryum. Mulgan hen henryabe Yon, Mak inen hanyen goya tumnan Antiok kwamin.

13

Holi Spirit belen Banabasya Solya basina yiryn

¹ Be, Antiok taunde gor nin Yesuyen alya bereya sios bana gonbe Al Kurunyen mere basan maryabe saba mar kura hinhan. Go mar gote denembe Banabas, Saimon al belen Niger inen hinhan, irde Sairini taunde nin al Lusiusya, Manainyabe Solya. Manain gobe Galili nana gote doyan al kurun Herotya tumnande paka yirke karkuwan haryum.

² Be, kurarebe go mar goyen bingge kutna irde Doyan Al Kurun dolon irde hike Holi Spirit belenbe, “Banabasya Solyabe metenne ten hiriryen yen basina yirmirin. Ningeb yapat yirkeb yenbe hoyan mun po meten tiyiryen,” yinyin.

³ Irkeb mel go kutnare hen Al Kurun mere irde hinhan goyen kamereb irem go hende hanin yerde Al Kurun gusunan irdeb yubul tike Antiok taun go tubul ten kwaryum.

Banabasya Polyabe Saiprus motmotde kwaryum

⁴ Be, irem go Holi Spirit belen bul yirke Selusia taunde kurkaryum. Irdeb gor mat hakwa tenbe Saiprus motmotde kwaryum.

⁵ Kun Saiprus motmotde forok yenbe Salamis taunde kwaryum. Gorbe Yuda marte gabu yayan kunbe Al Kurunyen mere tagalde hinaryum. Irkeb Yon, Mak inen hanjen gobe irem go faran yurde hinhin.

⁶ Go kamereb Salamis taunde matbe Saiprus motmot murun kurhan Pafos taunde kun forok yaryum. Gorbe Yuda mar al kura kalga mataya soya mataya ten hitin al goyenbe Al Kurunyen mere basan hen tagalde hime yen al usi yirde hinhin. Denembe Ba-Yesu.

⁷ Al gobe gor nin gabman doyan al Sergius Paulus goyen meten faran urde hinhin. Sergius Paulus gobe dufaymin wuk yitin ningeb, Al Kurunyen mere nure yenbe Banabasya Solya nin keya hirin.

⁸ Gega Ba-Yesu, Grik mere mat Elimas inen hanjen gore irem goke igin ma nurde asogo yirdeb Sergius Paulus goyen daha Yesu nin dufaymin sanin iryenkek yenbe petpet irde hinhin.

⁹ Irkeb Holi Spirit belen Sol, Pol inen hanjen goyen hard unke Elimas kimin mat,

¹⁰ “Gebe mata igin kurun gayen asogo irde al mata igin gama irnin tike usi yirde pet pet yirde ha. Irde Doyan Al Kurunyen mata fudinde goyen bulun irde ha goyen tubul ma ten ha. Ningeb gebe Satanyen mata po ten ha.

¹¹ Goke tenbe hanjka gabe Al Kurun belen mata bulunje gote damum gunen tiya. Ningeb delge titmin hiyyen. Irkeb sobamde yara po det kura epte ma yenayin,” inyin. Irkeb goya goyen po gagap yara kidomak kura gore wan dilin pet tiyyin. Irkeb dilin titmin hekeb ganun belen hanner nade belen nikala niryen yen sapsap tiyyin.

¹² Irkeb Sergius Paulus gobe mata forok yirin goyen kinyin. Irde Doyan Al Kurun nin saba tagalde hinaryum go nurdeb dinon kok yirin. Irdeb Yesu nin dufaymin taren iryin.

Banabasya Polya Pisidia nanare nin taun kura Antiok kwaryum

¹³ Be, Polya dinun waranya go Pafos taunde mat hakwa tenbe Saiprus motmot go tubul ten Pamfilia nana bana nin taun Perga kwamin. Gega Yon, Mak inen hanjen gobe gor mat irem go yubul ten Yerusalem mulgan hen kurin.

¹⁴ Be, Polya Banabasya gobe Perga taunde matbe taun kura Pisidia nana bana gon nin taun Antiok inen hanyende gor kwaryum. Irdeb Yuda marte usan nalu Sabat goyenter gabu yaminde gor hurkun keperaryum.

¹⁵ Be, Yuda marte tikulaya Al Kurunyen mere basan mar belen asande katin goyen kura kapyan henbe gabu iramin gote doyan mar belen irem goyen yenenbe, “Irem, derbe alya bereya gar nin taren hinayin yen faran yurtek saba kura hi kenem igin saba yiriryen?” yenbe al kura hulayan irke kun momon yiryin.

¹⁶ Irkeb Pol belen huwarde merene nurnan yenbe haniñ po tunañ tiyyiñ. Irdeb gaha yinyiñ: “Den Yuda marya Yuda mar moñ gega, Al Kurun dolon irde hañ mar, ga nurnan ko.

¹⁷ Yuda marte Al Kurun belenbe asininiñ yago goyen basaña yirdeb yende alya bereya yiryiñ. Irdeb bikkeñ nañam tubul teñ kuñ Isip marte nañare hikeb yingen farañ yurde sañiñ yirkeb almelmiñ kurun forok yiriñ. Kamebe nañamde yumulgañ tiye yenbe Al Kurun belen yingenñde tareñde po yirkeb Isip tubul tiyamiñ.

¹⁸ Belen kuñ henya al ma hitek naña bana dama 40 gayen mata bulun bulun kurun teñ hikeb Al Kurunbe biñ misin bulun wor po kateñ hinhin gega, mel go yubul ma teñ hinhin.

¹⁹ Irdeb Israel mar go Kenan naña bana hurkukeb Al Kurun belen megen goyenter hinhan mar almelmiñ 7 gayen gasa yirde bulun bulun yiryiñ. Irdeb megenminbe huginen ge yende alya bereya niñ tubul teñ yunyiñ.

²⁰ Be, hakwaniniñ yago Isip kwamiñde mat kuñ kuñ mulgañ hen Kenan megenñde sopte wayamiñ gobe dama 450 bana gayen mata kurun goyen forok yamiñ.

“Be, Yuda mar go kuñ megen yade keperke yenenbe Al Kurun belen alya bereya doyañ yirde hinayin yen doyañ mar yade forok yiryiñ. Kuñ kuñbe Al Kurunyen mere basañ al Samuel forok yen doyañ yirde hinhin.

²¹ Irkeb goyabe Israel mar belen doyañ al kurun hoyañ niñ gusañ iñamiñ. Irkeb Al Kurun belen Benyaminyen minde niñ al kura denem Kis gote

urminj Sol yunke yen belen Israel marte doyanj al kurun hen dama 40 gayen doyanj yirde hinhin.

²² Be, Al Kurun belen Sol go bulunj tike takira tenbe Dewit ten gasun wol kirijn. Yen gebe Al Kurun belen gaha yirin: ‘Yesi urminj Dewitbe bubulkunne wor po. Amanen nurde unenj hime. Dufayne kurun kerde hime gayen yen belen gab gama irde pasi iryen,’ yirin.

²³ Ningeb Al Kurun belen binj ten mere tiyyin goyen po gama irdeb gogo Dewityen minde mat alya bereya Al Kurun hitte Yumulgan ten ten Al Yesu Israel mar hitte ten kerke wayyin.

²⁴ Yesu go forok yen metenminj ma minj uryinyabe Yon Baptais belen wa mehen hen alya bereya mata bulunminj yubul ten Al Kurun ninj binj mulgan hen baptais tenayin yen Israel mar tumnanj saba yirde hinhin.

²⁵ Yon go metenminj kunj pasi irtek binde hen hikeb gaha yirin: ‘Nebe ganun yen nurde nunen hanj? Dumulgan ten ten Al wake kenteke yen doyanj irde hanjen al gobe ne gago monj. Yenbe ne kamere wayyen. Ne al gahade munj gare epte ma kahanj basanminde ninj kanj yugu tiyen,’ yirin.

²⁶ “Ningeb, kadne yago, Abrahamyen minde ninj marya den minjin hoyan Al Kurun kafura irde yende mere po nurde hanj mar, ga nurnan ko. Dumulgan ten ten mere gobe nenj tumnanj gake ten kerke wayyin.

²⁷ Gega Yerusalem marya doyanj marminya belen Yesu goyen kenenj bebak ma tiyaminj. Mel gobe Sabatminj Sabatminbe Al Kurunyen mere basan mar belen mere asande katinj goyen

kapyan hen hinhan gega, mere gote min bebak ma ten hinhan. Irdeb Yesube bulun usi ten mayteke kami yen mere mayamin. Mata tiyamin gobe Al Kurunyen mere basan mar belen kame mata gwahade forok yiyyen yitin goyen po forok yirin gogo.

²⁸ Yesube titminen wor po, min minmon maynin yen Pailat gusunen iramin.

²⁹ Be, he hende mayke kamkeb faran tenbe tukun mete tiyamin. Be, mata tiyamin kurun gobe Yesu nin ten Al Kurunyen mere asande katin goyen gwahade po forok yirin.

³⁰ Goyenpoga bida ma hirin. Al Kurun belen isan heke huwaryin.

³¹ Go kamereb yenya Galili nana bana mat Yerusalem kun mulgan hen hinhan mar goyen hitte wawun budamde forok yeke kenamin. Ningeb gayenterbe mel goreb Yesu nin Yuda mar saba yirde han.

³² Ningeb deyya belen mere igin Yesu nin yitin goyen momon dirde har gago. Be, bikken Al Kurun belen asininin yagot dilinde bin tiyyin.

³³ Irdeb gote iginenbe nen dirnen wen hitte forok ire yen Yesu kamtinde mat isan hirin. Yesu goke Al Kurun belen mere tiyyinbe Tikin Asande gahade katin hi:

‘Nebe nanake. Ningeb urne ge nin amanen nurd gunen hime,’ yitin. *Tikin 2:7*

³⁴ Be, Al Kurun belen Yesube bida ma hiyyen yen isan heke huwaryin gobe Al Kurunyen mere basan al Aisaia belen asande gahade kayyin:

‘Ne belen Dewit hitte bin timirin goyen fudinde

wor po gama irde guram girde taren giren.
Guram giren gabe megen nin al kura belen epte
ma gwaha girtek,' yitin hi. *Aisaia 55:3*

³⁵ Irde Tikin Asandebe Dewit belen Yesu bida ma
hetek goke,

'Meten alge gigen tapat irde basina irtin gobe epte
ma bida hiyyen,' yirin. *Tikin 16:10*

³⁶ Al Kurun gwahade mere iryin al Dewit
gobe Al Kurunyen dufay kurun goyen pasi irdeb
kamyin. Irkeb tukun asem yagot dumunde
kerkeb bida hirin.

³⁷ Gega Al Kurun belen isan hirin yen hite al
Yesu gobe bida ma hirin. Hubu wor po.

³⁸ Ningeb al kura yen ge dufaymin sanin
iryenbe Al Kurun belen mata bulunmin halde
unyen. Gote sabaminbe gago tagalde har.

³⁹ Ningeb, kadne yago, denbe Mose belen tikula
kayyin goyen gama irteke gab Al Kurun belen
mata bulun minmon al huwak dinyen yen nurde
han? Mon, epte mon! Goyenpoga al kura Yesu
nin po dufaymin taren iryen gobe Al Kurun belen
mata bulun minmon, al huwak yen kinyen.

⁴⁰⁻⁴¹ Be, Al Kurunyen mere basan mar belen
asande gahade katin hi:

'Den sukal ten hanyen mar, nurde ga hinar ko.

Den gayenter nin mar hitte det kura forok
iren.

Irde mata gob al belen kenen momon dirnayin
gega, usi yen nurnayin.

Ningeb denbe kame gab kenen diltin fot yemanbe
kamnayin,' yen kayamin. *Habakuk 1:5*

Ningeb mere gate iginen den ultinde forok yenak geb, kenkela hen hinayin,” yinyin.

⁴² Be, Polya Banabasya Yuda marte gabu ya goyen tubul ten kat sinare kuren tikeb gor nin mar beken, “Sabat nalu kura imoyenterbe wan saba dirhar gayen teban saba dirke nurtek,” yinamin.

⁴³ Irde gabure gor mat sinare kunbe Yuda marya al min hoyande nin Yuda mar mon gega, Yuda marte mata gama irde hanjen mar goreb Polya Banabasya gama yirde kwamin. Irkeb irem goreb mel go mere yirde taren yirye yenbe, “Al Kurun belen buninen nurde dunen faran durde hi geb, huginen yen ge po nurde gama irde hinayin,” yinaryum.

⁴⁴ Be, kun sopte Sabat nalu hekeb taun bana gor nin mar gobe Al Kurunyen mere nurnin yen al budam wor po wan Yuda marte gabu yare gor gabu iramin.

⁴⁵ Irkeb Yuda mar Pol nin ingin ma nuramin gore al budam gabu iramin goyen yenenbe danin nenbe gwahade mon yen bin ar yamin. Irdeb Pol belen mere ten hinhin gobe usi ten hi yen sukal iramin.

⁴⁶ Gega Polya Banabasya gobe kafura ma henbe, “Al Kurunyen merebe den Yuda mar wa nurnayin yen gogo momon dirarun. Gega harhoktin unenbe epte ma Al Kurunya huginen hitek yahan geb, gayenterbe epte ma den momon diryen. Gwaha titnenbe al min hoyan Yuda mar mon po gab kun momon yirde hiren tahar geb.

⁴⁷ Al Kurunyen mere tukun Yuda mar mon

hitte kun tagaliryen dinen Doyan Al Kurun belen meremin asande hi goyen dunyin. Merembe gahade:

‘Gebe hulsi yara hen al min hoyan Yuda mar mon hike kwa kurun gayen ne belen yumulgan tiyen mere goyen momon yirde tukayin.

Irkeb bin bak yekeb ne belen yumulgan tiyen,’
yitin hi,” yaryum. *Aisaia 49:6*

⁴⁸ Be, al min hoyan Yuda mar mon belen irem go mere tiyaryum goyen nurdeb aman henbe Al Kurunyen mere palap iramin. Irdeb alya bereya Al Kurun belen yingenya huginen hitek yen basin yirtin marbe tumnan Yesu nin dufaymin sanjin iramin.

⁴⁹ Be, Al Kurunyen merebe nana bana kurun go tagal tukuke nurtin ala tiyamin.

⁵⁰ Gega Yuda mar belen taunde gor nin doyan marya bere samun minyan Yuda marte tikula gama irde hinhan goyen bin yakamamin. Irkeb mel goreb taunde gor nin mar kura yinkeb Polya Banabasya gasa yirnin yen bulun bulun yirdeb, “Taun gayenter ga hen ma!” yinen yakira tiyamin.

⁵¹ Irkeb gor nin mar goyen mata bulun tihit yen bin bak yenan yenbe yende matare kahan de tupi busan henbe Antiok taun go tubul tenbe Aikoniam taunde kwaryum.

⁵² Be, Antiok nin mar Yesu nin dufaymin taren iramin gobe Holi Spirit belen ketal yurke aman hen hinhan.

14

Polya Banabasya Aikoniam taunde kwaryum

¹ Be, Polya Banabasya gobe ten hinaryum gwa-hade po Aikoniam taunde gor manan Yuda marte gabu yare kun saba kenkela po tagalke Yuda marya al min hoyanya goyen budam wor po Yesu nin dufaymin taren iramin.

² Gega Yuda mar kura mere go igin ma nuramin mar goreb al min hoyan Yuda mar mon bin yakamkeb Yesu nin dufaymin sanin iramin mar goyen asogo yiramin.

³ Ningeb asogo yirde hinhan goyen fole yirtek yenbe Polya Banabasya go nalu budam po gor henbe kafura ma henya Doyan Al Kurun belen alya bereya buniyen nurde faran yurde yawarde hinhin goke tagalde hinaryum. Irkeb gor nin mar gore fudinde yenan yenbe irem gobe Doyan Al Kurun belen taren yirke mata tinen kurayen kurayen forok yirde hinaryum.

⁴ Irkeb taun goyenter nin mar kurabe irem goke hamin. Munan kurabe Yuda mar nin hamin.

⁵ Irkeb Yuda marya al min hoyanya goyen doyan marminya gabu irde irem go hora po gasa yirteke kamiryen yen mere sege iramin.

Polya Banabasya Listra taunde kwaryum

⁶ Gega irem gobe mere go nurdeb busaharde Likonia nanare nin taun irawa kura Listraya Derbiya gor kwaryum. Irdeb nana bana go nin taun binyan wor kwaryum.

⁷ Kun gonbe mere igin Yesu nin yitin goyen tagalde tukun hinaryum.

⁸ Be, Listrabe al kura kahan simsimam goyen gor hinhin. Yenbe kawan hiriŋde mat po mun kura ma huwarde kuŋ hitiŋ.

⁹ Al goyen keperdeb Pol mere ten hinhin goyen keŋkela palŋa irde hinhin. Irde al gore Polyen mere go fudinde yen nurde biŋ hek irke keneŋbe Al Kurun belen amanen nurde sope iryen yen nurdeb Pol belen diliŋ bilmiŋde po keŋkela irdeb,

¹⁰ “Huwara!” inyiŋ. Irkeb bemel po huwarde kuŋ wan tiyyiŋ.

¹¹ Be, al buda kurun gore Pol mata tiyyiŋ go keneŋbe yende mere mat po, “Baran marniniŋ al fakunŋde heŋ katahar!” yen wenwon tiyamiŋ.

¹² Irdeb Banabasbe Sus inamiŋ. Munan Polbe tonan al heŋ mere ten hinhin goke tenbe Hermes inamiŋ.

¹³ Be, Sus doloŋ ird ird yabe taun siŋare hinhin geb, Sus doloŋ ird ird mata doyan alya taun goyenter niŋ marya belen Banabas goyen Sus usi tenbe bulmakaw al diriŋ yade umŋa gitik ten yukun kumga ten irem go doloŋ yirniŋ yen taun yame kurunŋde gor yawayamiŋ.

¹⁴ Irkeb Yesuyen mere basan mar Banabasya Polya gobe gwaha tiniŋ tahaŋ yeke nurdeb danin goya gwaha tiniŋ tahaŋ yen buniŋen wor po nurdeb uliŋhormiŋ erek yirde kup yen kuŋ al buda goyen kahal bana heŋbe,

¹⁵ “Danin gwaha ten haŋ? Deyyabe al den yara po geb! Deyyabe Al Kurun gwahader hitiŋ nanŋiŋ, megen, makanya det kurun gayen yiryiŋ al gote mere igiŋ gayen momon dirye yen wayaruŋ. Irkeb mata kukuwamnen miŋ miŋmon

ten han gahade gayenbe yubul ten Al Kurun hitte mulgan henayin.

¹⁶ Bikkenbe Al Kurun belen megen nin al tumnan gayen go ma nurde unen hikeb okohom po yubul tike dufayminde po kun hinhan.

¹⁷ Gega Al Kurunbe buninen minyan geb, huginen po ma yubul tiyyin. 'Gwaha yirmeke Al Kurunbe fudinde hi yen bin bak yenayin,' yenbe det igin igin yunen hiyen. Naninde mat kigarin yunen hiyen. Irde bingebe naluminde yunen hiyen. Irde binge budam yunenbe binde wor aman po makin yirde hiyen. Irde den manan gwahade po dirde hiyen gega, Al Kurun nin ma nurde han," yinen kwep kwep tiyaryum.

¹⁸ Be, irem gore gwaha yaryum gega, al buda gobe bebak ma ten dapna gasa yirde irem go galak yirde dolon yirnin yen kimnen po hamin.

¹⁹ Be, Yuda mar kura Pisidia nanare nin taun kura Antiokya Aikoniamya mat Listra taunde wanbe al buda kurun gor nin goyen wor bin yakamamin. Irkeb Pol goyen hora po mayamin. Irde kama yenbe tulun ten taun sinare tukun tubul tiyamin.

²⁰ Gega kamere Yesu nin dufaymin taren irde hinhan mar belen wan gabu irde kalyan kerde hikeb geren hen huwarde sopte taun bana gon hurkurin. Be, fay urkeb yenya Banabasya Derbi taunde kwaryum.

Polya Banabasya Siria nanare nin taun kura Antiok mulgan haryum

²¹ Be, Polya Banabasya gobe Derbi taunde kunbe Yesu nin mere igin goyen tagalke alya

bereya karim ma Yesu niŋ dufaymiŋ saŋiŋ iramiŋ. Be, go kamereb irem go mulgaŋ heŋ Listra taunde kwaryum. Gor matbe Aikoniam taunde kwaryum. Irdeb Aikoniam matbe Pisidia naŋare niŋ taun Antiok taunde kwaryum.

²² Taunyaŋ goyen kuŋ heŋyabe alya bereya Yesu niŋ dufaymiŋ tareŋ irtiŋ mar goyen, “Kame Al Kuruŋ hitte kuniŋ yeŋbe okohom ma kutek. Kanduk kurayen kurayen yeneŋ gab kutek. Niŋgeb tareŋ po heŋ Doyaŋ Al Kuruŋ niŋ dufaytiŋ saŋiŋ iraŋ goyen tubul ma tinayiŋ,” yineŋ saba yirdya yirdya kuŋ hinaryum.

²³ Kuŋ heŋyabe taun kurar niŋ kurar niŋ al kura Yesuyen alya bereya sios gote doyaŋ mar yirde kuŋ hinaryum. Irde biŋge kutŋa irde Al Kuruŋ mere irde heŋyabe doyaŋ mar Al Kuruŋ niŋ dufaymiŋ hek irde hinhan mar goyen Al Kuruŋ belen doyaŋ yirde hiyeŋ yeŋ Al Kuruŋ haniŋde yerde hinaryum.

²⁴ Be, irem go Pisidia naŋa bana goŋ meten teŋ kuŋ kuŋbe Pamfilia naŋare forok yaryum.

²⁵ Irdeb kuŋ Perga taunde Al Kurunyaŋ mere tagalde Atalia taunde kurkaryum.

²⁶ Irde Atalia taunde matbe hakwa teŋ mulgaŋ heŋ Siria naŋare niŋ taun Antiok kwaryum. Taun goyenterbe haŋkapy a Yesu niŋ dufaymiŋ tareŋ irde hinhan mar belen meten goyen tiyiryen yineŋ Al Kuruŋ belen buniŋen yirde faraŋ yurde hiyeŋ yeŋ Al Kuruŋ haniŋde yeramiŋ. Niŋgeb meten go pasi irdeb mulgaŋ heŋ gor po kwaryum.

²⁷ Be, irem go mulgaŋ heŋ kuŋ Antiok forok yeŋbe gor niŋ sios tumŋaŋ gabu yirdeb meten teŋ

kun hinaryum goyen momon yiraryum. Al Kurun belen taren yirde faran yurke daha mat al min hoyan yad yad min uraryum goyen goke kenkela momon yiraryum.

²⁸ Irdeb Antiok gorbe nalu ulyande po Yesu nin dufaymin sanin irde hinhan marya hinaryum.

15

Polya Banabasya Yerusalem kwaryum

¹ Be, Yesu nin dufaymin taren irde hinhan mar kura Yudia nanare mat Siria nanare nin taun Antiok kwamin. Gor kunbe Yesu nin dufaymin taren irtin mar gor nin goyen, “Al kura Yesu nin dufaymin sanin irtin gega, Yuda marte tikula Mose belen kayyin goyen ma gama irde guba ma yenayin gobe Al Kurun belen epte ma yumulgan tiyyen,” yen saba yirde hinhan.

² Irkeb Polya Banabasya belen sabamin goyen igin ma nurdeb mere go sopte huwa irye yen mel goya kadom mohonde tiyamin. Gwaha tike yenenbe Antiok nin Yesuyen alya bereya belen, “Yerusalem kun aposel budaya gor nin sios gote doyan maryat mohonde wor po mere gate min kenkela nurde ga wayyi,” yen hulyan yiramin. Irkeb Yesu nin dufaymin taren irtin mar kuraya kwamin.

³ Belenminbe Fonisia nanaya Samaria nanayan kunbe Yesu nin dufaymin taren irtin goyan nin mar goyen al min hoyan Yuda mar monbe daha mat Al Kurun hitte bin mulgan hamin goyen momon yiramin. Irkeb mere go nurdeb aman wor po hamin.

⁴ Be, kuñ Yerusalem forok yamiñ. Irkeb gor niñ siosya gote doyañ maryabe aposel budaya belen amanen nurde yunen gargar yiramiñ. Irkeb Al Kurun belen mel go faran yurde sanin yirke meten ten hinhan kurun goyen tumñande po momon yiramiñ.

⁵ Irkeb Yesu niñ dufaymin taren irde hinhan goyen kurabe Farisi mar ningeb, mel gore nurde huwardeb, “Al kura Yuda mar mon al min hoyande niñ gore Al Kurun gama irnin yenbe nende tikula gama irde guba yenayin,” yamin.

⁶ Irkeb aposel budaya sios gote doyañ marya gore, “Mere gabe kanduknen nurhet niñ, sope irnin,” yen gabu iramiñ.

⁷ Irdeb mere sege irke kuñ kuñ sobamde po hekeb Pita belen huwarde gaha yinyin: “Kadne yago, nende al mon al min hoyan goyen mere igin Yesu niñ yitin goyen nurde yen ge dufaymin taren irnayin yen bikken Al Kurun belen ne Yuda mar al gayen basina nirde hulyan nirke kuñ Yesu niñ momon yirmirin gobe nurde han gogo.

⁸ Al Kurun, alya bereyat dufay kenkela wor po nurd yunen hi Al gore nen Yuda mar wa Holi Spirit dunyin gwahade goyen po al min hoyan wor yunin. Irkeb Al Kurun belen Yuda mar mon wor igin nurde yunen hi goyen bebak titirin.

⁹ Al Kurunbe gwahade goyen po nenya yenya tunande denen hi. Ningeb nende al ma yende al kura Yesu niñ dufaymin sanin iryenbe Al Kurun belen igin ala po mata bulunmin halde pasi iryen.

¹⁰ Nen Yuda marte tikula gobe nenya asininin yagoya belen gama ird ird niñ metenen wor po

nurde hityen. Ningeb epte ma elan urtek gayen daniñbe al miñ hoyan gega Yesu niñ dufaymin tareñ irtin gayen kanduk kurun supahakde ugo-hol tiniñ ten han? Den gayen Al Kurun tunan urnin ten han?

¹¹ Gwaha ma tinayin. Doyan Al Kurun Yesu belen neñ dawaryin gwahade goyen po yen wor buninen nurde yunenbe faran yurde yawaryin geb,” yinyin.

¹² Be, Pita go merem pasi irkeb Banabasya Polya belen wor mere tikeb din den irde palna iramin. Irkeb irem go Yuda mar mon gote nanayan kun meten ten hikeya Al Kurun belen mata tinen kurayen kurayen forok yirde hinhin goyen momon yiraryum.

¹³ Meremin pasi irkeb Yerusalem nin sios gote doyan al kura Yems Yesu kulin belen huwardebe gaha yinyin: “Kadne yago, ga nurnan.

¹⁴ Saimon Pita belen daha mat Al Kurun belen han kapa alya bereya kura Yuda mar mon goyen yawarde dirnen wen yiriyin goyen momon dirke nurhet gogo.

¹⁵ Pita belen momon dira gobe bikken Al Kurunyen mere basan mar belen asande mere katin gote min goyen po momon dira. Merebe gahade:

¹⁶ ‘Ne Doyan Al Kurun gare yen hime.

Kamebe Dewityen min bulun hitin goyen ne belen mulgan hen wanbe sope iren.

Sope irde gabu irmeke teban tareñ hiyyen.

¹⁷ Gwaha irmekeb al hoyan belen ne nin nan kennayin.

Yuda mar moŋ al miŋ hoyan tumŋan
nenenbe biŋ mulgaŋ hekeb nere alya
bereya henayin.

¹⁸ Al Kurun gwaha tiyen yen biŋa tiyyin mere ku-
run goyenbe al belen hakot nurde hinhan
geb,

wan wan gayenter manan nurde hite,' yitin
hi.

Amos 9:11-12

¹⁹ Niŋgeb Yuda mar moŋ Al Kurun hitte biŋ
mulgaŋ hen han mar goyen ingogaha ma yirtek.

²⁰⁻²¹ Gega Yuda marte tikulabe hakot taunyan
taunyan tagalde hinhan. Gayenter wor nen
Yuda marte gabu yaniniŋyan Sabatmin Sabatmin
huginen gwahade po tagalde hanŋen geb, mel go
hitte asan po kan yunenbe, 'Ungura binŋe kan
yuntin goyen go ma nene hinayin, lelep mata
ma ten hinayin, dapŋa kura binŋinde fen tike
kamtin ma haninde yaka tike kamtin gobe go ma
nene hinayin, irde dapŋa dari wor go ma nene
hinayin,' yinen mata gayen po gab utan yirtek,"
yinyin. Irkeb Yerusalem nin siosyen doyan mar
belen Yuda mar moŋ Yesu nin dufaymin sanin
irtin mar hitte asan kayamin.

*Yerusalem nin sios belen Yuda mar moŋ hitte
asan kayamin.*

²² Irkeb aposel budaya Yerusalem nin Yesuyen
alya bereya sios tumŋan goyabe mel gote doyan
mar belen, "Nende al kura basiŋa irde hulŋan
yirke Polya Banabasya irde Antiok kunayin," yen
mere mayamin. Irdeb Yudas denem kurabe
Basabas goya Sailasya yade yapat yiramin. Al

irawa gobe Yesu nin dufaymin taren irde hitin mar gote doyan mar.

²³ Irdeb Yerusalem hinhan mar gore asan katin gobe Antiok kutek mar go yunamin. Asandeb gahade kayamin:

“Nenbe aposel budaya Yerusalem nin sios gote doyan mar gare asan gago kan dunhet.

Denbe Antiok taunya Siria nanaya Silisia nana bana gon nin al Yuda mar mon al min hoyan gega, Yesu nin dufaytin taren irde han. Ningeb nenbe kadtin yago.

²⁴ Be, dende mere momon nurtinbe al kura gar hanjen gore gor kunbe den goyen mere kukuwam mat dirke kanduknen wor po nuran. Go mar gobe nen belen ma hulyan yirteke kwan. Yingen dufayminde kun mere gogo diran.

²⁵ Ningeb goke tenbe nen belen nenya hite mar kura yade kadinin waran wor po Ban-abasya Polya irde den hitte kunayin yen goke mere maytin.

²⁶ Irem gobe Yesu Kristu nin meten ten hike gasa yirde bulun bulun yirke son kamde haryen. Gega goke kafura ma hen metenmin goyen bada ma hen haryen.

²⁷ Be, nende al yad yerteke kuriryen mar gobe Yudasya Sailasya. Irem gore den hitte kun gabe asan bana gan mere kan hite gayen mohonde wor po momon diriryen.

²⁸ Nende dufaybe Holi Spirityen dufayya tunande geb, nen belen Yuda marte tikula goyen tenbe supahaktinde ma ugohol titek. Gobe kan-

duk kurun wor po.

²⁹ Goyenpoga unğura binje kan yuntin gobe go ma nene hinayin, dapña darim ma nene hinayin, dapña kura bininde kan giti irke kamtin ma haniinde yaka tike kamtin gobe go ma nene hinayin, irde leplep mata ma ten hinayin. Mata bulun gwahade ma ten hinayinbe igin po hinayin geb. Merenininbe gago po,” yamin.

³⁰ Be, mel go asan go tukun Antiok taunde forok yamin. Forok yenbe gor nin Yesuyen alya bereya gabu yirdeb asan go yunamin.

³¹ Yunkeb asan go kapyan hamin. Irde mere asande hi gore dufaymin sanin irke aman wor po hamin.

³² Irdeb Yudasya Sailasya wor Al Kurunyen mere basan mar geb, Antiok nin alya bereya Al Kurun nin dufaymin taren irde hitin goyen sanin hen hen ge faran yurye yenbe nalu ulyande po gor hen saba yirde hinaryum.

³³⁻³⁴ Be, irem gobe gor hen henbe Yerusalem kuren tikeb Antiok nin sios belen gabu irde aman hende yad yerke mulgan hen kwaryum.*

³⁵ Gega Polya Banabasyabe Antiok taunde gor hen Doyan Al Kurun nin taun goyenter nin mar goyen saba yirde hinhan. Irem gobe saba mar kadam budam goya gwaha ten hinhan.

Polya Banabasya bur yaryum

³⁶ Be, Antiok taunde gor hen meten ten tenbe nalu kurareb Pol belen Banabas kenenbe, “Hakot

* ^{15:33-34}: Asan hoyandebe gahade hi: ³⁴ Gega Sailas gobe gor hen yen nuryin.

taunyan kun Doyan Al Kurun nin saba yirde hi-naryum goyen mulgan hen kunbe kaddere yago Yesu nin dufaymin taren irde hitin mar goyen dahade han goyen kun yenye,” inyin.

³⁷ Goyareb Banabasbe, “Yon Mak inen hanjen goyen ten kure,” inyin.

³⁸ Gega Yonbe Pamfilia nanare gor irem go yubul ten busaharyin, irde meten untin goyen go ma pasi iryin geb, Pol belen yenya kun kun goke igin ma nuryin.

³⁹ Irkeb gor matbe irem go kadam mohonde tenbe bur yaryum. Irde Banabasbe Mak ten hakwa hende Saiprus motmotde kwaryum.

⁴⁰ Munan Polbe Sailas ten kwen tikeb dinun Yesu nin dufaymin sanin irtin Antiok hinhan mar gore, “Iginge kuri,” yinen Al Kurun belen doyan yirde hiyen yen Al Kurun gusunan iramin. Gwaha yirde yubul tikeb kwaryum.

⁴¹ Be, Polya Sailasya gobe Antiok taun tubul ten Siriaya Silisiaya nanare kunbe Pol belen gor nin sios goyen taren yirde hinhin.

16

Pol belen Timoti ten kurin

¹ Be, gwaha yirdeb kun Derbi taunde forok yaryum. Gor matbe Listra taunde kwaryum. Gorbe Yesu nin dufaymin taren irde hitin al kura denembe Timoti hinhin. Milinbe Yuda mar bere, irde yen wor Yesu nin dufaymin sanin irde hinhin. Gega naninbe Grik al.

² Be, Yesu nin dufaymin taren irtin mar Listraya Aikoniamya taunde hinhan goreb Timoti al igin inen turun irde hinhan.

³ Irkeb Pol belen Timotiyen mere momon goyen igin nurdeb al go ten kwe yen nuryin. Gega Timoti naninbe Yuda mar al mon geb, guba ma yitin goyen gor nin Yuda marbe nurde hinhan. Ningeb Yuda mar gon hinhan mar gore Timoti kenenbe yen ge igin ma nurd unnayin yenbe Pol belen guba yen unyin.

⁴ Go kamereb Listra taun tubul ten taun hoyanjan wor kwamin. Kun henya be bikken Yerusalem gor aposel budaya siosyen doyan marya gore Yuda mar mon gega Yesu nin dufaymin taren irde hinhan mar goke mere mayde asan kan Antiok nin sios yunamin goyen goke momon yirde kun hinhan.

⁵ Irkeb mere go nurdeb gon nin sios goyen dufaymin sanin hamin. Irde al hoyan tinin manan Yesu nin momon yirke gise han ka al budam yen ge dufaymin taren irde hinhan.

Pol belen yuwarwarte Masedonia al kura kinyin

⁶ Gwaha ten be mel karwo, Polya Sailasyabe Timotiya go, “Esia nanare kun mere igin Yesu nin yitin goyen saba yirnin,” yamin. Gega belenmin goyen Holi Spirit belen pet tike Frigiaya Galesiaya nanare kwamin.

⁷ Gor matbe Misia nanaya Bitinia nanaya gote biptire kwamin. Irdeb Bitinia nanare kunin yekeb goyen manan Holi Spirit belen pet tiyyin.

⁸ Ningeb Misia nana bana gor kun kunbe Troas taunde forok yamin.

⁹ Kun gor henryab wawun kura Pol belen yuwarwarte Masedonia nin al kura kenke huwardeb esen mere irdeb, “Masedonia belen gan wan faran durayin,” inyin.

¹⁰ Be, Pol belen go tagalke nurdeb, “Al Kurun belen Masedonia nin marbe mere igin Yesu nin yitin goyen momon yirnayin yen dikala dira,” yen goyare po gitik ten kunin titirin.

Lidia Yesu nin bin mulgan hiri

¹¹ Be, hakwa kura Troas taunde mat tenbe Samotres motmotde po kutirin. Irdeb fay urkeb gor mat sopte hakwa go hende po Neapolis taunde kutirin.

¹² Gor matbe kahanininde kun kun Filipai taunde forok yitirin. Taun gobe Masedonia gote taun kurunmin. Roma gabmanyen meten marbe gor hen nana go doyan irde hinhan. Nenbe nanahal budam yara gor hinhet.

¹³ Be, Sabat nalu kurarebe Yuda mar belen gabu irde Al Kurun mere irde hinhan gasun nin naninnin yen taun gote yame kurunde mat kat kunbe fete kura gor kutirin. Irde fe sinakde gorbe bere buda kura gor gabu iramin go yenenbe yenya keperde mere ten hinhet.

¹⁴ Gorbe Taiataira taunde nin bere kura denem Lidia wor bana gon hen mereninin nurde hinhin. Yende metenbe amil umnam bukkenya digulakya suluk yirke bukken yara hitin* goyen yirde hike damu ten hinhan. Yenbe Al Kurun dolon irde hinhin geb, Polyen saba go nurde hikeyabe Al

* **16:14:** Amil bukken yara gobe doyan marte amil umna yirde hanjen.

Kurun belen dufaymin fegelkeb saba gote min bin bak yirin.

¹⁵ Ningeb yenya dirinminminya saba goyen fudinde yen nurdeb baptais tamin. Go kamereb yaminde duke yenbe, “Fudinde Doyan Al Kurun nin dufaymin tarej ira yen nurd nunhan kenem wake yaner kunin,” dinyin. Irde dinen teban po dirkeb bada hen kun yenya hinhet.

Polya Sailasya koyare yeramin

¹⁶ Be, kurarebe Yuda mar belen Al Kurun mere irde hinhan gasunde kutirin. Gor kun henya belenbe bere fonen kura kintirin. Yenbe al kurate meten bere, irde damum mon meten ten yunen hinhin. Yenbe ungura belen ketal urtin gore dufay unke al hitte kame da mata forok yenayin goyen goke tagalde hiyen. Ningeb al belen hora unenbe, “Kame ne hitte da mata forok yiyyen?” yen gusanan irde hanjen. Be, yenbe doyan irde hinhan mar gwaha mat hora budam yade yunen hiyen.

¹⁷ Be, bere gore Polya nenya gama dirdeb, “Mel gabe Al Kurun tonnen yan wor po Al gote meten mar. Mel gabe daha mat Al Kurun belen alya bereya yumulgan tiyyen goke momon dirde han,” yen kuware mere ten hinhin.

¹⁸ Be, bere gore huginen wawun budamde gwaha po dirde hinhin. Irkeb wawun kurare kurab Pol go bin ar yeke tigiri tenbe ungura bere go ketal urtin hinhin goyen, “Yesu Kristuyen denemde ginhem. Bere ga tubul ten kat kwa!” inyin. Irkeb goyare po bere go tubul ten kat kurin.

19 Irkeb bere go doyan irde hinhan mar gore hora ten ten belenmin pet tike kenenbe bin ar yamin. Irkeb Polya Sailasya go yanarde yulun ten merere yirnin yen taun gote gabu gasun doyan marmn hinhande gor yukamin.

20 Bere doyan irde hinhan mar belen Filipai taun gote doyan mar Roma gabman al hitte yukunbe, "Al iraw gabe Yuda mar al. Irem garebe nen taun gayen bana nin al bulun dirde har.

21 Yenbe mata hoyan wor po nen Roma mar gahade gare epte ma titek goyen tagalde har," yen tagal yunamin.

22 Be, al buda kurun gor gabu iramin go tumnande asogo yirde gasa yirtek yamin. Irkeb doyan mar belen fulen marmn yinkeb ulinhormin erek yirde yuguya ten yunenbe sikken ulinde yusulak tiyamin.

23 Yusulak ten bulun wor po yirdeb yad koya bana yeramin. Irdeb koya doyan al goyen, "Kenkela doyan yira ko. Monggo, busahariryen geb," inen hayhay iramin.

24 Gwaha inke nurdeb irem go yukun koya bana gon kahalte wor po gwaha mat kura busahartek minmon bana yiryin. Irdeb he hakwa al fere yird yird nin yukun yirtin hinhande gor kahan gor yerde sen po giti yiryin.

25 Be, wawun binde wor pobe irem gore Al Kurun mere irde kasor irde tikin hen hikeb koyare hinhan mar hoyan belen nurde hinhan.

26 Irem go gwaha ten hikeyabe bemel po niniya kurun tikeb koya gote min ansok irde tubul tike yame gor nin tumnan siksuk iramin. Irde sen ko-

yare hinhan mar giti yiramin goyen wor yingen suk yen pasi hamin.

²⁷ Irkeb koya doyan al gore huwarde kunbe yame tumnan hol yitin yenenbe al koyare hinhan marbe busaharhan yen nurdeb fulenare nin bidilamin ten yingen mayen tiyyin.

²⁸ Gega Pol belen aran po kenenbe kwep iryin. “Gigen mayde ma! Nenbe tumnan po hite geb!” inyin.

²⁹ Goyarebe kidoma bana mere irde hinhin geb, koya doyan al gore hulsi nin hoy yirin. Irkeb hulsi tawan unkeb kup yen hurkun irem go dilinge kafura hende ulin barbar yen kun kuku kayyin.

³⁰ Gwaha tenbe sinare yade katyin. Irdeb, “Irem, daha timeke gab Al Kurun belen nawaryen?” yinen gusunan yiryin.

³¹ Irkeb, “Dufayge Yesu Kristu nin po sanin irayin gab Al Kurun belen gumulgan tiyyen. Irde ge nin ten dirinminge tumnan gwaha tinayinbe yen wor yumulgan tiyyen,” inaryum.

³² Irkeb al gore dirinminmin hoy yirke wakeb Polya Sailasya belen tumnande Doyan Al Kurun nin saba yirde momon yiraryum.

³³ Be, go wawun goyen po koya doyan al gore irem go ulinde dariya usuya goyen halde yuntek gasunde yukun halde yunenbe mala tiyyin. Gwaha yirkeb goyare po irem gore mel goyen tumnan baptais yiraryum.

³⁴ Go kamereb irem go yaminde yukun binge yunke naryum. Be, al goya dirinminmin yagobe Al Kurun nin dufaymin taren iramin goke aman wor po hamin.

³⁵ Be, fay urke wampotbe taun gote doyaŋ mar belen, “Koya doyaŋ al go inke al irawa yad fere tiyuŋ goyen yubul tike kuri,” yen fulenja marmin hulyaŋ yirke kuŋ inamin.

³⁶ Irke koya doyaŋ al gore Pol goyen, “Taun doyaŋ mar belen yubul tike kuri ninhan ningeb, iginje bitirin kamke kuri,” inyin.

³⁷ Gega Pol belen hardeb fulenja mar goyen yinyin: “Moŋ, deyyabe Roma mar al gega, kibe dulin wor po min minmon al dilingde dusulak dirde koyare deran. Munan han kabe balmin kuri dinhan? Moŋ, deyyabe epte ma gwaha tiyen. Yinke waŋ yingen dade sinare dukunayin,” yinyin.

³⁸ Irkeb kuŋ taun doyaŋ mar hitte mulgan henbe, “Irem gobe Roma mar al neŋ belen mali gasa yirtek moŋ gega, buluŋ yirtin,” yinkeb kafura hamin.

³⁹ Irde waŋ irem go pohogay yirdeb koyare mat yukun sina yirdeb, “Dubul ten hoyande kuri,” yinamin.

⁴⁰ Gwaha yirkeb katen sinare henbe Lidiyen yare kwaryum. Kuŋ gorbe Yesu nin dufaymin taren irde hinhan mar yenenbe saba yirde sanjin hen hen ge faran yurdeb yubul tiyaryum.

17

Polya dinuŋ waranyabe Tesalonaika taunde kwamin

¹ Be, Polya dinuŋ waranyabe Amfipolis taunya Apolonia taundeya kuŋ gor matbe Tesalonaika

taunde forok yamin. Gorbe Yuda marte gabu ya kura hinhin.

²⁻³ Be, Polbe ten hinhin gwahade po Tesalon-aika taunde gor manan Yuda marte gabu yare kurin. Irdeb Sabat nalu karwo gayen gor kunbe al wan gabu irde hinhan mar goyen Al Kurunyen asande Mesaia kame wayyen yitin al goke momon yirde hinhin. Mesaia gobe ulin misin kurun katen kamdebe huwaryen yitin goyen Al Kurunyen asande mat min pitik irde momon yirde hinhin. Irdeb, “Ne belen Mesaia nin dinen hime al gobe Yesu,” yinyin.

⁴ Gwaha yinke nurdeb Yuda mar kurabe Polyen saba go fudinde yen nurde Polya Sailasyat mere gama iramin. Goyenbe mel go po mon. Grik mar gega Al Kurun kafura irde hinhan goya taun goyenter nin doyan marte berem wen manan budam po gwaha tiyamin.

⁵ Gega Yuda mar kurabe al budam belen irem gote saba po gama irkeb goke bin ar yamin. Irdeb taun bana gon al budam gabu irde hinhan gasunde gor kun al dufaymin bulun goyen gabu yirde fulen tinan yen bin yakamamin. Gabu irke al budam wor po hekeb taun binde gor kwep kwep ten det gwamun tenya tenya kwamin. Irdeb irem go yade yukun kawan alya bereya dilinge yirnin yenbe yen ge ten Yesonyen yare kwamin.

⁶ Gega irem go gor ma yenenbe Yesonya dinun yago Yesu nin dufaymin sanin irde hinhan mar kura yade yulun ten taun doyan irde hinhan mar hitte yukamin. Irde mel goreb, “Polya dinun yagoya gayenbe nan kurun goyen kun henbe kanduk karkuwan forok yirde kun hanjen gore

gar wayan.

⁷ Irkeb Yeson belen yaminde yerde hiyen. Yesonyen yare gabu irde han mar gobe Roma gabmanyen doyan al kurun Sisaryen mere ma gama irde han. Irde, 'Doyan al kurun hoyanbe al kura Yesu inen hanjen go po ga hi,' yen han," yen taun doyan mar dilinde misinen yan po tagalamin.

⁸ Irkeb taun doyan marya al gor gabu iramin mar gobe bin ar yamin.

⁹ Irde Yesonya kadom yagoya goyen, "Mata buluntin goke murungem kerna," yinke gwaha tiyamin. Irkeb, "Kamebe sopte gwaha ma tinayin," yinen yubul tike mulgan hen kwamin.

Polya Sailasya Beria kwaryum

¹⁰ Be, gwaha tiyamin goyen wawun hekeb Tesalonaika nin mar Yesu nin dufaymin taren irtin mar belen Polya Sailasya goyen yad yerke Beria taunde kwaryum. Kun gor forok yenbe Yuda marte gabu yare kwaryum.

¹¹ Beria taunde nin Yuda marbe Tesalonaika nin yara mon. Yenbe irem gore Yesu nin mere tagalde hike aw aw ma yurde palja yirde hinhan. Irdeb irem gote mere gob fudinde ma usi goyen bebak tinin yen Al Kurunyen mere asande hakot katin goyen gise han ka kapyan hen gor nin mere kenen bebak ten hinhan.

¹² Irde gor nin Yuda mar budam Yesu nin dufaymin taren iramin. Goyenbe mel go po mon. Al min hoyan Grik alyabe bere denem hanya goyen wor Yesu nin dufaymin sanin iramin.

¹³ Be, Pol beley Al Kurunyen mere Beria taunde gor tagalde hinhin gote mere momon gobe Tesalonaika nin Yuda mar beley nurdeb gor wor kwamin. Irdeb gor nin mar goyen bin yakamde dufaymin haga yiramin.

¹⁴ Gwaha tike yenenbe goyare po Beria nin mar Yesu nin dufaymin taren irde hinhan gore Pol go ten kerke makende kurkurin. Munan Timotiya Sailasyabe gor po hinaryum.

¹⁵ Be, Pol go al kura beley maynak yenbe yenya kwamin mar gore tukun Atens taunde tubul tiyamin. Irdeb mulgan hinin tikeb Pol beley mel goyen, "Timotiya Sailasya yinke aranen po wan gar nupi tiyiryen," yinyin.

Polbe Atens taunde kurin

¹⁶ Be, Pol go Atens taunde hen irem goyen doyan yirde henyaabe taun binde gor Al Kuruninin usi ten det toney yirtin goyen budam wor po yenen dufaymin kanduknen wor po hirin.

¹⁷ Irkeb Yuda marte gabu yareb nalumde kun Yuda marya Grik marya Al Kurun kafura irde hinhan goya mere ten saba yirde hinhin. Irde gise hanke huginen taun binde al budam kun wan ten hinhande gor kun al gor hinhan goyen Al Kurunyen mere saba yirde hinhin.

¹⁸ Mere igin Yesu nin yitin goyen tagalde henyaabe Yesu mayke kamde huwaryin goyen goke saba yirde hinhin. Goyen saba yirde hikeyabe al kura Epikuriyen dufay gama irde saba ten hanzen marya dufay hoyan kura Stoik yen hanzen gote saba ten hanzen marya gore

Polyen saba goyen nurdeb yenya kadom mohonde tiyamin. Irdeb go mar goyen kura belen, “Al gabe daniŋ malikan lawlaw yen hi?” yamin. Irkeb al hoyan kura belen, “Al gabe tikula hoyan niŋ dinen hi,” yamin.

¹⁹ Gwaha yenbe Atens taunde gor niŋ doyan mar belen gabu irde hanyen gasuŋ Areopagus inen hanyende gor kuŋ ga mere titek inenbe Polya tumnan kwamin. Irde gor kuŋbe, “Saba gergen tagalde ha goyen kenkela minde mat momon dira.

²⁰ Ge belen dufay gergen kura nen ma nurde hityen goyen tagalde ha gote min nurtek ningeb, momon dira ko,” inamin.

²¹ (Be, Atens taun gote min marya al hoyande niŋ wan gor hanyen maryabe dulin po hen dufay gergen po nurtek yirde hinhin. Irde dufay gergen goke po tagalke kuŋ kuŋ wawuŋ yurde hinhin. Huginen gwahade po ten hinhan.)

²²⁻²³ Be, mel gore gwaha inke Pol belen gabu gasuŋ Areopagus inen hanyende gor huwardeb gaha yinyin: “Deŋ Atens niŋ mar! Tauntiŋ bana gayen kuŋ wan ten henyabe deŋ belen doloŋ yirniŋ yen det tonen kurayen kurayen rindam yaŋ yirtiŋ goyen budam wor po yinmin. Gega rinda kurabe det tonen minmon hike kinmin. Irdeb bindere kuŋ gorbe, ‘Rinda gabe Al Kurun kura go ma nurd unen hite gote gasuŋ,’ gwahade katiŋ hi goyen kinmin. Goke ten denbe Al Kurun fudinde doloŋ irtek nurde han yen denen hime. Nengeb deŋ belen kenkela ma nurde unen han Al Kurun fudinde wor po goyen goke momon diren tihim.

24 Al Kurun gobe megenya nanjinya irde det kurun gayen yiriyin. Yenbe megenya nanjinya gote Doyan Al Kurun. Ningeb yenbe al belen dolon irnin yen ya irde unhet yen hanyen bana gon ma hiyen.

25 Yenbe tonninin dunyin geb, gago dilyninin gergen hite. Irde det buda kurun gayen wor yen belen dunyin. Yenbe det buda kurun gote min al geb, det kuran ma amu hen hi. Ningeb det kura hannininde irde untek epte mon. Hubu wor po!

26 Han karya wor pobe yingen al un kuren iryinde gor mat po al min hoyan kurayen kurayen gogo forok yamin. Irde megen ga ten keperde tukamin. Al Kurunbe dufaymin epte. Ningeb nen ma forok yitirinya gwaha nana forok yenayin, irde damde hinayin goyen yingen dufayminde nurde hinhin.

27 Be, Al Kurun gisaw ma hi al gore, 'Det kurun yirmirin gayen al belen yenenbe ganun belen yiriyin yen ne nin sar kernayin. Irdeb nenenbe fudinde yen nurdeb ne hitte wanayin,' yen mata kurun gogo tiyyin.

28 Be, Al Kurunbe gisaw ma hi goke tenbe al kura belen, 'Nenbe Al Kurunyen tarende tonninin yan hen kun wan ten bininin fut irde hite gago,' yirin. Yirin gwahade goyen po dende al kura belen, 'Nenbe Al Kurunyen dirnen wen,' yen tikin bilminde kayyin.

29 Fudinde nenbe Al Kurunyen dirnen wen ningeb, Al Kurunbe al dufayde det tonen kura gol, silwaya hora belen yirtin gwahade yen ma nurtek.

30-31 Bikkenbe Al Kurunbe gwahade yen ma

nurde unenj hinhet gega, goke dinen ma ten hinhin. Gega yen belen nalu goyenter yirinde gorbe megen nin alya bereya tumnan iginya bulunya goyen pota yiryen. Ningeb gayenterbe, 'Megen nin al tumnan mata bulunmin yubul ten Al Kurun nin bin mulgan henayin,' yinen hi. Be, nalu goyenterbe Al Kurun belen basinja irde metenj untin al gore kenkela po megen nin al tumnan pota yiryen. Be, mata gwahade forok yiyyen goyen al tumnan fudinde yen nurnayin yen Al Kurun belen al go kamyinde mat isan heke huwaryin," yinyin.

³² Be, Pol belen Yesu kamde ga huwaryin goke yeke nurdeb, "Al ga usi wet kura dirde hi be," yen hinman iraminj. Munan kura marbe, "Kame ga mere go sopte momonj dirayin," inaminj.

³³ Be, Pol go gabu gasun goyen tubul tenj kurin.

³⁴ Be, gorbe al budam monj, yunkurenj kura gore Polyen saba gobe fudinde yen nurdeb gama irde Yesu nin dufayminj sanj iraminj. Goyen mar goyen kurabe doyan marte gabu gasun Areopagus inen hanjende gor kun hiyen al kura Dionisius. Munan kurabe bere kura denjem Damarisyabe al hoyan kura goya.

18

Polbe Korin taunde kurin

¹ Be, Pol go Atens taun tubul tenbe Korin taunde kurin.

² Gorbe Yuda mar al kura denjembe Akwilaya berem Prisilaya hike yinyin. Be, al gobe Pontus nanare kawan hirin, irdeb kun Itali nanare

hinhin. Gega Roma gabmanyen doyan al kurun Klodius belen, “Yuda marbe Itali nanare nin taun kurun Rom ga tubul ten hoyande kunayin,” yirin. Irkeb ire unya gobe Itali nana go tubul ten Korin taunde wayaryum. Irde gor sobamde ma hikeya Pol wake kenaryum gogo.

³ Be, Akwilabe dapna sikken po sel haran hen hen al. Irde Pol manan meten goyen po ten hora ten hiyen geb, ire unya goya hen tumnan meten go ten hinhan.

⁴ Irdeb, ‘Daha mat kura Yuda marya Grik marya gayen saba yirmeke Yesu nin dufaymin taren yirnan,’ yen Sabat nalumin nalumin huginen Yuda marte gabu yare kun saba yirde hinhin.

⁵ Be, gor hen gwaha ten hikeyabe Sailasya Timotiya gobe Masedonia nanare mat wayaryum. Wakeb sel ya yird yird meten go tubul ten Al Kurunyen mere goyen po tagalde, “Fudinde Yesube Mesaia,” yinen saba yirde hinhin.

⁶ Gega Yuda mar gobe Pol belen saba yiryin go ma nurtek yirke sukal irde hinhan. Irkeb Pol belen mel goyen, “Al Kurunyen mere saba dirde hime gayen ma nurhan geb, kame kanduk kura forok yiyyen gobe dende samun. Neya neya mon. Nebe dubul ten Al Kurunyen mere tukun al min hoyan po ga momon yirde hen geb,” yinenbe mel goyen nindiken bulun tihit yen kenen bebak tinayin yen nurdeb Yuda marte matare ulinhormin busan hirin.

⁷ Irde yubul ten Titius Yastusyen yare kurin. Yamin gobe Yuda marte gabu ya sinakde gor hinhin. Yenbe Yuda mar al mon gega, Al Kurun

dolon irde hiyen.

⁸ Be, gabu yare gor gabu irde hinhan mar gote doyan al Krispusya dirinminmin tumnande Polyen saba nurde Doyan Al Kurun nin dufaymin taren iramin. Al hoyan Korin taunde nin manan budam Yesu nin dufaymin sanin irde baptais tamin.

⁹⁻¹⁰ Be, gor henryabe wawun kura yuwarwarte Doyan Al Kurun forok yenbe, “Nere al budam taun gayenter han geb, al kura belen epte ma mugunen bulun bulun giryen. Irde nebe geya har geb, al saba yird yird nin kafura hen bada ma hawayin. Huginen tagalde po hayin,” inke Pol go kinyin.

¹¹ Be, Polbe dama unjkuren irde gagasi 6 gayen gor hen Al Kurunen mere saba yirde hinhin.

Yuda mar belen Pol merere keramin

¹² Be, Roma al Galio belen Akaia nana doyan irde hikeya gor nin Yuda mar belen gabu irde Polbe Akaia nana gote taun Korin hinhin goyen fere ten merere keramin.

¹³ Merere tukunbe doyan al Galio dilinde gaha inamin: “Al garebe mata hoyan mat Al Kurun dolon irde hinayin yen al saba yirde Yuda marte tikula ma gama irnayin yinen hi,” inamin.

¹⁴ Irkeb Pol belen hako ga mere goyen wol hewen tikeyabe Galio belen Yuda mar go, “Al gare al kura mayke kamun ma mata bulun kura tiyun manhan dende mere ga nurmewon.

¹⁵ Gega mere yahan gabe den Yuda marte deneya mereya nin po kadom mohonde ten han. Irde tikulatin ge po ngak yahan gobe dindiken

po mere go sope irnayin. Nebe meretin gayen go ma nuren,” yinyin.

¹⁶ Irdeb merere mat yakira tenbe, “Sinjare kunnan!” yinyin.

¹⁷ Irkeb Yuda mar go bin ar yeke tigiri ten yende gabu yare gabu irde hanjen mar gote doyan al Sostenes goyen mere gasunde go po mayde mayde keramin. Gega Galiope yenen wasak tiyyin.

Pol mulgan hen Siria nanjare nin taun Antiok kurin

¹⁸ Be, Pol gobe Korin sobamde henbe Siria nanjare mulgan hewe yen Prisilaya un Akwilaya yade gor nin mar Yesu nin dufaymin taren irtin mar go yubul ten makan sinjare nin taun Senkria kurin. Irde gor kwe yenyabe bikken Al Kurun hitte bin tiyyin goke tenbe Yuda marte matare tonan walde gabe hakwa ten kurin.

¹⁹⁻²¹ Be, taun go tubul ten kunbe Efesus taunde forok yamin. Irdeb Pol go Yuda marte gabu yare kun mel gor nin mar goyen, ‘Daha mat kura Yesu nin nurwon,’ yen kenkela po mere yirde hinhin. Gwaha yirde hikeyabe mel gore, “Ulyande hen saba dirde hayin,” inen basina iramin. Gega bada yiryin. Irdeb kwe yenya, “Kame Al Kurun belen sopte kwa ninke gab wayen,” yinyin. Irdeb hakwa ten kurin. Be, Efesus taunde gorbe Prisilaya un Akwilaya goyen yubul tiyyin.

²² Irdeb kun Sisaria taunde forok yirin. Gor matbe kahan de kun Yerusalem forok yen Yesuyen alya bereya sios gor nin yenen mere

yirdeb go kamereb Siria nan̄are niñ taun Antiok kurin̄.

²³ Be, Antiok taunde hit̄en̄ ten̄be sopte Galesia nan̄aya Frigia nan̄aya bana gon̄ kun̄ wan̄ ten̄be Yesu niñ dufaymin̄ taren̄ irde hinhan mar goyen yenen̄ saba yirde san̄in̄ yirde kun̄ hinhin.

Apolos belen̄ al saba yirde hinhin

²⁴ Be, Pol go gwaha ten̄ kun̄ hikeyabe Yuda mar al kura den̄em Apolosbe Aleksandria taunde kawan̄ hiriñ al goyen Efesus taunde wayyin̄. Yen̄be Al Kurun̄yen mere ep hitin̄, irde merem nurdmin̄be pan̄talkek wor po.

²⁵ Yen̄be bikken̄ al kura belen̄ Doyan̄ Al Kurun̄ niñ saba irke nuryin̄. Irdeb Yesu niñ al saba yird yird niñ aman̄en̄ wor po nurde ken̄kela yen̄ ge tagalde hinhin. Gega yen̄be Yon Baptais belen̄ mata bulun̄ yubul ten̄ baptais tenayin̄ yen̄ tagalde hinhin go po ga nurde hinhin. Munan̄ Holi Spirit̄yen baptais Yesu belen̄ yitiñ gobe go ma nurde hinhin.

²⁶ Be, yen̄ belen̄ Yuda marte gabu yare kun̄ gor al gabu irde hinhan goyen kafura ma hen̄ saba yirde hinhin. Irkeb Prisilaya un̄ Akwilaya sabamin̄ go nurdeb yamin̄de tukaryum. Irdeb Apolos goyenbe ire un̄ya gore ken̄kela wor po Al Kurun̄yen mata saba irke nurde bebak tiyyin̄.

²⁷⁻²⁸ Be, Apolos go gor hen̄ hen̄be Akaia nan̄are kwen̄ yirin̄. Irkeb diñun̄ Yesu niñ dufaymin̄ taren̄ irde hitin̄ mar Efesus taunde niñ gore Apolos goyen taren̄ hen̄ hen̄ niñ faran̄ yurde asan̄ kayamin̄. Asan̄ gobe Yesu niñ dufaymin̄ san̄in̄ irtiñ mar Akaia nan̄are niñ gore Apolos

kenenbe igin igin irnayin yen kayamin. Be, Apolos go Akaia nanare kunbe gor nin Yuda mar nin kafura ma hen mel goya kawan gabu irde saba misinen yirde hike gwaha mat kura gor nin Yuda mar belen mere titek mon hamin. Gwaha irde hen yab Yesube Mesaia goyen momon yirde goke Al Kurunyen mere yikala yirde hinhin. Be, Apolos gobe kun gwahade saba yirde hike Al Kurun belen buninen nurde yunen faran yurke Yesu nin dufaymin taren irtin mar goyen sabamin nurde taren hamin. Be, Apolos gobe gwahader po gor nin sios faran yurde hinhin.

19

Polbe Efesus taunde kurin

¹ Be, Apolos gobe Akaia nana bana go nin taun Korin hikeyabe Polbe belenmin Galesiaya Frigiaya dugu bana mat kun kun makan sinare nin taun Efesus forok yirin. Gorbe Yesu nin dufaymin taren irtin mar kura yinyin.

² Irdeb, “Yesu nin dufaymin taren iramin goyenbe Holi Spirit manan tamin we?” yen gusunan yiryin. Irkeb, “Mon, Holi Spirit nin yen ha mere gobe tinen wor po. Ma po nurde hityen,” inamin.

³ Irkeb, “Be, ningeb danin baptais tamin?” yinyin. Irkeb, “Nenbe Yon Baptais belen saba tagalde hinhin gote min po gama irde baptais titirin,” inamin.

⁴ Irkeb Pol gore gaha yinyin: “Yonbe al belen, ‘Mata buluninin yubul ten Al Kurun nin bininin mulgan hihit,’ yeke gab baptais yirde hinhin.

Irdeb, 'Kame Al kura harhokner wayyen al goke dufaytin sanin irnayin,' yirin. Be, Yon belen yirin al gobe Yesu nin yirin," yinyin.

⁵ Gwaha yinke nurdeb, "Baptais Yesu belen yitin goyen tetek," inkeb Pol belen Doyan Al Kurun Yesu denemde baptais yirin.

⁶ Be, baptais yirde mel go hende hanin yerde Al Kurun gusunan irkeb Holi Spirit katyin. Irkeb yende mere mon, mere tinen kurayen kurayen tiyamin. Irde Al Kurun belen mata kame forok yiryen goke tagalamin.

⁷ Be, gorbe al 12 belen gwaha tiyamin.

⁸ Be, Pol go gor gagasi karwo hinhinyabe Yuda marte gabu yare kun kafura minmon gwaha mat bebak tinayin yen mel goya mere tagalde saba yirde hinhin. Mere minbe Al Kurun belen yende alya bereya doyan yird yird mata goke mere tenya saba yirde hinhin.

⁹ Gega tonan taren Yuda mar kurabe Polyen saba goke igin ma nurde Yesu nin dufaymin taren ird ird nin bada hamin. Irde al buda dilingde Yesu gama ird ird mata goyen bulun mat tagalamin. Goke tenbe Pol belen mel go yubul tenbe Yesu nin dufaymin sanin irtin mar go po ga saba nurd nurd ya kurun kura denembe Tiranus gor yukurin. Gorbe nankahalmin nankahalmin huginen Al Kurunyen mere min goyen mel goya tagalde saba yirde hinhin.

¹⁰ Be, Pol gobe dama irawa gor hinhin. Go-yarebe Esia nana bana go nin Yuda marya al min hoyan Grik marya goyen tumnan mere Doyan Al Kurun nin yitin goyen nuramin.

Siwa urmin yago

¹¹ Be, Al Kurun belen Pol goyen tareñmin unke mata tinen wor po kurayen kurayen forok yirde hinhin.

¹² Irkeb Pol belen amilya nufol hal hal amil parwek sisan yurtin goyen wor al belen yukun gore po al garbam minyan sisan yurde hike igin hen hinhan. Irde al kura unguram yan wor gwahade po yirde hike ungura belen al go yubul ten kun hinhan.

¹³ Be, Yuda mar al kura belen ungura al bana hinhan goyen yakira ten ten ge kun wan ten hinhan. Irde mel gore ungura al bana han goyen yakira tinin yen Doyan Al Kurun Yesu denge urde, “Pol belen sabamin tagalde hiyen al Yesu gote denemde dinhet. Kat kunan!” yinen hinhan.

¹⁴ Pris buda gote kurunmin denembe Siwa gote urmin yago 7 goyen manan gwaha ten hinhan.

¹⁵ Be, nalu kurarebe al kura unguram yan al goyen sope irnin yen yaminde kunbe, “Ungura go takira tihit,” yen nuramin. Gega ungura gore wol henbe, “Yesuya Polyabe nurd yunen hime. Munan denbe ganun mar?” yinyin.

¹⁶ Irdeb al ungura ketal urtin gore po al 7 goyen yenala po yirde hikaka yirde gasa polon yirkeb dari sirsir iramin. Irdeb ulinhormin yago erek yirde yugu ten yunkeb kupson busaharamin.

¹⁷ Irkeb Efesus taunde nin Yuda marya al min hoyan Grik marya belen mere momon go nurdeb kafura wor po hamin. Irdeb Doyan Al Kurun Yesu turun iramin.

¹⁸ Irde Yesu nin dufaymin tareñ iramin gega, mata bulunmin yubul ma titin mar budam goyen

goya gab al dilingde matamin kawar tagalde sopte gwaha ma ten hitek yamin.

¹⁹ Irde Yesu nin dufaymin taren irtin gega, mere bal asande katin minyan marbe asanmin goyen yuku kunga tiyamin. Asan kunga tiyamin gote murungembe al 50,000 belen nan kahar un kurende meten tenbe hora tenayin goya tunande.

²⁰ Be, Doyan Al Kurun nin yitin mere gobe gwaha mat sanin hen kurun hen tukurin.

²¹ Be, mata gwahade forok yekeb Pol gobe Yerusalem mulgan hewen yen belenbe Masedoniya Akaiya nanayan kwen yen dufay hirin. Irdeb, "Yerusalem gor hen gabe fudinde wor po Rom manan kwen," yirin.

²² Gwaha yenbe meten marmen Timotiya Erastus ya yad yerke yen wa mehen hen Masedonia nanare kwaryum. Irkeb yenbe Esia nanare gor ulyande yara hinhin.

Efesus taunde kanduk kurun forok yirin

²³ Be, Pol go Esia nanan bana gon nin taun Efesus hikeyabe gor nin al kura belen Yesu gama ird ird mata goke igin ma nurde kanduk kurun forok iramin.

²⁴ Gwaha tiyamin mar al kurabe Demetrius. Yenbe silwa hora belen det yird yird al. Yen belenbe yende ungura birin Atemisya yamin ya gote tonen muknen muknen silwa belen yirke al damu ten hanzen. Irkeb yenya meten marmen ya gobe hora kurun wor po yade hanzen.

²⁵ Gega Pol belen wan Al Kurunen mere kurun irkeb mel gote hora ten ten belen bulun hirin goke bin ar yirin. Ningeb Demetrius gore meten

marminya yen meten ten hinhin gote kadom yago hoy yirke wakeb gaha yinyin: “Mel, meten ten hityen garebe hora kurun tulun ten dunen hiyen nurde han gogo.

²⁶ Gega Pol inen hanjen al gore Efesus taunde gar wan nende alya bereya saba hoyan po yirke yirkeb al budam nende mata yubul tiyan. Goyenbe Efesus taunde gar po mon. Esia nana bana gor nin al manan tumnan gwaha yirun goyen wor dindiken nurdeb kenan. Al goreb, ‘Det tonen kura al belen yirtin gobe Al Kurun fudinde mon,’ yen hi.

²⁷ Ningeb metenninin denem bulun iren tiya. Goyenbe go po mon. Nende tikula kiryin bere Atemis gote tonen goyen kerde dolon ird ird ya gobe alya bereya belen taren minmon yen nurnayin. Irke denem kurun Esia nana banaya megen kurun ga nurd untin ala ten hanjen gobe taren minmon yen nurde unnayin,” yinyin.

²⁸ Be, gwaha yinke nurdeb bin kak hekeb, “Atemisbe Efesus taunde gar nin tikula bere wor po,” yen kwipkwep tiyamin.

²⁹ Irdeb mel gore taunde gor mata kanduknen yade forok yiramin. Irdeb mel gore Polyen meten kadom, Masedonia nana nin al irawa, Gaiusya Aristakusya yade gasa yirnin yirnin yirde yulun ten gabu gasun kurunde tumnan kup yen yukamin.

³⁰ Gwaha yirkeb Pol belen al buda kurun gabu iramin gote dilin mat huwarde mere yire yekeb Yesu nin dufaymin sanin irtin mar belen basinan irde utan iramin.

³¹ Irde Esia nan̄are niñ doyañ mar kurabe Polyen kadom niñgeb, Pol niñ yeñ, “Inke gor ma forok yiyyeñ,” yeñ mere keramiñ.

³² Be, gabu iramiñ mar gobe kukuwa wor po hamiñ. Kura marbe mere miñ hoyañ niñ hewhow teñ hinhan. Munañ kurabe mere miñ hoyañ niñ weñwoñ teñ hinhan. Al budam wor pobe miñ goke gabu irhet yeñ ma nuramiñ.

³³ Be, goyarebe Yuda mar belen sios niñ po mere fuguru tiniñ yeñbe al kura den̄em Aleksanda gare al gabu kurun go diliñ mat huwarde mere yiri yeñbe, “Gwaha gwaha yawayin̄,” inen̄ hulyañ iramiñ. Irkeb al buda kurun go diliñ mat huwaryin̄. Irdeb pal̄a nirnan̄ yeñ haniñ tunañ yiriyin̄. Mere kanduk̄en̄ forok yeñ hi gobe nen̄ Yuda mar belen̄ ma teñ hite yinen̄ tiyyin̄.

³⁴ Gega gabu iramiñ mar belen̄ kenen̄ al gobe Yuda mar al yeñ bebak teñbe, “Atemisbe nen̄ Efesus marte tikula bere. Yeñbe kurun wor po!” yeñ ulyande wor po weñwoñ teñ hinhan. Irkeb al gobe mere titek ma hiriñ.

³⁵ Gwaha teñ hikeb taunde gor niñ doyañ al kura belen̄ mel go, “Balmin̄ hinan̄,” yinen̄be gaha yinyin̄: “Efesus mar, den̄be tikula bere Atemisyeñ ya kurun go doyañ irde han̄yen. Irde hora himam yende tonen̄ yara nan̄kin̄de mat po katiñ goyen ya go bana kerde doyañ irde han̄yen gobe megen niñ al kurun gayen tum̄an̄ nurde han̄.

³⁶ Niñgeb al kura belen̄ usi ma yenayin̄. Niñgeb beken̄de hen̄ dufay ken̄kela hen̄ ga mata tinayin̄.

³⁷ Irem gabe nende tikula bere sukal ma irarun̄. Irde det tonen̄ yirde doloñ yirde hityen gote

yayan samun kura ma kawe tiyarun. Gega dulin wor po gago yulun ten yawayhan. Mata gabe igin mon.

³⁸ Mere gahade nurd nurd nalum yan geb, Demetriusya kadom wenya belen al kura merere yirnin yen nurdeb igin yukunbe mere sope irtek mar dilingde gab tagalke nurnayin.

³⁹ Gega mel gore dufay kernayin goyen igin ma nurnayinbe taunde gor nin mere sope ird ird marte karkuwanmin momon yirke gabu kurun irde gab kanduk go sopte sope irnayin.

⁴⁰ Ningeb hanke gabu irde hekhok kurun tahan gabe min minmon wor po tahan. Ningeb Roma gabman belen denenbe merere dukun gusunan dirkeb daha mat wol hetek? Roma gabman belen den mata tahan gake igin ma po nuryen” yen saba yirin.

⁴¹ Gwaha yinenbe yakira tike bur yen kwamin.

20

Polbe Masedoniaya Grikyana nare kurin

¹ Be, mata kurun go hubu hekeb Pol belen gor nin mar Yesu nin dufaymin taren irtin goyen hoy yirke gabu iramin. Irkeb saba yirde dufaymin taren irde yubul ten Masedonia nare kurin.

² Goyan kun henjabe Yesu nin dufaymin sanjin irtin mar taren hen hen ge faran yure yen saba yirde yirdeb yubul ten kun kun Grik nare forok yirin.

³ Gorbe gagasi karwo hinhin. Irdeb hakwa ten Siria nare kwe yirin. Gega Yuda mar belen

maytek yamin goyen nurdeb mulgan hen Masedonia nanayan mat gab kun Siria forok yewen yen kurin.

⁴ Irkeb Beria taunde nin al Sopater yenbe Pirus urminya, Tesalonaika nin al irawa Aristakusya Sekundusyabe Derbi taunde nin al Gaiusya belen Polya kwamin. Irde Timotiya Esia nanare nin al irawa Tikikusya Trofimusya manan mel goya tumnan kwamin.

⁵ Be, mel go wa mehen hen kun Troas taunde Polya nenya doyan dirde hinhan.

⁶ Munan nenbe, “Yuda Marte Beret Yis Minmon Nen Nen Nalu Kurun” inen hanjen go hubu heke gab Filipai taun go tubul ten makande kurkun hakwa tenbe wawun siptesonon kamereb Troas forok yitirin. Irdeb mel go yupi ten gorbe wawun 7 hinhet.

Polbe Troas kurin

⁷ Be, gor hiteke kun Sande hekeb nen tumnan Yesu kamyin goke dufay hen hen ge beret ninin yen gabu irtirin. Gwaha ten gise yubul ten kwen go yenbe Al Kurunyen mere saba yirke kun kun wawun binde hirin.

⁸ Gabu irde hinhet ya gobe al hen hen gasun karwo hende bande ningeb, nenbe gasun funan hende wor pore gor hinhet. Gorbe hulusi budam yusun yurtin melak hen hinhan.

⁹ Be, Pol mere ten hikeyabe al fonen kura denembe Yutikusbe mene yamere keperde mere palna irde hinhin. Mere nurde arkup ten kun kun bin sir yekeb megen takten mayyin. Irkeb al kura belen aran po kurkunbe kamtin kenamin.

¹⁰ Irkeb Pol wor kurkun kamtiñ hakwam megen hinhin goyen besa irdeb, “Kafura ma yo. Kama mon geb,” yinyiñ.

¹¹ Gwaha ten sopte mulgan hen hurkunbe Yesu kamyiñ goke dufay hen hen niñ beret gale hen namiñ. Go kamereb meremiñ basan hen saba yirke kun kun fay urkeb yubul ten kuriñ.

¹² Be, Pol go gwaha tikeb al fonen takten mayke kamyiñ gega, sopte huwaryiñ al goyen yamiñde tukamiñ. Irde, “Kama al go gago huwara,” yen biñ yurum wor po hamiñ.

Polbe Troas taunde mat Miletus taunde kuriñ

¹³ Be, Polbe, “Troas taunde mat kahanñe kun Asos taunde forok yewen. Irde gor mat gab hakwa hende kwen,” dinkeb nen wa hakwa hende Asos taunde kutiriñ. Irkeb Polbe yirin gwahade po Asos taunde kuriñ.

¹⁴ Be, Pol wan Asos taunde dupi tenbe tumñan hakwa hende kun Mitilini motmotde forok yitiriñ.

¹⁵ Be, fay urkeb gor mat hakwa goyenter po kun Kios motmotde forok yitiriñ. Irdeb firtiriñ fay urkeb Kios mat Samos motmotde kutiriñ. Be, sopte fay urkeb gor mat Miletus taunde kun forok yitiriñ.

¹⁶ Be, gwahade ten kun hinhetya goyenbe Polbe, “Esia nanare mosoyñen po tenbe epte ma Yerusalem kun Pentekos nalu kenen,” yen nurdeb, “Esia nanan bana gon niñ taun Efesus ma kutek,” yiriñ.

Polbe Efesus taunde nin siosyen doyan mar yinyin

¹⁷ Irdeb Miletus taunde mat po Efesus taunde nin sios doyan mar nin keya heke kinnin yen katamin.

¹⁸ Katen kenkeb Pol belen gaha yinyin: “Esia nanare hanƙapya wan denya dahade hinhem gobe kenkela nenen hinhan.

¹⁹ Yuda mar belen mere mayde bulun nirke kanduk kurun wor po kenenbe delne fimin katen hinhin. Gega Doyan Al Kurun nin metenbe ten hinhem po. Gwaha ten hinhemyabe denne kurun ird ird nin ma nurde hinhem.

²⁰ Saba kura igin taren diryen yen nurdeb kun saba dird dird nin bada ma hen gabu karkuwanan saba dirde hinhem. Irde kurabe yatinan yatinan kun saba dirde hinhem gobe nurde han gogo.

²¹ Nebe kawan po Yuda marya al min hoyan Grik marya tumnan Al Kurunyen mere saba yirde, ‘Mata buluntin yubul ten Al Kurun nin bitin mulgan hekeb Doyan Al Kurunninin Yesu nin po dufaytin sanin irnayan,’ yinen hinhem.

²² “Be, ga hime gabe Holi Spirit belen Yerusalem kwa ninen hi yen nurde hime geb, gwaha tiyen. Gega gor da mata ulner forok yiyyen gobe go ma nurde hime.

²³ Gega taunan kun himekeyabe Holi Spirit belen, ‘Gebe Yerusalem kukeb fere gird koyare gernayan. Irke kanduk bulun wor po kenayan,’ ninen hinhin go po ga nurde hime.

²⁴ Goyenpoga goke kafura ma hewen. ‘Al Kurun belen alya bereya nin buninen nurde yumul-

gaŋ teŋ teŋ beləŋ kiryiŋ mere igiŋ goyen momoŋ yirde hayiŋ,’ yeŋ Doyaŋ Al Kuruŋ Yesu beləŋ metəŋ nuniŋ goyen bada ma hewəŋ. Metəŋ gobe paŋi po ireŋ. Gwaha teŋ himekeya mununke kaŋeŋ goyenbe goke ma nurde hime.

²⁵ “Be, Al Kuruŋ beləŋ alya bereya doyaŋ yird yird mata niŋ kuŋ waŋ teŋ saba dirde hinhem mar kurabe deŋ gago goyen kaŋebe sopte ma nennayiŋ yeŋ nurde hime.

²⁶⁻²⁷ Niŋgeb funaŋ momoŋ direŋ tihim. Be, nebe bada ma heŋ Al Kurunyen dufay goyen tumŋaŋ momoŋ dirde himeke nurde paŋi haŋ. Niŋgeb al kura saba nurd nurd ga Al Kurunyen mere ma gama irde kanduk kennayiŋ gobe yende samuŋ. Nere kanduk moŋ yeŋ gago hayhay dirde hime.

²⁸ Niŋgeb keŋkela heŋ hinaŋ ko. Deŋbe Holi Spirit beləŋ Yesu gama irde haŋ mar gote doyaŋ mar diriŋ geb, mel go keŋkela doyaŋ yirde hinayiŋ. Yesuyen alya bereya sios goke teŋ Al Kuruŋ beləŋ Urmiŋ megen teŋ kerke kaŋeŋ kaŋyiŋ geb, sios gobe Al Kurunyen wor po. Niŋgeb sipsip doyaŋ mar beləŋ sipsipmiŋ keŋkela doyaŋ yirde haŋ gwahade goyen po deŋ wor sios goyen keŋkela wor po doyaŋ yirde hinayiŋ.

²⁹ Dubul direŋ tihim harhoknerbe kulu duwi beləŋ sipsip yiŋeŋ hanŋen gwahade goyen po al kura waŋbe dufaytiŋ buluŋ yirnaŋiŋ yeŋ nurde hime.

³⁰ Irde deŋ bana gare manəŋ al kura huwardeb, ‘Yesu niŋ dufaymiŋ tareŋ irtiŋ mar goyen dufaymiŋ buluŋ yirteke gama dirnaŋ,’ yeŋ Al Kurunyen mere fudinde goyen hoŋaŋ mat saba yir-

nayin.

³¹ Ningeb kenkela wor po hen hinan ko. Dama karwo denya hinhembe huginen nan kahalya wawunya dun kuren dun kuren hayhay dirde esen mere dirde hinhem goyen goke bitin sir ma yiyyen.

³² “Be, Al Kurun belen doyan dirde hiyen goke gago Al Kurun gusunan irde hime. Irde Al Kurun belen buninen nurde dunenbe faran durde hi goke yitin mere goyen bitinde po hiyen yen gusunan irde hime. Mere go bitinde hen kurun hekeb taren hinayin. Irde Al Kurun belen dirnen wen det igin yunen yirin goyen wor tenayin.

³³ Nebe almet horaya ulin umnaya yenen bene huwartin mon. Hubu wor po.

³⁴ Irde kadne yagoya Al Kurunyen meten ten hen yabe det kuran nurdeb nigen meten ten hora tenbe detninin damu ten himyen goyen kenkela nurde han gogo.

³⁵ Doyan Al Kurun Yesu belen, ‘Al Kurun dilinde al det yunen yunen mata gobe det yad yad mata gote folekken wor po yen nurde hi,’ yirin goyen bene sir ma yen hiyen. Ningeb mata kurun ten hinhem gobe meten sanin gahade ga ten gab al det minmon mar goyen faran yurde hinayin yen dikala dirde hinhem,” yinyin.

³⁶ Be, Pol go gwaha yinenbe gor gabu iramin marya tumnan dokolhon yugulun tenbe Al Kurun mere iramin.

³⁷ Irdeb mel gore Pol kun kun nin buninen nurde besa irde esen uramin.

³⁸ Mel gobe Pol belen, “Kame sopte ma nennayin,” yirin goke buninen wor po nuramin. Irdeb tumnan po tukun hakware tubul tiyamin.

21

Polbe Yerusalem kurin

¹ Be, go kamereb Polya nenya tumnan mel go yubul ten hakwa hende kun kun motmot kura denembe Kos gor po forok yen firtirin. Irde fay urkeb Rodes motmotde kutirin. Gor matbe Misia nanare nin taun kura makan sinare hinhin Patara gor kutirin.

² Gorbe hakwa hoyan kura Fonisia nanare kwen ten hike kenenbe go hende kutirin.

³ Hakwa hende kun henryabe Saiprus motmot ten megen kurun belen pel irde alare mat po Siria nanare kutirin. Kun kunbe Tair taunde forok yitirin. Gorbe taunde gor nin samun yago hakware nin meten mar belen yad sinja yiramin. Irkeb nenbe megen kattirin.

⁴ Kat sinare kunbe Yesu nin dufaymin taren irtin mar kura gor yintirin. Irdeb yenya gor wawun 7 hinhet. Gor hitekeyabe Holi Spirit belen Polbe kame Yerusalem kun kanduk kinyen goyen mel go bebak yirkeb basina irman hamin.

⁵ Gega Yerusalem kutek naluninin forok yekeb kunin yen gitik titeke Yesu nin dufaymin taren irtin hinhan mar goyen tumnan beremya dirnen wenya wor taun go tubul ten nenya kun makan sinare forok yitirin. Irdeb megen dokolhoninin yugulun ten tumnan Al Kurun mere irtirin.

⁶ Go kamereb kadam hayhay girde tenbe yubul ten hakwa hende kuteke denenbe mel gobe mulgan hamin.

⁷ Be, Tair taun go tubul ten kun kunbe Tolemes taunde forok yitirin. Gorbe hakwa tubul ten sinare kurkun Yesu nin dufaymin sanin irtin mar yenenbe yenya wawun unjukan po firtirin.

⁸ Irde fay urkeb taun go tubul ten kun Sisaria taunde forok yitirin. Gorbe Filipyen yare kutirin. Filipbe Al Kurunyen mere goyen alya bereya saba yirde hiyen. Yenbe hakot aposel buda belen meten faran mar nin yekeb yenya al hoyan 6 goya yawaramin al go goyen.

⁹ Yenbe wirin sipte karkuwan hitin gega, fonen po hinhan. Bere sipte gobe Al Kurunyen mere basan hen tagalde hanjen.

¹⁰ Be, gorbe wawun budam yara po hitekeyab Al Kurunyen mere basan al kura denem Agabus go Yudia nanare mat katin.

¹¹ Katen nen hinhetde gor forok yenbe Polyen kan mal temde temdere nin goyen tenbe yingen de haninya kahanya fere tiyyin. Irdeb, “Nigen hanneya kahaneya fere tihim gahade gayen po Yuda mar Yerusalem taunde han gore kan gate min albe haninya kahanya fere ten al min hoyan Yuda mar mon gote haniinde kernayin yen Holi Spirit belen nina,” yirin.

¹² Gwaha yeke nurdeb nenya Yesu nin dufaymin taren irtin mar gor nin goya belen Pol goyen Yerusalem ma kwayin inen utan irtirin.

¹³ Gega Pol belen, “Danim esen buninen buninen ten dufayne bulun irde han? Nebe nad

fere nirnayin goke ma nurde hime. Doyan Al Kurun Yesu nin wor igin kamen yen nurde hime geb,” dinyin.

¹⁴ Goyenpoga mereninin ma nurtek hekeb, “Al Kurun belen dufay kirtin gobe gwahade po forok yiyyen,” yenbe bada hitirin.

¹⁵ Gwaha tenbe detninin yade Yerusalem hurkunin yen taun go tubul titirin.

¹⁶ Irkeb Yesu nin dufaymin taren irtin mar Sis-aria taunde hinhan gore dukun Yerusalem forok yenbe gar hinayin yen Nasonyen yare dubul tiyamin. Yenbe Saiprus motmotde nin al. Al gobe hakot po Yesu nin dufaymin sanjin irtin hinhin.

Polbe Yems kinyin

¹⁷ Be, Yerusalem nin Yesu nin dufaymin taren irtin mar belen denenbe aman hamin. Irkeb gor firtirin.

¹⁸ Irdeb fay urkeb Yems kinnin yen nenya Polya tumnan yen hitte kutirin. Kunbe yenya gor nin doyan mar manan tumnan yintirin.

¹⁹ Pol belen Yemsya doyan marya go yenenbe kadam pere gird tenbe meten ten hinhin goyen minde mat tagalde tukun tukun pasi iryin. Irde Al Kurun belen taren irke al min hoyan Yuda mar mon hitte kun meten dahade ten kun hinhin goyen manan momon yiryin.

²⁰ Irkeb gor hen mere nuramin mar belen Al Kurun turun iramin. Irdeb Pol gaha inamin: “Gebe Yuda mar budam wor po dufaymin Yesu nin sanjin iran gobe nurde ha. Goyenpoga go mar gobe tumnan nen Yuda marte tikula manan taren

po tanarde gama irde han goyen wor nurde ha gogo.

²¹ Be, mel gobe ge belen Yuda mar mon al min hoyande nin nanare kun henya saba ten hinhan goyen nurde han. Ge belen gon nin Yuda mar saba yirdeb, 'Nende tikula Mose belen kayyin goyen ma gama irnayin. Irde dirintin yagobe guba ma yen yunnayin,' yinen hinhan goyen nurde han.

²² Irdeb ge gar wayan gayen hen ga mon nurnin tahan. Ningeb kanduk kurun kura kinnin tihit geb, daha titek?

²³ Ningeb mere girnin tihit gayen po gama ira ko. Monjo kanduk kinnin geb. Be, nende al sipte kura Yuda marte matare bin tiyan ga han.

²⁴ Ningeb al sipte goya Al Kurunyen ya balem bana kunayin. Irdeb Yuda marte matare wukken hen hen mata doyan mar hitte kun mata tinayin goke hora yunayin. Irkeb go mar gore bin tiyan al sipte gote tonan kara tinayin. Gwaha tike gab al tumnan genenbe, 'Mere yen ulinde nurde hityen kurun gobe usi. Yenbe fudinde nende tikula gama irde hi,' yen bebak tinayin.

²⁵ Be, nen belen al min hoyan Yuda mar mon gega, Yesu nin dufaymin taren irtin mar goke bikken asan kan yunenbe, 'Ungura bingge ten yuntin ma nene hinayin, dapna darim ma nene hinayin, dapna kura bininde kan giti irke kamtin ma haninde yaka tike kamtin gobe ma nene hinayin, irde lelep mata ma ten hinayin,' yinen mata goyen goke po bisam yirtirin gobe nurde ha gogo," inamin.

²⁶ Be, inamin go ferde fay urkeb Pol belen al

sipte goya tumɲaɲde Yuda marte matare wukken heɲ heɲ mata go tiyamiɲ. Irdeb go kamereb Al Kurunyen ya balem bana hurkunbe, “Biɲa tiyaɲ goyen pasi irde nende matare wukken heɲ heɲ mata goyen nalu gwahader ga hubu hiyyen geb, dapɲa yawaɲ dunmeke al sipte gake ten kumba tinayiɲ,” yen bebak yiryiɲ.

Pol fere tiyamiɲ

²⁷ Be, wukken heɲ heɲ mata ten hinhan goyen kun murun belen heɲ nalu 7 hewen tikeb Yuda mar kura Esia naɲare mat Yerusalem wayamiɲ gore Pol go Al Kurunyen ya balem ban hike kenamiɲ. Irde Pol go busaharyenkek yen tanaramiɲ.

²⁸ Irdeb, “Israel mar, faran durnan! Al gare nen Israel marya nende tikulaya Al Kurunyen ya balemya gayen gake al tumɲan bulun mat saba yirde hiyen. Irde al miɲ hoyan Grik mar goyen ya balem binde yawayun. Irdeb al mali ma hurkutek ya balem goyen bulun irun,” yinen gor hinhan mar goyen bin yakamke bin ar yamiɲ.

²⁹ (Be, mel gore Grik mar niɲ yamiɲ gobe Efesus taunde niɲ al Trofimusya Polya belen Yerusalem gor hike yenamiɲ. Niɲgeb dufaymindebe Al Kurunyen ya balem bana al miɲ hoyan gon hurkutek mon yen bisam irtiɲ hiyen goyen Pol belen al goyen ten bana gon hurkun daw yen nuramiɲ.)

³⁰ Be, mere go nurdeb goyare po Yerusalem niɲ mar tumɲan bin ar yamiɲ. Irkeb kurhan mat mat Al Kurunyen ya balemde gor kup yen wayamiɲ. Irdeb ya bana mat Pol go tulun ten siɲare tukukeb goyare po ya gote yamem kurun go tayamiɲ.

³¹ Be, al buda gore mayniñ ten hikeb Roma gabmande fulenja marte doyan al kurun go, “Yerusalem bana kanduk kurun forok yihi,” mere momon go nuryin.

³² Nurdeb goyare goyen po fulenja marmin kuraya gote doyan marminya yadeb al buda gabu irde hinhande gor kup yen kurkamiñ. Irkeb al gabu irde Pol mayde hinhan kurun goyen mel go yenenbe tubul po tiyamiñ.

³³ Irkeb fulenja marte doyan al kurun belen fulenja marmin hulyan yirke Pol ten sen irawa belen po fere tiyamiñ. Gwaha irdeb al buda kurun hitte fulgan kanbe, “Al gabe ganun? Irde daha tiya?” yinen gusunñ yiriyin.

³⁴ Irkeb gabu iramiñ mar kura belen kwep kwep tenbe, “Polbe mata gwahade gwahade tiya,” yamiñ. Irkeb kura belenbe mere hoyan yen kwep kwep tiyamiñ. Be, gwaha ten mere tuktawan irkeb doyan al go mere tiyamiñ goyen bebakken ma nuryin. Irdeb fulenja marmin yinke Pol ten fulenja marte yare kwamiñ.

³⁵ Kun ya binde hen hurkuniñ ten hikeb al buda Pol mayniñ yen gama irde hinhan mar gore bin ar yeke Pol ugun po kertek hamiñ. Irkeb fulenja mar belen tatum urde ten hurkamiñ.

³⁶ Irkeb gama irde hinhan mar gore, “Mayke kami! Mayke kami!” yen kwep kwep ten hinhan.

³⁷ Be, ten ya binde hurkuniñ tikeyabe Pol belen fulenja marte doyan al kurun goyen, “Igin mere kura giren?” inen gusunñ iryin. Irkeb, “Ey, ge gayen Grik mere nurde ha?” inyin.

³⁸ Irdeb sopte po, “Hakot kura Isip nin al Roma

gabman asogo ire yen al 4,000 yade sawsawa po kurun nanare yukurin goyenbe ge ma ganun?" inen gusunan irin.

³⁹ Irkeb, "Mon, nebe Yuda mar al, Silisia nanare nin taun kurun Tarsus, Roma gabman belen doyan irde hire gor nin al. Ningeb igin nubil tike al ga mere yiren?" inin.

⁴⁰ Be, fulen marte doyan almin kurun gore igin inkeb Pol gobe yare hurkun hurkunde gor huwarde, "Balmin hinayin," yinenbe hanin tunan yirin. Irkeb balmin hikeyabe Yuda mar gote mere mat mere yirin.

22

¹ "Kadne yago, merem yan nirhan gayen pet ten nigen ge tagalen tihim ga nurnan ko," yinin.

² Go yirin gobe Yuda marte mere mat tike nurdeb liwlaw tiyamin kurun go bada hen balmin palna iramin. Irkeb Pol belen,

³ "Nebe Yuda mar al, Silisia nanare nin taunde Tarsus kawan himirin. Gega wan Yerusalem gar hen kurun himirin. Irkeb Gamaliel belen nende tikula Mose belen asinin yago asande kan yunin goyen goke kenkela wor po saba nirin. Irkeb den belen gayenter Al Kurun nin po nurde mata ten han gahade gayen po ne wor gwaha ten saba upsinen gama irde hinhem.

⁴ Irdeb Yesu belen alya bereya gaha ten hinayin yen tikula kirin goyen gama irde hinhan mar goke bin arnen nurde yunenbe yade fere ten koyare yerdeb kurabe gasa yirmeke kamde hinhan.

⁵ Go ten hinhem gobe Al Kurun dolon ird ird mata doyan mar pris buda gote kurunminya

Yuda marte doyan marya wor nenen hinhan geb, igin momon dirnayin. Nebe mel go hitte kun Damaskus taunde nin meten kadam belen faran nurnayin yenbe yinmeke asan kan nunamin. Irkeb asan go tenbe Yesu nin dufay sanin irtin mar goyen fere yirde Yerusalem gar yawan bulun bulun yirnin yen Damaskus taunde kumirin.

⁶ “Be, kun kun nana ban kahal hekeb Damaskus taun binde himekeyabe bemel po hulsi taren kura nana foleken kurun gore nan kinde mat ne hitte po timiyyin.

⁷ Irde gore nirkeb megen nakten mununyin. Irke al melak kura goreb, ‘Sol, Sol, danin mununen bulun bulun nirde ha?’ ninyin.

⁸ “Irkeb Doyan Al Kurun goyen, ‘Gebe ganun?’ inmekeb, ‘Nebe Nasaret nin al Yesu, mununen bulun bulun nirde ha al goyen,’ ninyin.

⁹ Be, al neya tumnan kun hinhet mar gobe hulsi go po ga kenamin. Gega mere gobe al gore mere ten hi yen ma bebak tiyamin.

¹⁰ Gwaha ninkeb, ‘Doyan Al Kurun, daha tiyen tihim?’ inmekeb, ‘Huwara. Irde Damaskus taunde kwa. Gor gab gwaha gwaha tiyayin yen basina girmirin goyen nurayin,’ ninyin.

¹¹ Be, hulsi kurun gore nirke delne kidoma wor po hirin geb, al kun hinhet mar gore po nanarde nad Damaskus taunde kwamin.

¹² “Be, gorbe al kura denem Ananaias hinhin. Yenbe Yuda marte tikula kenkela gama irde hiyen. Irkeb Yuda mar taun goyenter hinhan goreb palap wor po irde han yen.

¹³ Be, Ananaias gore ne hitte wan huwardeb, 'Kadne, sopte delge wuk yeke nankena,' yirin.

¹⁴ Irkeb goyare po delne wuk yeke det yinmirin. Irkeb yen belen gaha ninyin: 'Al Kurun asininin yago belen hakot dolon irde hinhan Al goyen ge belen gab dufaymin kenenj bebak tenbe Al Huwak Yesu goyen delger forok yen mere girkeb nurayin yen bikkenj basin girin.

¹⁵ Ningeb gebe mata kenenj mere nuran goyen goke kunbe al nanja kurun ga hike kwa goyen momon irde tukayin.

¹⁶ Ningeb da doyan irde ha? Huwarde kunbe baptais tekeb Al Kurun belen mata bulunje halde gunyen. Irkeb yen dolon irayin,' ninyin.

¹⁷ "Be, kamebe mulgan hen Yerusalem wamirin. Gorbe kun Al Kurunyen ya balem bana hen mere irde henyabe yuwarwarte Doyan Al Kurun kinmirin.

¹⁸ Irkeb Doyan Al Kurun belen, 'Taunde gar nin marbe ge belen ne nin tagalde ha gayen fudinde yen ma nurde asogo girnayin geb, aran po Yerusalem ga tubul ten hoyande kwa,' ninyin.

¹⁹⁻²⁰ Gega ne belen huwardebe, 'Doyan Al Kurun, mel gobe epte ma asogo nirnayin. Nebe meten alge Stiwen hora po mayan goyarebe gor hinhem. Irde al belen Stiwen maynin ten hikeb igin nurde go mar gote ulinhor yago doyan yirde hinhem. Irde meten alge Stiwen goyen hora po ugun kerke kamun goyen kinmin. Irdeb Yuda marte gabu yayan kun alya bereya ge nin dufaymin taren irtin marbe yawan yusulak ten koyare yerde hinhem. Ningeb Yerusalem nin mar

gabe kenkela nurde nunen han,' inmirin.

²¹ Gega Doyan Al Kurun belen wol henbe, 'Ne belen po gad germeke nana gisaw al min hoyan Yuda mar monde nanare kwayin. Ningeb huwarde kwa!' ninyin," yinyin.

²² Be, al buda go meremin palja iramin kun al min hoyan Yuda mar mon nin tagalke nurdeb bin ar yamin. Irkeb, "Al gabe megen gar hitek mon nin, mayke kami!" yen kwep kwep tiyamin.

²³ Irdeb al buda goreb Pol belen Al Kurun sukal ira yen bin ar wor po yekeb kwep kwep ten ulinhor yago yuguya ten mulowo yade nana kota yemeyde tiyamin.

²⁴ Irkeb fulena marte doyan al kurun belen fulena marmin go yinke Pol go ten fulena marte yare tukamin. Irkeb fulena marte doyan al kurun gore, "Kun usulak tike danin merem yan irde kwep kwep irde han goyen momon diryen," yinen hulayan yiryin.

²⁵ Irkeb fulena mar belen kun Pol goyen usulak tinin yen haninya kahanya yad gin yirdeb hete giti iramin. Irkeb Pol belen fulena mar gote doyan al kura gor hinhin goyen, "Roma mar al ne gahade gayen mere min ma nurdeya mali yusulak tinayin yen Roma gabman belen ingin yitin we?" inyin.

²⁶ Irkeb fulena marte doyan al gob kurunmin hitte kunbe "Al gabe Roma al geb, daha iren taha?" inyin.

²⁷ Irkeb fulena marte doyan al kurun gore Pol hitte kunbe, "Momon nira. Ge gayen fudinde Roma al?" inyin. Irkeb, "Fudinde," yirin.

28 Irkeb al gore, “Nebe Roma al hewe yenbe hora kurun tubul ten gab Roma al himirin,” inyin. Irkeb Pol belen, “Gebe gwaha tiyarin gega, Adonebe Roma al geb, ne wor Roma al,” inyin.

29 Be, Pol go gwaha yeke nurdeb fulenja mar usulak ten gusunjan irnin yen doyan hamin gobe warga hen okohom po bada hamin. Irkeb Pol go Roma al gega, malikan min minmon fulenja marmin yinke sende fere tiyamin goke kafura hiri.

Polbe merere huwaryin

30 Irdeb nalu go wawun hen sopte fay urkeb fulenja marmin yinke Pol go sen yugu ten unamin. Irde, “Da misinde wor po Yuda mar belen Pol mere ulinde iran goyen upsinen bebak tiye,” yenbe pris buda gote karkuwanminya Yuda marte doyan mar tumnan wake gabu irke gab gusunjan yire yen mere kiryin. Irkeb tumnan gabu irke fulenja marte doyan al kurun belen Pol tawake al buda kurun gote dilingde huwaryin.

23

Pol belen Yuda marte doyan mar buda hitte Yesu nin tagalyin

1 Be, Pol go huwarde Yuda marte doyan mar gabu iramin go yenenbe, “Kadne yago, nebe Al Kurun nin meten po ten henyabe bener wukken wor po nurdeya meten timeke wan wan gago hihi. Al Kurun dilingde mata bulun kura ma ten himyen,” yinyin.

² Gwaha yekeb pris buda gote kurunmin Ananias belen kadam yago Pol bindere hinhan go hulyan yirde, “Mohonde go maynan,” yinyin.

³ Irkeb Pol belen meremin go nurdeb, “Gebe nende tikula ufurd unenbe gor keperde, ‘Gebe bulun gwaha gwaha tiyan,’ ninha. Goyenbe gigenbe tikula goyen pel irdeb merene kenkela ma nurde mali ga maynan yinha? Gebe sinare mat genenminbe igin wor po gega, bege banabe tikiñ baran wor po ha. Niñgeb goke tenbe Al Kurun belenbe mugunyen geb,” inyin.

⁴ Irkeb al Pol bindere hinhan goreb, “Yenbe Al Kurunyen meten al wor po. Pris buda gote kurunmin goyen go ma nurde nanyan irha?” inen kwep kwep iramin.

⁵ Irkeb Pol belen wol henbe, “Kadne yago, nende tikularebe, ‘Doyan altin kura mere bulun ma irde hinayin,’ yitin gobe nurde hime. Niñgeb yenbe al gwahade yen ma nurde nanyan irhem,” yinyin.

⁶⁻⁸ Goyare goyenbe Yuda marte doyan mar gabu iramin gobe Farisi marya Sadusi marya goyen Pol belen yenen bebak tiyyin. Be, Farisi marbe al kamdebe sopte huwarnayin, irde Al Kurunyen miyonbe han, al tonen manan han yen nurde hanyen. Munan Sadusi mar gobe gwahade ma nurde hanyen. Niñgeb Pol go mel goyen yenenbe, “Kadne yago, adonebe Farisi al geb, ne manan gwahade po. Niñgeb nebe Al Kurun belen al kamkeb kame sopte yisan hiyyen gobe fudinde yen nurdeb goke po doyan hen hime goyen goke tagalde himyen. Gega goke

igin ma nurde gago merere nerhan,” yen mere sanin po yiryin. Sadusi marya Farisi marya gobe kadam igin ma nurd gunen ten hanzen geb, Pol mere tiyyin go nurdeb yingen ulin kadam mohannde tiyamin. Irde dufaymin unken kerte ma hamin.

⁹ Irdeb hekhok ten kwipkwep ten epte ma tiyamin. Gwaha tenbe Farisi mar kura Yuda marte tikula saba yird yird mar gore huwardeb, “Al gabe mata bulunmin kura ma kenhet. Monjo Al Kurunyen miyon belen yar kura ma det tonen belen yar kura inyin kenem daha tinayin?” yamin.

¹⁰ Irde al buda kwipkwep ten hinhan go kun bulun wor po hen artek heke nurdeb, “Monjo gwaha ten Pol mayke kamyen,” yen fulen marte doyan al kurun gore fulen marmin hulan yirde, “Kurkun Pol tawanan. Munan epte mon kenem kwep kwep yirde gasa yirhet yirhet yirde gab ten wanayin,” yinyin. Irkeb kun gwahade po tenbe Pol gob fulen marte yare ten kwamin.

¹¹ Be, gwaha tiyamin go wawun goyenbe Doyan Al Kurun belen Pol dila forok yenbe, “Kafura ma yo. Taren po hen hayin. Yerusalem gar al ne nin momon yirde saba yirde hayen gwahade goyen po Rom taunde manan kun gwahade po ten hayin geb,” inyin.

Yuda mar belen Pol maynin yen sege iramin

¹²⁻¹³ Be, fay urkeb go wampot goyenbe Yuda mar kura 40 gwahade goyen gabu irdeb daha mat kura Pol mayteke kamyen yen mere sege iramin.

Irdeb, “Fudinde wor po, Polbe mayteke kamkeya gab bingeya feya netek,” yenbe biña tiyamin.

¹⁴ Gwaha tenbe Yuda marte doyan mar par-guwakya pris buda gote karkuwanminya hitte kunbe, “Nenbe, ‘Feya bingeya kutnare henbe Pol mayteke kamke wor wor gab ig ulin titek,’ yihit.

¹⁵ Ningeb denya Yuda marte doyan maryabe fulenja marte doyan al kurun hitte kunbe usi irdeb, ‘Pol go sopte tubul ten dunke matamin ge kenkela gusunjan irnin,’ innayin. Irkeb tubul ten dunkeb ten wanayin. Irkeb nenbe belen doyan hen hitek geb, gon po mayteke kamyen,” yinamin.

¹⁶ Gega Pol yayin belen mere momon go nurdeb fulenja marte yare kun Pol momon iryin.

¹⁷ Irkeb Pol gobe fulenja mar 100 gote doyan al kura hoy irdeb, “Al gabe doyan alin hitte kun mere kura momon iren ten hi geb, yen hitte ten kwa,” inyin.

¹⁸ Irkeb al goreb Pol yayin goyen fulenja marte doyan al kurun hitte tukunbe, “Pol koyare hi al gore hoy nirke kun kenmekeb, ‘Al gare doyan alin kurun mere kura momon iren tiya. Ningeb doyan alin hitte ten kwa,’ ninkeb gago ge hitte tawayhem,” inyin.

¹⁹ Gwaha inkeb al gore Pol yayin go haniinde tanarde hoyan belen tukunbe, “Da mere momon niren ten ha?” inyin.

²⁰ Irkeb al goreb, “Yuda marbe mere sege irde dufay unkuren po irhan. Ningeb gise go goyenbe wan, ‘Pol tubul ten dunke tukun da mata wor po tiyun goyen Yuda marte doyan mar dilinde

huwarke gusunaj irtek,' usi girnayin geb.

²¹ Albe 40 gwahade gore dufay unjkuren po irdeb, 'Bingeya feya kutna irtek geb. Pol maydeya gab mali titek,' yen bina tiyan mar gobe bana kun gere mere nin po doyan hini yahan. Ningeb Yuda marte doyan mar belen gise wan mere girke goya yende mere ma nurayin. Irde Pol wor tubul ma ten yunayin," inyin.

²² Irkeb fulena marte doyan al kurun gore huwardeb, "Iginge kwa. Goyenpoga mere momon nirha gabe al hoyan kura momon ma irayin," inen hayhay iryin.

Fulena marte doyan al belen Pol Feliks hitte ten kerke kuring

²³ Irdeb fulena mar 100 gote doyan al irawa hoy yiryin. Irke wakeb, "Derbe kun fulena mar kahan de kun fulena ten hanyen mar 200 ya hos hende mat fulena ten hanyen mar 70 goyen yinke gitik tinayin. Irde hakde fulena ten hanyen mar 200 goyen manan momon yiriryen. Irdeb den tumnan 9 kilok wawunbe Pol ten Sisaria taunde kurkunayin.

²⁴ Irde Roma gabman al denem Feliks Yudia nana doyan irde hi al hitte kunayin. Mongo al belen maynak geb, Polbe hos hende ten kunayin," yinyin.

²⁵ Irde asan kura kanbe yunyin. Merebe gahade:

²⁶ "Doyan al Feliks, nebe Klodius Lisias belen asan gago kayhem. Gebe doyan alne wor po yen nurd gunen hime.

²⁷ Al gayenbe Yuda mar belen ten maynin tiyan. Gega Roma al yeke nurdeb fulenja marne yade kunbe maynin ten hinhan mar haniinde mat ten wamin.

²⁸ Irdeb da misinde wor po Yuda mar belen mere ulinde irde asogo irde han goyen gusunjan yirde bebak tiye yenbe Yuda marte doyan mar gote gabure tukumin.

²⁹ Goyenbe ten fere ten mayteke kami yan gega, min minmon gwaha irnin tiyan. Min yara kinminbe Yuda marte tikula nin ten mere ulinde iran.

³⁰ Irdeb Pol goyen maynin yen mere sege iran goyen nurdeb balmin po ten kermekke ge hitte kwa gago. Irdeb Yuda mar go da misinde wor po al go maynin tiyan goyen ge hitte kun gab delge mat tagalnayin yinmin,” gwahade kayyin.

³¹ Be, fulenja mar go doyan almin kurun belen yinyin goyen po gama irdeb wawun go po Pol ten Sisaria taunde kunin yen kunbe belen Antipatris taunde feramin.

³² Irde fay urkeb fulenja mar hos manan gore po Pol ten Sisaria taunde kwamin. Irkeb fulenja mar hoyan kurun gobe gor mat mulgan hen Yerusalem kwamin.

³³ Be, fulenja mar Pol ten kwamin go Sisaria taunde forok yenbe doyan almin belen asan kayyin goyen Feliks Yudia nanja doyan irde hiyen al go unenbe Pol manan yen hitte mekeramin.

³⁴ Irkeb Feliks belen asan go kapyan henbe Pol go, “Gebe dare nin al?” inen gusunjan iryin. Irkeb Pol belen wol henbe, “Nebe Silisia nanare nin al,”

inyiņ.

³⁵ Irkeb, “Iginge gar hayiņ. Irkeb mere ulger irde haņ mar goyen wake gab tumņaņ merere huwarnayiņ. Irkeb meretiņ nureņ,” inyiņ. Irdeb meten marmin hulyaņ yirdeb, “Tukuņ Herotyen ya kuruņde gor kerde doyaņ irde hinayiņ,” yinyiņ.

24

Polbe Feliks diliņde huwarde mere tiyyiņ

¹ Be, wawuņ siptesonu kamereb pris buda gote kurumuņ Ananaiasya Yuda marte doyaņ mar parguwak kuraya Sisaria kuņ Roma gabman al Feliks hitte Pol go tagal unniņ yeņ kurkamiņ. Goyenterbe al kura deņembe Tetulus goyen mel gore, “Neņ faraņ durde merere harde mere tiyayiņ,” inkeb mel goya tumņaņ kwamiņ. Al gobe Roma gabmanyen mere sope ird ird mata goyen keņkela nurde hinhin al.

² Be, Pol niņ mere kerkeb wayyiņ. Irkeb Tetulus belen huwarde gaha yiriņ: “Feliks, gebe doyaņ alniniņ wor po. Ge belen upsiniņ doyaņ dirde hike neņbe dahadem moņ, igiņ po heņ waņ waņbe gago hite. Dufayge tiņeņ wukkeņ wor po goyen kerde doyaņ dirkeb naņa kuruņ gayen bana niņ alya bereya tumņaņ igiņ po hite.

³ Ge belen meten kuruņ gwahade teņ hayen goyen goke neņ tumņaņ amaneņ wor po nurd gunen hityen.

⁴ Be, ne belen mere uguņ po timeke piņeņ nurd nunak geb, bada heweņ. Gega ok ninkeb mere muņ kura tiyeņ.

⁵ Be, al garebe megen kurun gayen kun wan ten Yuda mar bin yakamde dufaymin bulun yirde hinhan. Irkeb kanduk karkuwan karkuwan forok yen hinhan. Yenbe al buda kura 'Nasaret nin mar' yinen hanyen gote doyan al.

⁶⁻⁷ Irde al gare po Al Kurunyen ya balem bana gon Yuda mar mon al min hoyan mali ten hurkun. Al gare gwaha mat ya balem goyen bulun iren ten hikeb ten fere titin.*

⁸ Ningeb gigen gab gusunon irkeb yingen monde kenkela tagalke gab gwahade ningeb gago tagal unen merere kerhan yen bebak tiyayin," inyin.

⁹ Be, Tetulus belen mere ten pasi irkeb Yuda mar bana gon hinhan gore, "Mere tiya gobe fudinde wor po!" yamin.

¹⁰ Irkeb Feliks belen, "Pol, ge wor huwarde mere tiya," inen hanin tunan iryin. Irkeb Pol go huwardeb Feliks goyen, "Gebe dama budamde wor po nana kurun gayen doyan irde hayen. Irde al ge hitte wan merere huwarke ge belen dufay kenkela wor po henya meremin nurde sope irde hayen. Ningeb nebe delger gago nigen ge pet ten mere tiyen tihim.

¹¹ Be, nebe Al Kurun dolon ire yen Yerusalem

* **24:6-7:** Asan hoyandebe gahade katin hi: ⁶ Irde al gare po Al Kurunyen ya balem bana gon Yuda mar mon al min hoyan ten hurken tiyun. Al gare gwaha mat ya go bulun iren ten hike fere titin. Irde nende matare al gate mata bulun goke tagalde murungem unte nurtin. ⁷ Gega Fuleja marte doyan al Lisias belen wan mudunhem mudunhem dirde Pol gayen ten kun. ⁸ Irdeb, 'Al gayen ulinde merem yan irtek marbe Feliks hitte kun momon irnayin,' dinun," inyin.

taunde hurkuminde mat wan hanke gabe nana fay 12 hihi. Ningeb usi yen kenenbe gigen ga al gusunan yirke bebak girnayin.

¹² Be, mere ulner irde han mar gayen Al Kurunyen ya balem bana al kuraya kadam mohonde ma ten himeke nenan. Irde Yerusalem taun banaya Yuda marte gabu yayan wor al kura ma bin yakamde hinhem. Hubu wor po.

¹³ Ningeb tagalde nunen han mar gayen daha matbe min goke kura merere kirtin yen momon girke nurayin? Hubu wor po!

¹⁴ Gega Nasaret nin al Yesu belen tikula kiryin goyen gama irde han mar al goyen kurabe gago ninen han gobe fudinde. Mel gabe Yesuyen tikula goyen fudinde mon yen han. Gega nebe gwaha mat Al Kurun asininin yago belen dolon irde hinhan Al goyen dolon irde himyen. Irde Al Kurunyen mere Moseya Al Kurunyen mere basan marya belen asande katin kurun goyen fudinde yen nurde gama irde himyen.

¹⁵ Irde mel gare Al Kurun dilingde al huwakyabe huwak monya goyen tumnan Al Kurun belen kamtinde mat al yisan heke huwarnayin yitin goyen fudinde yen mata goke doyan hen hanjen gwahade goyen po ne manan goke doyan hen himyen.

¹⁶ Goke tenbe bener wukken wor po nurdeya mata ten himeke alya Al Kurunya dilingdebe igin po nenen hinayin yen kurut yen himyen.

¹⁷ “Nebe dama budam po Yerusalem tubul ten nana sinare po kun hinhem. Irdeb nere alya bereya Yuda mar kura det minmon al buninen

goyen faran yure yen hora ten gab Yerusalem mulgan hen kumin. Be, goya goyenbe Al Kurun wor doloj irde galak ire yen kumin.

¹⁸ Be, Al Kurunyen ya balemde hen Yuda marte matare wukken hen hen mata ten himekeyab mel gare wan nenan. Goyenterbe al budamya ma hinhet. Balmin po hen al kura ma bulun irde hinhem.

¹⁹ Ya bana gonbe Esia nanare nin Yuda mar kura hinhan gore nenan. Ningeb mata bulun kura timeke nenan kenem mel gore po ga delger huwarde ne nin tagalke nurayin.

²⁰ Gega go mar gobe gar ma han geb, han kapya Yerusalem gor Yuda marte doyan mar dilinde huwarmeke nere kanduk kura ulner hi kenen gab mel gare igin momon girnayin.

²¹ Nebe Yerusalem gor merere huwardeb, 'Al kamtinbe sopte huwarnayin yitin mere gobe fudinde wor po yen nurde hime. Mere gwahade timin gokeb gago merere nerhan,' yinen kwep kwep yirmin. Ningeb kanduknebe gogo po yen nurde hime," inyin.

²² Be, Feliks gobe Yesu belen tikula kiryin goyen kenkela nurde hinhin. Ningeb mere tinin tiyamin goyen utan yirdeb, "Fulenja marte doyan al kurun Lisias belen wake meremin nurde gab kanduk gake dufay kura keren," yinen yakira tiyyin.

²³ Irdeb fulenja mar 100 gote doyan al gor hinhin goyen, "Pol go tukun koyare kerde doyan irde hayin. Goyenpoga kurarebe igin tubul tike dufayminde wilwul ten hiyen. Irkeb dinun yago kura wan kenen det kuran nurkeb faran urde hinayin," inyin.

²⁴ Be, hitneŋ yara teŋbe kuŋ nalu kurarebe Feliksya berem Drusilaya wayaryum. Feliks berem Drusilabe Yuda mar bere. Be, waŋ gor heŋbe Feliks go Pol niŋ keya hiriŋ. Irkeb waŋ Yesu Kristu niŋ dufaymiŋ tareŋ irde yende mere gama ird ird mata niŋ tagalke nurde hinhin.

²⁵ Be, Pol belen alya bereya Al Kurun diliŋde daha mat huwak po hinayiŋ, irde daha matbe uliŋde po aman hetek mata fole irde hinayiŋ, irde kame Al Kurun belen alya bereya igiŋya bulunya goyen pota yirde muruŋgem yunyeŋ goke tagalyiŋ. Irkeb Feliks belen mere go nurdeb kafura hiriŋ. Irdeb, “Ep niŋ, mulgaŋ hawa. Irde nalu kurare kura ge niŋ yemeke gab wake sopte mere teŋ hireŋ,” inyiŋ.

²⁶ Be, Feliks go haŋkayeŋ haŋkayeŋ Pol hoy irde mere teŋ hinaryum gobe, “Gwaha timeke hora kura nunke gab koyare hi goyen tubul timeke kuyeŋ,” yeŋ dufay heŋbe gogo teŋ hinhin. Gega Pol gobe hora kura muŋ ma unyiŋ.

²⁷ Be, Pol go gwahade po hike kuŋ kuŋ dama irawa hubu hiriŋ. Irkeb Feliks go meteniŋniŋ tubul teŋ kutek nalu hekeb al kura denem Porsius Festus belen gasuŋniŋ tiriŋ. Gega Feliks gore Yuda mar belen amaneŋ nurd nunnayiŋ yeŋbe Pol koyare po tubul teŋbe kuriŋ.

25

Pol belen Sisar hitte kuŋ kuŋ niŋ Festus gusuŋaŋ iryiŋ

¹ Be, Festus belen Feliksyen gasun ten doyan al kurun henbe wawun karwo hubu hekeb Sisaria taunde mat Yerusalem taunde hurkurin.

² Goya goyenbe pris buda gote karkuwanminya Yuda marte doyan marya belen Festus hitte kun Pol mere ulinde iramin.

³ Irdeb, “Pol gobe belen doyan hen mayteke kamyen,” yen bikken mere sege irde ep iramin geb, Festus goyen, “Pol go dunke nen belen Yerusalem gar ten wan merere kertek geb, ingin aranen faran durayin we?” inamin.

⁴ Gega Festus belen wol henbe, “Polbe Sisaria taunde koyare hi. Nebe hen ga mon mulgan hen taunde gor kurken tihim.

⁵ Ningeb mata bulun kura tiyun nurde han kenem doyan martin kura gama nirde kunayin. Kun gor gab tumnan merere huwardebe da mata bulun tiyun goyen tagalnayin,” yinyin.

⁶ Be, Festus go wawun 8 wet kura ma 10 gwa-hade wet goyen mel goya Yerusalem gor henbe Sisaria taunde mulgan hen kurkurin. Kun firyin geb, fay urkeb Pol ten merere kere yenbe mere sope ird ird gasunde keperdebe meten marmin hulayan yirde, “Kun Pol ten wanan,” yinyin.

⁷ Irkeb Pol go merere huwarke Yuda mar Yerusalem mat katamin gore kunbe kalyan keramin. Irdeb mere kanduk kurayen kurayen yen ulinde iramin. Gega meremin goyen be-bakken kura ma tikeb Festus belen fudinde yen ma nuryin.

⁸ Irkeb Pol wor yingen ge tenbe, “Nebe Yuda marte tikula mun kura ma bulun irde himyen.

Al Kurunyen ya balem wor goke bulun ma nurde himyen. Irde Roma nin doyan al kurun Sisaryen mere wor kenkela po gama irde himyen,” inyin.

⁹ Gega Festus go gwaha timekeb Yuda mar belen binde igin nurnayin yenbe, “Igin sopte mulgan hen Yerusalem hurkuke gab merege gor wor nuren?” inen gusunon iryin.

¹⁰ Irkeb wol henbe, “Nebe Yuda mar bulun kura ma yirmin gobe kenkela wor po nurde ha gogo. Ningeb gago Roma gabmanyen meten al dilingde kandukne sope ire yen delger huwarhem.

¹¹ Goyenbe fudinde mata bulun kura timin kenem igin goke ten kamen. Gote merem mon. Gega mel Yuda mar gore mere ulner irde han gayen fudinde mon kenem al kura belen epte ma wor po mel gote haniinde niryen. Ningeb gar epte mon yen nurde hime geb, Rom kun Sisar dilingde gab huwarde mere tiyen yen momon girde hime” inyin.

¹² Irkeb Festusya meten faran marmin yago yingen ulin Pol mere tiyyin goke sege irdeya gab huwardebe, “Rom kun Sisar dilingde huwaren yaha geb, gwahade po tiyayin,” inyin.

Festus belen Pol nin Agripa inyin

¹³ Be, nanja fay karwo gwahade kamereb Yuda marte doyan al kurun Agripaya haymin Bernaisiya belen, “Roma gabman al Festus goyen kun kenye. Irkeb palap nirhar yen nuryen,” yen Sisaria taunde kwaryum.

¹⁴ Be, Agripa go sobamde yara po gor hikeb Festus belen Pol nin momon ire yenbe gaha inyin:

“Al kura Feliks belen ten koyare kerde tubul ten kun gobe gar hi.

¹⁵ Yerusalem taunde hurkumin. Irkeb pris buda gote karkuwanminya Yuda marte doyan mar parguwakya belen ne hitte wanbe al go merem yan irde, ‘Ge belen gab al go ten merere kerde mata bulun tiyan inayin,’ yen gusunan niran.

¹⁶ Irkeb ne belenbe, ‘Roma gabmanyen matarebe al kura merere huwarkeb tagal unnayin mar go manan tumnan merere huwarnayin. Irdeb al goreb mel gote dilingde yingen ge ten mere tiyyen. Gwaha ma tiyyen gobe min minmon epte ma tagal unnayin mar goyen haniinde mekertek,’ yinmin.

¹⁷ Gwaha yinenbe tumnan wan gar firtin geb, fay urkeb mere nurd nurd gayen aranen po nure yen Pol go tawanan yinmeke tawayan.

¹⁸ Irkeb al buda merem yan iran mar gore Pol ulinde mata bulun wor po kura wet tiyun geb, tagalnin tahan yimin gega, hubu.

¹⁹ Meremin kura gobe asem yagot mataya sabaya nin al goya kadam mohonde tiyan. Irde meremin kurabe Pol gore al kamtin kura denjembe Yesu goyen huwaryin hi yekeb goke manan kadam mohonde tiyan.

²⁰ Irkeb gwaha mat kura meremin goyen fudinde ma usi goyen bebek titek ma himin. Ningeb bada hen Pol go, ‘Igin Yerusalem taunde hurkun gor sopte merere huwarayin?’ inen gusunan irmin.

²¹ Gega Pol belen huwardebe, ‘Nebe Roma gab-

manyen doyan al kurun hitte kun yen diliŋ mat huwarde gab mere gayen tagalen,’ ninun. Gwaha ninkeb bada hen meten marne hulyan yirdeb, ‘Belhen tukun koyare kerde doyan irde hinayin. Irkeb kame ga ten kermeke Sisar hitte kuyen,’ yinmin,” inyin.

²² Be, Agripa belen mere momon go nurdeb, “Mere gayen nigen wor po nuren yen nurde hime,” inyin. Irkeb Festus belenbe, “Gise ga meremin nurayin,” inyin.

²³ Be, fay urkeb Polyen mere nurye yenbe Agripaya haymin Bernaisiya goyen al belen denen turun dirnayin yenbe doyan mar karkuwan de umna bidak ten mere sope ird ird gasunde kwaryum. Sisaria taunde nin fulen mar karkuwanya taun gote doyan mar manan yad kwaryum. Be, forok yen gasuminyan keperde tukukeb Festus belen meten marmin yinke kun Pol tawayamin.

²⁴ Irkeb Festus belen huwardeb, “Yuda marte doyan al kurun Agripaya den gar gabu irhan mar ga nurnan ko. Al ga kenen han gabe Yuda mar kurun Sisaria taunde garya Yerusalem taunde han mar tumnan gore, ‘Al gabe daniŋ ma tubul ten dunke mayhet,’ yen gusunan nirde kwep kwep ten epte ma tiyan.

²⁵ Gega mata bulun bebakken kura tiyun irke goke mayteke kamyen yen ma kinmin. Irde Pol goreb, ‘Roma gabman doyan al kurun hitte kun yen diliŋde merere huwaren,’ yen gusunan nirun. Ningeb goke tenbe al ga ten kermeke Rom kuyen yen nurmin.

26-27 Goyenpoga miŋ goke asan kaŋ al ga ten kermeke Roma gabman doyan al kurun Sisar hitte kuyen yen ma nurde hime. Dufaynerbe al merere yirtin goyen miŋ kenkela ma nurde mali po Sisar hitte yad yermeko kunayin gobe igin mon yen nurde hime. Ningeb goke tenbe diltin mat gago ten wayhem. Irde Yuda marte doyan al kurun Agripa, ge manan gar ha. Ningeb ge belen gusunan irde mere min kenen bebak ten gab momon nirke asande kayen,” inyin.

26

Pol belen Agripa dilingde mere tiyyin

¹ Be, Festus belen gwaha yekeb Agripa gore, “Be, gigen ge kura tagalke nurnin,” inyin. Irkeb Pol go mere min ure yenbe hanin tunan urde gaha inyin:

² “Yuda marte doyan al kurun Agripa, Yuda mar belen mere ulner irde han kurun gayenbe fudinde mon yen nigen ge ten al hoyan dilingde mon delger po huwarde tagalen tihim gake amanen nurhem.

³ Delger huwarhem gake amanen nurde hime ginhem gobe dahade mon. Gebe Yuda marte mata kenkela wor po nurde hayen. Irde da misinde wor po nindiken Yuda mar ulin kadom mohonde ten hityen goyen wor kenkela nurde hayen. Ningeb mere tiyen tihim gayen pinen ma nurayin.

⁴ “Yuda mar kurun gobe ne damde kawan himirin, irde bikken nananer mat wan Yerusalem

gor keperde kurun henryabe dahade hinhem goyen kenkela wor po nurde nunen han.

⁵ Ningeb mel gobe ne hakot al fonen hinhemya Farisi mar al henbe daha ten hinhem goyen nurde pasi geb, momon girnin yenbe igin momon girnayin. Farisi marbe Yuda marte tikula taren wor po tanarde gama irde han.

⁶ Be, han ka merere nerhan gabe Al Kurun belen bikken asinin yago hitte mata kura forok yiyyen yen bin tiyyin goyen ne manan goke doyan irde hime ningeb, gago merere huwarhem.

⁷ Al Kurun belen bin tiyyin gote iginenbe Yuda mar kurun gayen wawunya nan kahalya huginen Al Kurun dolo irde henya kentek yen doyan hen han. Gega, doyan al kurun Agripa, Al Kurun belen bin tiyyin goyen nen tumnan doyan irde hityen gote iginen forok yirin goyen goke tagalde himekeb gago Yuda mar belen merem yan nirde han. Iginenbe Yesu kamyinde mat huwaryin gogo.

⁸ Ningeb nebe fudinde wor po Al Kurun belen al kamtinbe sopte yisan hiyyen yen nurde hime. Munan den kurun gar gabu irhan mar gabe danin usi yen nurde han?

⁹ “Bikkenbe ne wor kamyinde mat sopte huwaryin yen hinhan al Nasaret nin Yesu goke igin ma nurdeb fudinde wor po asogo iren yen nurde hinhem.

¹⁰ Irdeb goyen po gama irdeb kun pris buda gote karkuwanmin momon yirmeke ok ninkeb kun Yesu nin dufaymin sanin irtin mar goyen budam yade koyare yerde hinhem. Irde gasa yirteke kamnan yeke ne manan, ‘Igin gwaha

yirnayin, 'yemeke gasa yirde hinhan.

¹¹ Irde huginen Yuda marte gabu yayan kun Yesu nin dufaymin taren irtin mar go yenenbe bulun bulun yirde gasa yirde hinhem. Irde, 'Yesu nanyan irde harhoktin unnayin,' yinen kanduk karkuwan karkuwan yunen hinhem. Nebe go mar goke bene ar wor po yen hinhin geb, yen ge nan'kene yen taun hoyande nana gisaw wor kun hinhem.

¹² "Mata gwahade kurun goyen ten kun henya nalu kurarebe pris buda gote karkuwanmin belen igin ninkeb Yesu nin dufaymin taren irtin mar fere yire yen Yerusalem taunde mat Damaskus taunde kumirin.

¹³ O, Agripa, kun hen'yabe nana bankahal heke hulsi sanin kura nana folek kurun gore nan'kinde mat neyabe al neya kun hinheth mar hitte temeyke kinmirin.

¹⁴ Be, hulsi kurun gore gwaha dirke nen tumnan megen daken mudunin. Irke al melak kura Yuda marte mere mat, 'Sol, Sol, danin bulun bulun nirde ha? Asogo nirde fulen nirde ha gobe gigen manan bulun irde ha geb,' ninyin.

¹⁵ Irkeb ne belen wol henbe Doyan Al Kurun goyen, 'Gebe ganun?' inmekeb Doyan Al Kurun belen gaha ninyin: 'Nebe Yesu. Ge belen munen bulun bulun nirde ha al goyen.

¹⁶ Ningeb huwara. Han'kabe meten alne gire yenbe gago delger hihim. Ningeb delger nenha gaya det budam kame gikala girde hen goyen tumnan kun alya bereya hitte tagalde kun hayin.

¹⁷⁻¹⁸ Nigen po gad germeke Yuda marya al min hoyanya han bana kwayin. Kun ne nin tagalkeb

biñ bak yenayin. Irkeb Satanyen tareñ bana han go tubul ten Al Kurun hitte waniñ yenbe ne nin dufaymin tareñ irnayin. Irkeb Al Kurun belen mata bulunmin halde yunkeb Al Kurun dirnen wen henayin. Meten go ten hikeyabe Yuda marya al min hoyanya belen mugunen hinayin gega, ne belen doyan girde hen, 'ninyin.

¹⁹ “Ningeb Yuda marte doyan al kurun Agripa, nebe yuwarwarte nan kinde mat Yesu delner forok yen mere niryin goyen pel ma irde gama irmirin.

²⁰ Nebe meremin po gama irdeb Damaskus taunde nin Yuda mar hitte wa Al Kurunyen mere tagalmirin. Irdeb Yerusalem taunde ninya Yudia nanare ninya al hitte kun Al Kurunyen mere tagalde hinhem. Irde al min hoyan Yuda mar mon hitte wor Al Kurunyen mere tagalde kun hinhem. Gwahade tagalde kun hen yabe, ‘Mata bulun tin yubul ten Al Kurun nin bitin mulgan henayin. Gwaha tenbe Al Kurun dilinde mata igin po ten hinayin. Irkeb al hoyan belen denenbe fudinde Al Kurun nin biñ mulgan han yen denayin,’ yen saba yirde hinhem.

²¹ Ne gwaha ten kun himekeb Yuda mar belen goke igin ma nurde Al Kurunyen ya balem bana gon nade mununnin tiyamin.

²² Gega Al Kurun belen faran nurkeb wan wan hanka gago delger huwarde al denem yanya al maliya hitte Yesu nin tagalde hime. Nebe Moseya Al Kurunyen mere basan marya belen kame mata kura forok yiyyen yitin goyen go po tagalde hime. Hoyan nin ma tagalde hime.

23 Mata kame forok yiyen yen tagalamin gobe Mesaia nin tagalamin. ‘Mesaia be ulin misin kurun katen gab kamyen. Irde gor mat huwaryen. Mata gobe tinen wor po. Al kura gwaha ma titin. Yenbe Yuda marya Yuda mar mon kidoma bana hen mata bulun ten han marya goyen bin bak yenayin yen gogo kamtinde mat huwaryen,’ yamin,” inyin.

Pol belen Agripa goyen Yesu gama irayin inyin

24 Be, Pol go yingen ge ten hako tagalde hikeyabe Festus belen merem waldebe, “Pol, gebe kukuwa haha! Dufay karkuwan karkuwan yawararin gore girke kukuwa hen ha gogo,” inen kwep iryin.

25 Gega Pol belen wol henbe, “Doyan al Festus, mere gabe fudinde yen hime. Kukuwa henya ma yen hime.

26 Yesu ulinde mata forok yirin gobe balmin ma forok yirin geb, Agripabe mata goyen kenkela nurde hi. Ningeb mere ten hime gab yenbe goke yen hi yen nurde hi. Goke tenbe nebe kafura ma hen yen dilin mat igin mere iren,” inyin.

27 Irdeb Agripa kenenbe, “Ge gayen Al Kurunen mere basan mar belen mere tagalde hinhan goyenbe fudinde yen nurde ha? Ne benerbe fudinde yen nurde ha yen genen hime,” inyin.

28 Gwaha inke Agripa belen wol henbe, “Gaya-mun gayen po parsay irmekeb Kristen al hiwi yen nurde gago kurut nirde ha?” inyin.

29 Irkeb wol henbe, “Nalu ulyande ma dolfonde goke ma nurde hime. Gega han ka geya al buda kurun gar hen merene nurhan gayen tumnan ne

himin gwahade po den wor Yesu nin dufaytin sanin yirnayin yen Al Kurun gusunan irde hime. Gega gama nirde koyare hinan yen ma dinen hime,” inyin.

³⁰ Irkeb Yuda marte doyan al kurun Agripaya haymin Bernaisiya Roma gabman doyan al Festusyabe al buda kurun gor hinhan goya tumnan bur yinin yen huwamin.

³¹ Irdeb mere sope ird ird gasun go tubul ten kun henya yingen ulin mere tenbe, “Al gabe mata bulun kura ma tiyun gega, da misinde wor po ten koyare kerde mayteke kami yen kurut yen han?” yamin.

³² Be, Agripa belen Festus go, “Al gabe kun Sisar dilinde huwarde ga mere tiyen ma yiyun manhan han ka gayenbe okohom po tubul titeke kuwon,” inyin.

27

Rom kun kun nin Festus belen Pol go hakwa hende kiryin

¹ Be, Festus gore Pol go Rom taunde ten kermeke kuyen yen nurde al kura denjembe Yulius haninde kiryin. Al gobe “Sisaryen Fulea Mar” yinen han yen gote fulea mar 100 doyan yirde hinhan. Goyenterbe al hoyan kura koyare hinhan mar go manan al gote haninde yiryin. Irke Yulius belen mel go yade hakwa ten Itali nanare kunin tikeb nen manan Pol go gama irde tumnan kunin titirin.

² Be, Sisaria taun nen hinhetde gorbe hakwa kura Esia nanare nin taun Adramitium mat

wayyiŋ goyen kintiriŋ. Irdeb hakwa go sopte mulgaŋ heŋ Esia naŋare niŋ taun makaŋ siŋayaŋ kweŋ teŋ hike nurtiriŋ. Irde go hende kutiriŋ. Hakwa hende gorbe Masedonia naŋare niŋ taun Tesalonaika niŋ al Aristakusya tumŋaŋ kutiriŋ.

³ Be, kuŋ fay urkeb Saidon taunde forok yitiriŋ. Gorbe Yulius beler Pol igiŋ igiŋ ire yeŋbe, “Kuŋ dige yago kura yena. Irkeb det kuraŋ nurde ha goyen faraŋ gurnayiŋ,” inyiŋ.

⁴ Be, taun go tubul teŋ kutekeb meŋe kurun wor po huwarke kuŋ kuŋniniŋ metenŋeŋ diriŋ. Irkeb Saiprus motmotbe hanniniŋ tapa beler pel irde ketal urde kutiriŋ.

⁵ Irde Saiprus motmot murun fafor teŋbe Silisi-aya Pamfilia naŋare niŋ makaŋ ala goyen kahal po pater kuŋ Lisia naŋare niŋ taun Maira forok yitiriŋ.

⁶ Gorbe Yulius beler Isip naŋare niŋ taun Aleksandria niŋ hakwa kura goyen Itali naŋare kweŋ teŋ hike kinyiŋ. Irdeb hakwa go hende kuran dinkeb go hende hurkutiriŋ.

⁷ Be, kutiriŋ gega meŋe kurun huwarkeb wawun budam makaŋde hinhet. Irde bekenŋe kuŋ kuŋbe Nidus taunde forok yitiriŋ. Irde gor mat Rom po kuniŋ yitiriŋ gega, meŋe mun kura falmuk ma hiriŋ. Irkeb bada heŋ hakwa go bul irde Krit motmot murun deŋembe Salmone goyen hanniniŋ yase beler pel irde motmot go ketal urde kutiriŋ.

⁸ Be, kutiriŋ goyenbe meŋe kurun po geb, hakwa bemel kuŋ kuŋ goyen metenŋeŋ diriŋ. Irkeb makaŋ feren gama irtiŋeŋ teŋ kuŋ tiyun

kura denjembe “Makan Kamtinde” gor forok yitirin. Tiyun gobe Lasea taun bindere hinhin.

⁹ Be, belen kun hinhetya goyenbe nana fay budam wor po yubul titirin. Irde gonbe Yuda marte Binje Kutna Nalu hubu hen mene bulun kurun forok yeke makande epte ma kutek nalu hewen tike

¹⁰ Pol belen Yuliusya hakware nin meten marya goyen, “Mel, kunin yeke kunin tihit go belenbe kanduk kurun kente geb. Hakwaya samunya yemeyde nindiken manan bulun hetek geb,” yinen hayhay yiriyin.

¹¹⁻¹² Gega al budam belen, “Garbe mene nalure hakwa hitek mon geb, Finiks taunde kunin. Gorbe nana bulun heke hakwa hitek gasun igin geb, taunde gor hen mene goyen doyan irde hiteke wan fole tike gab kutek,” yamin. Finiks taun gobe Krit motmot goyen murun, nana kurkur belen mat hinhin. Be, al budam gwaha yekeb Yulius belen Polyen mere gama irtinenbe hakware nin meten marte doyan alya hakwa gote min al gote mere po fudinde yen nuryin.

Karam mene kafuram wor po huwaryin

¹³ Be, kunin titekeyabe mene igin mat wake kenenbe mel gore, “Mene nen yitin go gago forok yihi,” yamin. Irde anga tulun tike hurkukeb hakwa go ten Krit motmot goyen makan feren gama irtinen ten kwamin.

¹⁴ Gega hen ga mon yuwara mene kurun Krit motmot dugure mat katyin.

¹⁵ Irke Finiks taunde kunin yen tunan urtirin gega, mene go kurun wor po geb kutek mon

hekeb tubul tike yen belen po hakwa go ten makan alare tukuriŋ.

¹⁶ Irde meŋe belen dukukeb motmot dirŋen kura deŋembe Kauda goyen ketal urde kutiriŋ. Goyenterbe hakwa dirŋen kura hakwa kurun neŋ kuŋ hinhetde gor feŋ titiŋ tulun ten hinhin goyen bulun hiyyenkek yenbe ten hakwa kurun hende kirniŋ yen hakware niŋ meten mar belen kurut yamiŋ. Metenŋen yiryiŋ gega, kamebe ten keramiŋ.

¹⁷ Irdeb hakwa kurun go hende kuŋ hinhet goyen galaŋ yiyyenkek yenbe kaŋ tareŋ belen po yade hakwa yufuk bana yerke kurkukeb hakwa goyen he fere titiŋ yara irde tareŋ iramiŋ. Irde Libia naŋare niŋ makan siŋare Sairtis inen hanŋende gor ka kinŋiniŋ karkuwaŋ gor hanŋen geb, hakwa go kuŋ gor nek yiyyen yen kafura hamiŋ. Irdeb gwaha irteke hakwa ga bekenŋe kwi yen aŋga tubul tike kurkuriŋ. Goyenbe meŋe belen ten kuŋ hinhin po.

¹⁸ Be, karam meŋe kafuram kurun goyen muŋ kura ma falmuk hiriŋ. Irkeb makan duba karkuwaŋ karkuwaŋ gore waŋ hakwa go karim ma irde hinhan. Irkeb kuŋ fay urkeb hakwa goyen muŋ kura hipirkeŋ hiwi yenbe hakware niŋ meten mar belen tiyuŋ kurar niŋ det goyen kura yade makaŋde yemeyamiŋ.

¹⁹ Be, sopte po fay urkeb meten mar belen hakware niŋ meten ten ten det kura yade yemeyamiŋ.

²⁰ Be, nalu sobamde po makaŋde hinhet goya goyenbe meŋeya makaŋya goyen kura muŋ fal-

muk ma po haryum. Bulun wor po hekeb nanaya dinambeya mun kura ma yintirin. Irdeb, “Go ma hitek. Makaan de po kamnin tihit,” yen nurtirin.

²¹ Be, al buda kurun go dula ma tike kun kun nalu ulyande hirin. Irkeb Pol belen huwarde gaha yinyin: “Mel, mere dirmin goyen nurdeb Krit motmot ma tubul titin manhan kanduk kurun gahade ma kentewon. Irde hakware nin detya samunya kurun gayen ma yemeywon.

²² Goyenpoga nen al buda kurun gayenbe kura ma po kamtek. Hakwa po ga bulun hiyyen. Ningeb kafura ma yo. Taren hen hinayin.

²³ Nebe Al Kurunyen meten al. Yen ge po meten ten hime. Ningeb han ka wawunbe yende miyon belen wanbe,

²⁴ ‘Pol kafura ma yo. Gebe Sisar dilinge huwarde mere tiyayin geb. Irde Al Kurun belen geya hakwa hende kun han mar buninen nurd yunen faran yuryen geb go ma kamnayin,’ nina.

²⁵ Ningeb nebe Al Kurun belen nina gwahade po forok yiyyen yen hekken nurde hime. Ningeb goke tenbe gago kafura ma hen sanin po hinayin dinhem.

²⁶ Goyenbe hakwa gabe kun motmotde kura gor hen gab bulun hiyyen geb, goyen nurde ga hinayin,” yinyin.

²⁷ Be, hakwa ten Krit motmotde nin taun kura denembe “Makan Kamtinge,” go tubul ten wan wan wawun 14 hirin. Goyenterbe mene belen po dade makan kura denem Mediterenian Makan belen gon dukurin. Irkeb wawun binde gwahadebe hakware nin meten mar goreb megen kura bindere hi yara nuramin.

28 Gwahade nurdeb kan yulyan kura tenbe det kanduk ten kan murun kurhan fen tenbe ten kerke makan bana kurkurin. Gwahade irde makan go dukunmin tunan tiyaminbe 40 mita kenamin. Be, mun kura kutnen tenbe sopte po tunan tiyamin. Irde goyareb dukunminbe 30 mita po kenamin.

29 Gwahade kenenbe mongo ugun po kutekeb hakwa ga hora hende hurkun galan yiyen yenbe anga sipte yade hakwa kimyan belen mat yemeyamin. Gwaha irde gor henbe aranen fay urwon yen nurde hinhan.

30 Goya goyenbe hakware nin meten mar kurabe busaharnin yen anga hoyan kura sopte murun belen mat yemeyhet usi tenbe kun hakwa dirnen bikken isan hen hakwa kurun hende keramin goyen ten kerke makan de kurkun hin-hin.

31 Irkeb Pol belen go yenenbe fulen marya doyan almin Yuliusya hitte kunbe, "Meten mar gayen hakwa ga tubul ten busaharnayinbe den kurun gayen epte ma hinayin," yinyin.

32 Gwaha yinkeb fulen mar goreb kun hakwa dirnen giti irtin kan go walke makan alare katkeb tubul tiyamin.

33 Be, nan minge hekeb Pol belen mel go yenenbe, "Nan fay 14 bana gayen kafura wor po hen binke kura ma nan.

34 Goyenbe kuratin mun kura ma kamyen. Ningeb dufaytin taren irde binke nene taren po hen hinayin," yen kimnen yiryn.

35 Be, Pol go gwaha yinenbe kun beret tenbe al

buda kurun go diliŋde beret goke Al Kurun turun irde ubala ten niriŋ.

³⁶ Irkeb al buda go Pol belen gwaha yinkeb binde igiŋ nurde saŋiŋ henbe binde namiŋ.

³⁷ Be, hakwa hende gorbe al 276 hinhet.

³⁸ Be, binde kenkela wor po hen namiŋ. Irde ep irhet yen nurdeb binde kura hinhan gobe hakwa mun kura hipirken hiwi yenbe yade makande yemeyamiŋ.

³⁹ Be, naŋa fay urkeb hakware niŋ meten mar belen megen kura kenamiŋ. Goyenpoga naŋa gor hihit yen bebak ma tiyamiŋ. Irde hakwa kun gor hen hen gasun kura sawsawa minyan goyen kenenbe igiŋ wet gor kuniŋ yen nuramiŋ.

⁴⁰ Irdeb al kurabe kun anga gote kan walde pasi yirkeb al kurabe kun hakwa tigiri ten ten det kimyan belen hiyen gote kan goyen yugu tiyamiŋ. Munan kura marbe hakwa hende niŋ sel goyen isan hamiŋ. Irkeb hakwa gobe makan sinare sawsawa minyande kuriŋ.

⁴¹ Gega kun henyabe katul kurun hende hurkun nek yen dapsan hiriŋ. Irkeb makan duba karkuwan wan kimyan belen mayke maykeb gilgalan iryiŋ.

⁴² Gwaha tike kenenbe fulen mar belen al koyare niŋ yade kun hinhan goyen galun ten kun huginen busaharnak yen bidilare gasa yirniŋ tiyamiŋ.

⁴³ Gega doyan almiŋ Yulius belen Pol niŋ nurdeb fulen marmin utan yiryiŋ. Irdeb, “Fe galun ten ten nurde han mar go wa solok yen galun ten sinare kunayiŋ.

⁴⁴ Irde fe galuŋ teŋ teŋ ma nurde haŋ marbe hakwa galaŋ yitiŋde niŋ he parwek kura ma det potpot titek kura yanarde galuŋ teŋ kunayiŋ,” yinyiŋ. Be, gwaha mat neŋ tumŋaŋ ala igiŋ po siŋare forok yitiriŋ. Al kura ma kamamiŋ.

28

Malta motmot

¹ Be, neŋ tumŋaŋ siŋare hetekeb motmotde gor niŋ mar belen, “Motmot gabe Malta,” dinamiŋ.

² Gorbe kigariŋ kurun katke naŋa menek wor po hiriŋ geb, mel gore gargar wor po dirde dukun kak kawalde dunamiŋ.

³ Irkeb Pol belen kun he fere kura tawaŋ kak hende kiryiŋ. Goya goyenbe kunere duwi kura he fere bana goŋ hinhin geb, kak belen uka irke busaharde katenbe Pol haniŋde isen bingun tiyyiŋ.

⁴ Irkeb motmotde gor niŋ al belen kenenbe yingen uliŋ mere teŋbe, “Fudinde wor po, al gabe al gasa yirke kamde kamde al. Niŋgeb yeŋbe makaŋde po kamwoŋ gega, go ma kamkeb al banare hi goreb mata bulunmiŋde murun gembe kunere belen isa gago,” yamiŋ.

⁵ Gega Pol go uliŋde misiŋ kura ma nuryiŋ. Irde kunere go taraŋ teŋ kak alare timiyyiŋ.

⁶ Goyenbe mel gore Polbe haniŋya uliŋya pom-pom wet yiniŋ tahaŋ ma, huwarde hire mat diliŋ girgir irke takteŋ mayke bemel po kamen tiya yeŋ nuramiŋ. Irde Pol go daha kura tiyeŋ tiya yeŋ kenkela po kenen hinhin. Gega daha kura ma tike

kenenbe, “Nenbe usi tihit. Al gabe ungura geb, gago ma kama,” yamin.

⁷ Be, Malta motmotde nin doyan al kura denembe Publius goyen gor hinhin. Yenbe nen hinhin bindere hinhin, irde megenminbe kurun wor po. Be, yen belen nen hoy dirke kun yenya wawun karwo gor firtirin. Gor hitekeb yen belen gargar dirde igin igin wor po dirke amanen nurde hinhin.

⁸ Be, gor hinhetya goyenbe Publius naninbe ayganya kasorsorya bulun wor po irkeb gasunde po firtinde hinhin. Irkeb Pol go mere momonmin nurdeb kun kenen hanin yerde unen Al Kurun gusunan irkeb igin hirin.

⁹ Be, goyen kenenbe garbam mar kurun motmot goyenter nin goyen pasi po Pol hitte wayamin. Irkeb yen belen garbam mar goke Al Kurun gusunan irkeb igin hamin.

¹⁰⁻¹¹ Irkeb go kenenbe palap wor po dirde mata igin igin po diramin.

Pol go Rom taunde forok yirin

Be, Malta motmotde gorbe gagasi karwo hinhin. Go kamereb hakwa kura menje kurun nalu heke gor hen henbe nalu go hubu heke kwen ten hinhin goyen kenenbe hakwa go hende kutek yitirin. Irkeb al buda Malta motmotde nin gore hakwa hende kun henyabe det goke nurnayin yenbe det galak dirde yingen po yukun hakwa binde yerde dunamin. Hakwa gobe Isip nanare nin taun Aleksandria nin. Hakwa go murundebe Grik marte tikula al irawa denembe Kestaya Poluksyat tonen yirtin.

¹² Be, Malta motmotde matbe kuñ kuñ Sisili motmot kurunđe gor niñ taun kura denjembe Sairakus forok yitirin. Irde nana fay karwo gor hinhet.

¹³ Irde gor matbe kuñ Itali nanare niñ taun kura Regium forok yitirin. Be, firtirin fay urkeb taun go tubul ten kutirin. Kuñ henyabe mene igin mat huwarke igin po kutirin. Be, wawun hen kuñ sopte fay urkeb Itali nanare niñ taun hoyan kura Puteoli forok yitirin.

¹⁴ Gorbe Yesu niñ dufaymin taren irtin mar yupi titirin. Irkeb yen belen pere dirde gargar diramin. Be, mel goyabe meten nana unken gor hinhet. Go kamereb Rom kunin yen taun go tubul ten kahanininde kutirin.

¹⁵ Irkeb al buda kura Yesu niñ dufaymin taren irtin mar Rom taunde gor niñ belen nende mere momon nuramin. Irdeb wan nen ge doyan hiniñ yen gasun kura “Apius Maket” inen hanyende gor doyan dirde hinhan. Munan al buda kurabe taun kura denjembe “Ferd ferd Gasun Karwo” inen hanyende gor wan doyan dirde hinhan. Be, kuñ gor forok yen Pol belen al buda go yenen binde igin nurde sanin hen Al Kurun turun iryin.

¹⁶ Be, kuñ Rom taunde forok yitirin. Irkeb Roma gabman belen Pol go koyare ma kerdebe ya kura unamin. Irke gor henbe gagasim gagasim ya go damu ten hinhin. Goyenpoga yen unken po ma hinhin. Fuleña al unken kura belen doyan irde hinhin.

¹⁷ Be, Pol go kuñ nana fay karwo kamereb Yuda marte doyan mar gor hinhan goke keya hirin. Be, wan gabu irkeb gaha yinyin: “Kadne yago,

nebe nende alya bereya bulun ma yirmin. Irde asininin yagot mata kura ma pel irmin. Gega Yuda mar Yerusalem han gore merem yan nirde Roma mar haniinde neran.

¹⁸ Irkeb Roma mar belen gusunan niran gega, min goke kura mununke kamtek mon geb, nade sinare nirnin tiyan.

¹⁹ Irkeb Yuda mar goreb goke igin ma nuran. Irkeb nebe gwaha kura titek mon nurdeb, 'Sisar dilinde ga mere tiyen,' yen Roma al go inmin. Gega nere al goyen tagal yune yen ma gwaha inmin.

²⁰ Ningeb nigen goyen momon dire yenbe gago den ge keya hihim. Yuda mar kurun gare al kame wan doyan diryen yen doyan irde hanjen al goke tagalde himekeb gago koyare neran," yinyin.

²¹ Irkeb mel gore wol henbe, "Yuda mar Yudia nanare han gore kura asan kan ge nin momon dirdem mon. Irde nende al kura Yudia nanare mat wayan gore kura ulger mere bulunen kura ma tagalke nurtin.

²² Gega al budam hike kwa kurun gabe den Yesu gama irde han mar goke tagalde dunen han. Ningeb goke momon dirke nurnin yen nurde hite," inamin.

²³ Be, gwaha inenbe sopte gabu irnin yen nalu tiyamin. Be, nalu tiyaminde gor hekeb Pol hinde gor al karim ma gabu iramin. Han kanya gabu iramin gwahade mon. Irkeb wampot mat Al Kurun belen dirnen wen doyan yird yird mata goke saba yirke kun kun wawun hirin. Irde Yesu nin momon yirmeke bebak tinan yenbe Mose

belen tikula asan̄de kayyin goya Al Kurunyen mere basan̄ mar belen̄ asan̄de katin̄de gor mat mere gote min̄ tagalyin̄.

²⁴ Irkeb kura marbe Pol belen̄ mere tiyyin̄ gobe fudinde yekeb kurabe usi yen̄ nuramin̄.

²⁵ Mel gore gwaha yeke Pol belen̄ yenen̄be mere funan̄ gaha yinyin̄: “Holi Spirit belen̄ mere fudinde kura asetin̄ yago nurnan̄ yen̄ Al Kurunyen mere basan̄ al Aisaia momon̄ irkeb gahade kayyin̄:

²⁶ ‘Al Kurun̄ belen̄ Israel mar hitte kun̄ gaha yinayin̄ nina:

Den̄be merene nurde hinayin̄, irde kenen̄ hinayin̄ gega, bebak ma po ten̄ hinayin̄.

²⁷ Fudinde wor po, mel gate bin̄be san̄in̄ wor po. Kirmin̄be migisun̄ yurtin̄. Irde dilin̄be mala titin̄.

Mon̄ manhan kirmin̄de nurde, dilin̄de kenen̄be bin̄de bebak wor po ten̄ ne hitte mulgan̄ hen̄ wake sope yirmewon̄,’ yitin̄ hi. *Aisaia 6:9-10*

²⁸⁻²⁹ Nin̄geb yirin̄ gwahade po den̄ Yuda marbe Al Kurunyen mere pel irde han̄yen geb, Al Kurun̄ belen̄ alya bereya yumulgan̄ ten̄ ten̄ gote mere igin̄ goyen al min̄ hoyan̄ Yuda mar mon̄ hitte ten̄ kerke kukeb yen̄ belen̄ gab nurde gama irde hinayin̄ goyen momon̄ dirde hime gago,” yinyin̄.*

³⁰ Be, Pol gobe ya kura Roma gabman belen̄ unke gor hen̄be gagasim gagasim damu ten̄ hin̄hin. Gorbe dama iraw hikeyabe al belen̄ kinnin̄

* **28:28-29:** Asan̄ hoyan̄deb gahade hi: ²⁹ *Irkeb al buda kurun̄ gob bur yen̄ kun̄ hen̄yabe Pol mere tiyyin̄ goke yin̄gen̄ ulin̄ kadam mohan̄de tiyamin̄.*

yeŋ waŋ hinhan. Irkeb yeŋ belen, “Iginge, waŋ nenen hinayin,” yinen hinhin.

³¹ Irkeb kafuram moŋ Al Kurun belen dirnen weŋ doyan yird yird mataya Doyan Al Kurun Yesu Kristu nin tagalde saba yirde hinhin. Irkeb meten ten hinhin goyen al kura belen utaŋ irtek ma hiriŋ.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 18 Mar 2025 from source files dated 31 Aug 2023

dbba218f-41f3-5f08-b0b6-2a7c919093ab